

Itota nänö da godongainäni Näni Cægainö

Wængonguï Tæiyæ Waëmö Önöwoca poncæcäimpa, ante

¹ Teopido bitö acæbiimpa, ante botö do yewæmöninque, Itota æbänö mä cægacäi, ante, Itota æbänö mä odömonte apænegacäi, ante yewæmontabopa. Mänömainö ante do yewæmönimo inte botö adobo Odoca inömo inte ñöwo godömenque yewæmömo ae. ² Itota do iñömö, İinäni botö imotedö ante nê apænequinäni inänipa, ante cædinque tömënäni inänite apænte æninque da godongacäimpa. İinque tömengä nänö æite goquïönæ iñonte tömënäni tönö godongämæ ongöninque Itota iñömö Wængonguï Tæiyæ Waëmö Önöwoca tönö cædinque tömënäni inänite, Botö dæ gobo ate mïnitö iïmaï cæcæminimpa, ante apænegacäimpa. İinque apænecä ate tömengä ingante Wængonguï do ænte mæicä inque ingä æigacäimpa. İinque mäninganca tömengä nänö cægainö ante do yewæmönimo inte botö iñömö, Bitö Teopidobi godömenque acæbiimpa, ante ñöwo wæætê yewæmömopa.

³ Itota adocä incæ nantate wægaingä inte ñäni ömæmonte ate coadenta ëönæ manimpoönæ inguipoga quëwëninque tömënäni weca mïingä inte wæætê pö wæætê pö cædinque mä pönï cædongäimpa. İinque, Tömengä näwangä mïingä

inte mänömaï cæcampa, ante adinque tömënäni ædö cæte wadö ante pönenguïnänii. Ayæ tömënäni weca a ongöningue tömengä tömënäni inänite, Wængonguï Awënë Odeye nempo quëwencæminimpa, ante tömänö ante adodö adodö ante apænecä ëñengadänimpa.

⁴ Tömënäni tönö godongämæ ongöningue Itota iïmaï angantapa.

—Wii wayömö goedäni, Eedotadëë iñömö ee quëwëedäni, angantapa. Botö Mæmpo iñömö, Wacä ingante da pönömo æningue ëwocacæminimpa, ante do apænebo ëñëmïnitawo. Tömengä, Da pönonguïmo, ante nänö në angaingä ingante ante ænte ëwocacæte ante mïnitö ñowo wänö cöedäni. ⁵ Edæ Wäö wodi iñömö æpænë guidongacäimpa. Wængonguï Tæiyæ Waëmö Önöwoca guiquënë mïnitö baonga wantæ iñö pö guicæcäimpa, ante Itota apænegacäimpa.

Itota öönædë æicampa

⁶ Ayæ Itota tönö godongämæ ponte ongönäni iñömö tömengä ingante änänitapa.

—Itota ëñëmi. Mönö idægocabo mönö quëwengaimæ iñonte wadäni do ö ænäni incæte bitö ñowo wæætë adobæ æningue mönitö Awënë Odeyebi oo bacæ cæbitawo. Edæ, Bitö nempo oo pönï godongämæ quëwencæmönimpa, ante cæbitawo, ante ëñencæte ante wæmönipa.

⁷ Anca äñönäni,

—Iñæmpa mïnitö ante wæinö bai, Æyedënö baquïi, ante, Æpogadö baquïi, ante mïnitö wii ëñenguënëmïni iminipa. Mæmpoque në angaingä inte mäninö ante ëñengampa. ⁸ Wæætë Wængonguï

Tæiyæ Waëmö Önöwoca pö guiddinque pönö cæcä ate mīnitö wæætē tæi pīñænte ēwocamīni edæ bacæmīnimpa. Īninqe, Botö æbänö cægaboī, ante nē adīmīni inte mānīnō botö cægainö ante mīnitö tāno Eedotadēē iñömö quēwente apænedinque ayæ Oodeabæ mǎo apænedinque ayæ Tāmadiabæ mǎo apænedinque godōmenque tōmāmæ mǎo apænemīni ēñencädānimpa, ante Itota angacāimpa.

⁹ Mānōmāinö ante apænecä ēñente a ongōñönāni Itota māniñömö ongonte æi boguīmancodē ingæ æicä æmō agadānimpa. ¹⁰ Öönædē æite ingæ gocä æmō ayönāni edæ onguīñæna nāāmænta weocoo mongæna tōmēnāni weca a ongōninque edæ, ¹¹ tōmēnāni inānite apænedinque,

—Gadideabæ quēwēmīni inte onguīñæmīni ēñēedāni. Quīnante æmonga a cōmīni. Edæ Itota mīnitö tōnō ongōninque öönædē æicä amīnitawo. Edæ öönædē æicä mīni adī baī adocä Itota iincayæ ate ocæ emænte poncæcāimpa, ante apænedatapa.

Codaa nänö cæquēnēnō wacä cæccæcāimpa, ante cædāni

¹² Oodeoidi nāni guēmanguïönæ cōwē nāni goganca māningancaque ī ĩninqe wīī gobæ ī ĩninqe tōmēnāni Odibowænquidi nāni anquidi ongōninque ocæ emænte wææ Eedotadēē pōnānitapa. ¹³ Tōmēnāni emōwo Pegodo tōnō Wäö, Tantiago tōnō Æntade, Pedipe tōnō Tōmato, Batodōmēē tōnō Māateo, Adepeo wengä Tantiago, wacä, Mönö omæ ingæimpa, ante nē ānongä Timönö, Tantiago wengä Codaa. Mānōmāi emōnāni inte pö guiddinque tōmēnāni nāni wānoncōnē æmongapaa

æi guiidänitapa. ¹⁴ Ayæ iinäni tönö wadäni Wængongui ingante godongämæ apænecæte ante cöwë pö pö cægädänimpa. Onquiyænäni adobaï Itota badä Mäadiya tönö ayæ Itota biwïidi tönö cöwë ponte apænedönänimpa.

¹⁵ Mäniñedë Itota ingante näni tee empote quëwënäni tiento bæinte ganca inäni inte ongöñönäni Pegodo tæcæguedë ængæ gantite apænecantapa. ¹⁶ “Iñänäni ëñëedäni. Nöwocä Codaa wodi Itota wodi ingante në æncædäni inänite në godö odömongä ingantawo. Edæ tömengä ingante ante Wængongui Tæiyæ Waëmö Önöwoca wëenëñedë apænecä ëñëinque awënë Dabii wodi nänö yewæmongainö bai cöwë iinque baquinö angüënë. ¹⁷ Edæ Itota mönitö imönite apænte æninque Codaa ingante adobaï apænte ængacäimpa. Iinque mönö cabo mönö në cæquënënö ante Codaa wodi adocä incæ mönö tönö godongämæ cæcä ingacäimpa. ¹⁸ Tömengä wiwa cæte tiguitamö nänö ænintamö incæ adodö godongä ænänitapa. Tömënäni wæætë tiguitamö æninque, Waodänido bacäimpa, ante ömæ godonte ænänitapa. Tömengä iñömö guidömëmæ wæænte ömengö tæi æbæ godente æmæwo wængantapa. ¹⁹ Mänömaï wængä ëñëinque Eedotadëë quëwënäni tömänäni, ‘Wepæ onguipo ba awædö,’ ante tömänäni näni tededö Atedämæ pemönänitapa. ²⁰ Edæ Ämotamini näni Angaintaa iïmaï ante dobæyedë yewæmongatimpa.

‘Tömengä oncö æmæwo önonconque bacäimpa.

Wacä mänincönë cöwë quëwënämaï incæcäimpa.’

Ante näni Ämotamïni Angainta bai do batimpa.
 Ayæ,
 “Tömengä nē aacä bate nänö cæquēnēnō incæ wacä
 badinque cæcæcäimpa,
 ante yewæmonte ongompa,”

²¹ Ante apænedinque Pegodo godömenque
 iïmaï ante apænecantapa. “Mänömaï iï ininque
 Codaa wodi nē nänö cæquēnēnō incæ edæ wacä
 cæcæcäimpa, ante ñöwo mönō apænte angæimpa.
 Awēnē Itota imæca mönō tönō guëa cægongäñedē
 wadäni godongämæ nē cægöninäni inänite adinque
 mönō iïmainö ante apænte ængæimpa. ²² Wäo
 wodi nänö guidöñedē cægöninque ñöwoönæ
 Itota nänö æite goönæ ganca æcänö æcänö
 mönō tönō godongämæ cægöninäni inänii, ante
 adinque mönō adocanque ingante apænte
 ængæimpa. Apænte æmō ate tömengä, Itota
 dobæ ñäni ömæmongantapa, ante nē againgä
 inte wæætē mönō tönō godongämæ apæncä
 incæcäimpa.” ²³ Ante Pegodo angä eñente
 cædinque tömēnäni wæætē, Æcänö æcänö nē
 againäni inänii, ante adinque mēnaa inate apænte
 ænänitapa. Adocanque Ootee, Badatabato näni
 änongä inte tömengä mæmæ beyæ, Yoto, ante
 näni pemongaingä iñongante tömēnäni tömengä
 ingante apænte æninque edæ wacä ingante
 Mäatiya ingante apænte ænte gönönänitapa.
²⁴ Mänömaï apænte æninque Wængonguï ingante
 apænedänitapa. “Awēnē eñēmi. Mönitö æbänö
 pönēmönii, ante tömäa eñēmi inte bitö iïna inate
 adinque æcänö ingante do apænte ængabiï, ante
 odömömi amönii. ²⁵ Edæ Codaa wodi tömengä
 nänö pante wænguinque oda cæcantapa. Ininque

bitö ñöwo wacä ingante da godömi godinque Codaa wodi nänö cæquënönö ante cæcæcäimpa, ante ämii, ante wæmönipa.”

26 Ante Wængonguï ingante apænedinque tömënäni, Æcänö inaa, ante eñencæte ante cædinque dicamö æninque, Wo godö wo godö cæyömö to ta wææ acæi, ante cæte ayönäni Mäatiya nänö cæ to ta wæænca adinque, Mönö imonte Itota da godongä nē godimö önompo tipæmpoga go adocanque iñömonte tömengä mönö cabo badinque godongämæ cæcæcäimpa, ante cægadänimpa.

2

Wængonguï Tæiyæ Waëmö Önöwoca pongampa

1 Tömëmö incadepo ba ate Pentecotee ææmænoca nāni äönæ iñonte tömënäni nāni cabo adoyömö ponte godongämæ ongönänitapa.

2 Ongonte eñeñönäni woboyæ nanguï pæmænte ä bai iñontobæ öönæde pö eñeñönäni oncönē nāni ongoncönē tömancönē wææ guiite bai woboyæ nanguï pæmænte ä bai eñenänitapa.

3 Ayæ waodäniya incæ gonga bai onguenē onguenē bæco adänitapa.

4 Ayönäni Wængonguï Tæiyæ Waëmö Önöwoca incæ tömänäniya pö guicä ewocadänitapa. Pö guiidinque Wængonguï Önöwoca pönö cæcä beyænque tömënäni wadäni nāni tededö bai wadäni nāni tededö bai mä apænedänitapa.

5 Mäniñedē oodeoidi Wængonguï ingante guiñente quëwënäni inte edæ wabæca wabæca tömämæ quëwëninque ñöwo Eedotadëe ponte quëwënönänimpa.

6 Iināni iñömö woboyæ

nangui pæmænte bai ä eñente wædinque ponte
 eñeñonäni Itota ingante nē pönenäni iñomö ñowo
 pönäni näni tededö bai tededäni eñenänitapa.
 Adocanque nänö tededö bai wacä nänö tededö bai
 tededäni eñenique tömənäni, Æbänö cæte tömämö
 tededö bai tededäni eñemönii, ante wædänitapa.
 7 Tömənäni nämäneque apænedinque,

—Iñæmpa Gadideabæ quëwëninäni que inte
 iinäni mänömaï tededäni awædö. 8 Iñinque
 ædö cæte mönö eñagaïömæ mönö tededö bai
 tededäni eñemöö, ante ancai guiñente wædänitapa.
 9 Edæ iñomö nē ongömö iñomonte pancadäniya
 Padatiabæ quëwente pöñomö wadäni guiquënë
 Mëediabæ, Edämæ, Mëetopotämiabæ, Oodeabæ,
 Capadotiabæ, Pontobæ, Atiabæ quëwente
 pönäni inänipa. 10 Wadäni guiquënë Pidiguiabæ,
 Pampidiabæ, Equitobæ quëwente pönäni inänipa.
 Wadäni guiquënë dibiabæidi inäni inte Tidëne
 iñomö quëwente pönänipa. Wadäni guiquënë
 Odömä iñomö quëwëninque eñacæ ante ponte
 owodänipa. 11 Odömä iñomö nē quëwëninäni
 iñomö pancadäniya oodeoidi eñagainäni iñonäni
 pancadäniya wæætë wadäni incæ oodeoidi
 pönenäni bai adodö pönente oodeoidi bai
 bagainäni inänipa. Ayæ wadäni guiquënë
 codetenteidi tönö adabeidi inte pönäni inänipa.
 Iñinque mönö wabæca wabæca quëwëninque
 wadäni näni tededö bai wadäni näni tededö
 bai nē tedemö imompa. Incæte iinäni guiquënë,
 Wængongui waa pönï cæcä ingampa, ante mönö
 tededö bai mä pönï tededinque apænedäni
 eñemompa töö.

12 Ante wædinque tömënäni näni cabo nämäneque apænedinque,

—Æbänö eñëmöö, ante wæmönipa töö.

13 Ante wæyönäni pancadäniya babæ apænedinque,

—Biinömæ müimæ tömo pönï bedinque dowænäni inte tededänipa, ante badete togadänimpa.

Pegodo tömënäni inänite apænecampa

14 Mänömaï tedeyönäni Pegodo iñömö önompo tipæmpoga go adocanque inäni tönö ængæ gantid-
inque nanguï tedecä eñengadänimpa. “Oodeoidi
eñëedäni. Ayæ wamïni guiquënë Eedotadëe iñömö
ñowo ponte owomïni inte minitö oodeoidi tönö
tömämïni ëamonca ongonte eñëedäni. Botö, Æbänö
i, ante edonque apænebo eñencæmïnimpa,” angan-
tapa.

15 “Gäwadecæ impa diyæ ti nämæ bete dowænte
baquïnänii. Iñæmpa nænque ayaönäa ææñongä
ædö cæte mïni änö bai bete dowænte baquïnänii.

16 Wæætë Wængonguï beyæ në apænegaingä
Oedo wodi do nänö angainö bai ñowo cædänipa,
ante apænebo eñëedäni. Oedo wodi iñömö
iïmainö ante yewæmongacäimpa.

17 Wængonguï iïmaï angampa, angacäimpa.

Iinque bayedë botö Önöwoca ingante tömänäniya
ämo pö guicä ewocacædänimpa.

Mäniñedë onquiyænäni incæ onguïñænäni incæ
minitö wënäni inönäni inte botö beyæ
apænecædänimpa.

Edëninäni iñömö ate bai mä pönï acædänimpa.

Picænäni guiquënë nö wiïmonte bai acædänimpa.

18 Ayæ botö Önöwoca ingante ämo pö guicä
 ewocadinque
 onguiñænäni incæ onquiyænäni incæ
 botö beyænque nē cædäni inönäni inte botö beyæ
 apæ necædänimpa.

19 Edæ mini ææmō ate pönenguinque ante botö
 öönædē mā cæbo acæminimpa.
 Ayæ imæca adobaī pönö cæbo ate wepæ
 gonga tēmā nanguī mongæ adinque
 eñencæminimpa.

20 Edæ nænque täno wentamö bayö apäicä wepæ
 emö ba acæimpa.

Ayæ ate tömengä nänö ponguiönæ iñonte
 Wængongui Awënë incæ tæi piñængä inongä inte
 ñäo apäite baī emöninque poncæcäimpa.

21 Ìninqe botö emöwo ante nē aa pedäni iñömö
 tömänäni botö æmo beyænque quëwencædänimpa.’
 Ante Wængongui Awënë cæcæcäimpa, ante Oedo
 wodi yewæmongacäimpa.”

22 Ante apænedinque Pegodo godömenque
 iimaī ante apæ necantapa. “Idægoidi, apænebo
 eñëedäni. Itota Näatadeta nē quëwengaingä
 näwangä botö nē da pönongä ingampa, ante
 pönencæminimpa, ante mā cædinque Wængongui
 Itota tönö godongämæ tæi piñænte nanguī cæcä
 ate Itota minitö weca bamönengæ cædinque nanguī
 cægacäimpa. Ìninqe mänömaī cæcä nē agaimini
 inte minitö, Näwangä Itota ingante Wængongui
 da pönongä ponte cæcampa, ante do eñëminipa.

23 Wængongui nämä pönëninque, Codito ingante
 tömënäni nempo pædæ godoncæboimpa, ante do
 angaingä inte, Minitö tömengä ingante æninque

mänömaï cæcæminimpa, ante do eñengacäimpa. Ìninqe mīnitō iñömō Itota ingante bæi ongonte æninqe eñente cædāmaï ināni nempo pædæ godōninqe, Mīnitō tōmengā ingante awāa timpodinqe wææ tīwate wænōedāni, ante āmīni wænōnānitapa. Mänömaï önōnecaque tedete beyæ mīnitō tōmēmīni edæ nē wænōmīni bai bamīnīpa tōō. ²⁴ Mīnitō mänömaï wadāni tōnō cædinque wænōmīni beyæ Itota iñömō mōnō wænguēnēmāmo teēmē mongænte caate wædinque wængacäimpa. Ayæ pæ opate öñöñongante Wængonguï wæætē, Idæwaa, ante wi ænote bai cædinque angā ate Itota ñāni ömæmonte ta pongantapa. ²⁵ Adocä Codito beyæ ante apænedinqe awēnē Dabii wodi iīmaï ante yewæmongacäimpa.

‘Botō, Mōnō Awēnē cōwē botō weca mæ on-gongampa, ante atabopa.

Ìninqe tōmengā botō tōmēmæ inō tōō æmænte on-gongā Ìninqe botō ïmote ædō cæte bæ tadāni wæquīmoo.

²⁶ Mänömaï beyæ botō, Watapæ bacæimpa, ante mīmōnē pōnēmo inte botō önōneca ämotamīni ante bai nanguï tobopa.

Botō ñāni ömæmonguinque nē wæwocabo ïmopa, ante pōnēmo inte botō guññēñate wædāmaï inte baō eñate quēwencæboimpa.

²⁷ Wængonguï eñēmi. Botō waodāni nāni wænte ongōñömō öñöñōmote bitō emō cæte godāmaï incæbiimpa.

Bitō ïmite nē cæbo inte botō tōmēmi cædō ante cōwē cæbo iñōmote bitō ædæmō wææ aabi ate

botō baō ñömāadāmaī incæboimpa, ante edæ
botō do eñēmopa.

²⁸ Taadō botō quēwenguinō ante bitō do odömōmi
agaboimpa.

Bitō weca æidinqe bitō awinca adinqe watapæ
tocæboimpa,
ante awēnē Dabii wodi ämotamīni ante bai
apænegacäimpa.”

²⁹ Ante apænedinqe Pegodo godömenque
apænecantapa. “Iñänāni ñowo edonque apænebo
eñenguēnē quēwēmīni. Mönō mæmæ Dabii
wodi do wængacäimpa. Tömengä mäo do daga
wengadänimpa. Edæ tömengä wodido nāni
wengaiñömō ñowo ganca a ongö amīnipa.

³⁰ Incæte tömengä ingante Wængonguī, Dabii
eñēmi, angacäimpa. Bitō pæināni wææ
pæyönāni adocanque ingante botō bitō awēnē
contaimpa pönō cönōmo contadinqe tömengä
iñömō nē Awēnē bacæcäimpa, ante apænecä
eñēninque awēnē Dabii wodi Wængonguī beyæ
nē apænegaingä inongä inte edæ, Wængonguī
tömengä nänō änō bai cōwē cæcæcäimpa, ante
do eñengacäimpa. ³¹ Ayæ, Æbänō cæquingä, ante
do eñengaingä inte tömengä, Mönō Codito iñömō
woadāni nāni wænte ongöñömō öñöñongante
Wængonguī emō cæte godāmaī inte wææ aacä
beyænque tömengä baō incæ ñömāadāmaī
ingæimpa, ante apænegacäimpa. Mänōmainō ante
apænedinqe awēnē Dabii wodi, Mönō Codito
ñāni ömæmoncæcäimpa, ante do apænegacäimpa.
³² Itota ingante Wængonguī, Nāni ömæmōe, angä
ñāni ömæmongantapa. Ininqe mäninō tömengä

nänö ñāni ömæmongainö ante nē adimōni inte mōnitö tömämōni edæ, Nāwangä impa, ante nē apænemōni imōnipa.”

³³ “Īninque Wængonguī angä beyænque Itota inque ingä öönæde æidinque Wængonguī tömëmæ inö tæ contate ongongampa. Ayæ Mæmpo Wængonguī, Botö Önöwoca ingante æncædānimpa, ante nänö nē angaingä ingante do godongä æninque Itota wæætē mōnitö imōnite ñöwo da pönongä ænte ewocamōnipa. Īninque mīnitö guiquënë gonga bæco ate wæmīnitawo. Wadāni nāni tede bai tedemōni eñente wæmīnitawo. Edæ Wængonguī Önöwoca pönö cæcä beyænque gonga bæco amīnipa. Wængonguī Önöwoca pönö cæcä beyænque wadāni nāni tede bai tedemōni eñēmīnipa. ³⁴ Itota öönæde inque ingä æicä bai awënë Dabii wodi wīi adobai æigacäimpa. Incæte tömengä godömenque apænedinque iīmai ante yewæmongacäimpa.

‘Awënë Wængonguī incæ botö Awënë ingante apænedinque,

Nē Awënë iīmi eñēmi. Botö tömëmæ inö tæ contayōmi,

³⁵ botö bitö imite nē piinte cædāni inānite bæ tabo ate bitö tömēnāni inānite pīnā gāwate bai cæcæbiimpa,’ ante Awënë Wængonguī angacäimpa,” ante Dabii wodi yewæmongacäimpa.

³⁶ Ante apænedinque Pegodo godömenque iīmai angantapa. “Mänōmai beyæ mīni idægocabo tömāmīni, iīmāinö ante nāwangä pōni impa, ante eñencæmīnimpā. Māningä Itota ingante mīnitö

ñænquedimæ gönonte wænömïni nē wæningä ingante ante apænedinque Wængongui incæ, Itota nē Awënë inongä ingampa, ante ayæ, Nē Codito inongä ingampa, ante edæ do cægacäimpa.”

³⁷ Ante Pegodo apæ necä ëñëninque tömënäni, Æ, wënæ wënæ cæte awædö, ante ancai guiñente wædinque Pegodoidi inänite,

—Iñänäni, æbänö cæquënëmöni imönii.

³⁸ Äñönänite Pegodo wæætë,

—Iimäi cæedäni. Minitö wënæ wënæ mini cædinö ante Wængongui pönö ñimpo cæcæcäimpa, ante cædinque, Æmæwo wënæ wënæ cætabopa, ante Itota Codito ëmöwo ante apænedinque æpænë guiedäni. Mänömaï cæmini adinque Wængongui tömengä Önöwoca ingante da pönongä ænte ëwocacæminimpa. ³⁹ Edæ minitö iminite aa pecä incæ mini wënäni inänite aa pecä incæ gobæ quëwënäni inänite aa pecä incæ ayæ ate quëwënäni inänite aa pecä incæ mönö Awënë Wængongui nänö nē aa pedäni inänite apænedinque, Botö änö bai cöwë cæcæboimpa, angampa.

⁴⁰ Ante apænedinque Pegodo godömenque nanguï äninque, Æñenguënë quëwënänii, ante wantæpiyæ apæ necantapa.

—Ñöwodäni iñömö nämanque näni cæinënö ante idiquibæ näni cæi bai minitö adobai cædämaï inte nöngä cæte waa quëwëedäni.

⁴¹ Ante Pegodo ancaa angä ëñëninque pancadäniya Ao äninque æpænë do guidänitapa. Ininque edæ mäniönæ todee müdo ganca inäni mänimpodäni wede pönëninque do pönengainäni tönö adocabodäni bagadänimpa. ⁴² Iinäni iñömö

adocabodāni badināni inte cōwē ñimpo cædāmaī
 inique godongāmæ pō pō cæyōnānite Itota nānō
 da godongaināni apænedāni ēñēnōnānimpa. Ayæ
 nāni pōnencabo inōnāni inte wacā ingā wacā ingā
 watapæ apænedinque pāo pā ænte godongāmæ
 cæninque Wængonguī ingante cōwē apænete
 quēwēnōnānimpa.

*Nāni pōnencabo godongāmæ waa cæte
 quēwēnānipa*

⁴³ Inique edæ tōmānāni guīñente wædinque ee
 quēwēnōnānimpa. Ayæ Itota nānō da godongaināni
 iñōmō, Tōmānāni pōnencædānimpa, ante cædinque
 Wængonguī Tæiyæ Waēmō Önōwoca tōnō cædinque
 tōmēnāni nāni pōnēninque ante mā cædinque
 bamōnengæ nangui cædōnānimpa. ⁴⁴ Nē pōnēnāni
 tōmānāni adoyōmō pō pō cædinque tōmēnāni
 nāni mānincōo incæ, Tōmāmō qui impa, ante
 nē pōnēninque, Wacā ingā wacā ingā mōnō
 godongāmæ godonguinque māmompa, ante
 cædōnānimpa. ⁴⁵ Māincōo tōnō ömæ nāni ēadincōo
 incæ godonte æ godonte æ cædinque wadāni
 nē ömaadāni inte wædāni inānite pancæ pancæ
 godōnānimpa. ⁴⁶ Ī inique iimō iñō iimō iñō
 adoyōmō pōninque Wængonguī oncō ñænæncōnē
 yabæcōnē nē guī guī cædāni inte mīmōno nō
 pōnēninque tōmēnāni oncōnē adobaī pāo pā ænte
 watapæ todinque godongāmæ cænōnānimpa.
⁴⁷ Tōmēnāni edæ Wængonguī ingante, Waa pōni
 nē cæbi imipa, ante ancaa aññōnāni wadāni edæ
 tōmēnāni inānite waa adōnānimpa. Ayæ mōnō
 Awēnē pōnō cæcā ate tōmēnāni edæ, Itota
 Codito ængā beyænque mōnō quēwengæimpa,

ante pönëningue iimö iñö wacabomö iimö iñö
wacabomö nē pönënäni badinque edæ tæiyænäni
bagadänimpa.

3

Cömäwaingä ingante äna waa bawacampa

¹ Iincayæ ate nænque ædæ wæicä ate oodeoidi
näni cöwë Wængongui ingante apænedöñedë
Pegodo tönö Wäö iñömö Wængongui oncönë
ñænæncö yabæcönë guicæte ante æidatapa.

² Æite ayöna wadäni pöninque cömäwaingä ëñate
nē pædingä ingante næænte mämönäni pongä
adatapa. Iingä cömäwaingä iñömö nē pö guidäni
inänite, Pönömi æmoe pönömi æmoe, ancæcäimpa,
ante cædinque tömënäni tömengä ingante iimö
iñö iimö iñö næænte pö næænte pö cædinque
edæ Wængongui oncö ñænæncö boyæ yabædemö,
Wainemö, näni änemö yabæque cö cædönänimpa.

³ Iinque ñöwo Pegodo tönö Wäö Wængongui
oncö ñænæncönë yabæcönë pö guicæ cæda
adinque tömengä tömëna inate, Pönömïna æmoeda,
angantapa. ⁴ Angä ëñëningue Wäö tönö tömengä
ingante cöwä adinque Pegodoque apæncantapa.

—Mönatö imöñate ææmö ae.

⁵ Angä ëñëningue cömäwaingä, Botö imote
wabänö pönöna ænguïmo, ante pönëningue ææmö
ayongä ⁶ Pegodo iñömö,

—Quinö mämopa pönömo ænguïmii. Edæ oodo
incæ tigitamö incæ ömæpobo imopa. Wæætë
tæiyæ waëmö botö ewocadö ante bitö imite pönö
apænebo ate bitö æe. Näatadeta quëwengaingä

Itota Codito ëmöwo beyænque bitö dao dao goe, angacäimpa.

⁷ Äninque Pegodo cömäwaingä tömëmæ inö pædæ wææmpo bæi ongonte töö æmängä ate cömäwadingä önöwa tönö önoncaiwa tæi piñæwacä.

⁸ Ate iñontobæ ængæ gantite dao dao gocantapa. Ayæ Wäö tönö Pegodo miñæ Wængongui oncö ñænæncönë yabæcönë godongämæ go guidineque dao dao go togæi togæi godinque Wængongui ingante waa ate apænedinque, Wængongui, bitö cöwë waa pönï inömi inte pönö cæbi æmopa, ante nanguï apænecantapa. ⁹ Wængongui mänömaï waa cæcampa, ante nanguï pönï tededinque dao dao gocä adinque edæ tömänäni, ¹⁰ Æ, iingä iñömö, Pönömi æmoe pönömi æmoe, ante Wængongui oncö ñænæncö boyæ yabædemö, Wäinemö, mönö änemö gäänë mönö në änecöningä adocä ingampa. Ante adinque, Quinö bai cæte waa bacäi, ante ancai guiñente wægadänimpa.

Tadömöö yabætaa ongonte Pegodo apænecampa

¹¹ Mänii cömäwaingä iningä incæ Pegodo tönö Wäö inate winimä winimä cæcä adinque wadäni tömänäni guiñente wædinque Tadömöö yabætaa näni añömö pogodo ponte tömënäni weca guidänitapa. ¹² Guidäni adinque Pegodo, “Mini idægocabo ëñeedäni. Mönatö imönate quinate waa aminii. Mänömaï waa bawacä adinque edæ quinate guiñente wæminii. Mönatö edæ, Tömengä dao dao gocæcäimpa, ante cædinque tæiyæ waëmöna imönapa diyæ tæi piñænte cæquimönaa.

¹³ Abadäo wodi Itæca wodi Acobo wodi tömënäni,

Mönö Wængonguī inongä ingampa, ante nāni nē angaingä inte Wængonguinque cæcä ate waa bawacampa. Mönö wæmæidi Wængonguī incæ, Itota botö imote nē cædongä ñäo bai emõñongante tömengä ingante waa acædänimpa, ante mänömaī cæcampa. Adocä Itota ingante mīnitö iñömö, Wæñongæimpa, äñinque pædæ godömīnitapa. Ayæ Pidato, Ñimpo cæbo gocæcäimpa, ante apænte angä ate mīnitö wæætē Pidato weca ongöñinque adocä ingante ante Baa ämīnitapa. ¹⁴ Ñinque nē Tæiyæ Waemö inongä inte nö cæyongante mīnitö Baa äñinque wæætē nē wænöningä ingante ante äñinque, Ñingä ingante ñimpo cæbi pongæ, ämīnitapa töö. ¹⁵ Ñinque mönö quëwenguimämo nē pönongä ingante Baa äñinque mīnitö nē wænönimīni imīnīpa. Incæte Wængonguī tömengä ingante, Ñāni ömæmoe, angä ñāni ömæmongantapa. Ñinque tömengä ñāni ömæmongä nē adimöni inte mönitö, Æbänö cægacäimpa, ante adodö ante nē apænemöni imönīpa. ¹⁶ Adocä Itota emöwo ante apænemöna eñente pönëñinque mäningä cömawadingä mīni nē adingä iñömö ñöwo tæi piñæwacampa. Edæ Itota pönö cæcä beyæ mänīi onguīñængä nē pönengä badinque Itota emöwo beyænque ædæmö waa bawate tæi piñængä bacä amīnīpa,” ante Pegodo apænecantapa.

¹⁷ Ayæ godömenque apæñedinque Pegodo, “Ñöwo botö tönīñamīni eñëedäni. Mīnitö awënëidi eñënämaī nāni cæi bai cædinque mīnitö iñömö adobai, Æbänö nö cæquīi, ante eñënämaī inte cæmīnitapa, ante awædö. ¹⁸ Incæte mīnitö mänömaī eñënämaī cædinque Wængonguī beyæ

nē apænegaïnäni tōmänäni näni apænegaï bai do iinque cæminipa. Tömēnäni, Mönö Codito caate wæte wæncæcäimpa, ante näni angainö bai mīnitō cædi beyæ ñōwo iinque batimpa. ¹⁹ Iinque mīnitō wēnæ wēnæ mīni cædinō ante wæwente pōnente ñimpo cædinque wentamō mīni mongænō mīni ñä mēnongaquinque Wængonguï gämænō pōedäni. ²⁰ Mönö Awēnē weca mīni wampo pōnenguinque pōedäni. Ayæ Wængonguï, Mīnitō Codito poncæcäimpa, ante do nänō angaingä inongä inte Itota mīnitō weca poncæcäimpa, ante tōmengä gämænō pōedäni.”

²¹ “Incæte edæ, Tōmancoo do ingaï bai adobaï bacoocæimpa, ante Wængonguï badoncæcäimpa, ante tæiyæ waēmō ingainäni Wængonguï beyæ doyedē apænegadänimpa. Wængonguï mänömaï nänō badompoga Itota iñömō mänimpoga öönæde quēwencæcäimpa anguēnē. ²² Edæ Möitee wodi, ‘Botō wænte gobo ate mīnitō Awēnē Wængonguï wæatē mīnitō beyæ cædinque mīni cabo iñōmīnite adocanque ingante apænte Ao ante æncæcäimpa. Tōmengä ingante äninque, Möitee wodi botō beyæ nē apænecä ingaingä bai bitō adobaï edæ botō beyæ nē apænebi bacæbiimpa, ancæcäimpa. Wængonguï mönö Codito ingante mänömaï angä iinque tōmengä wæatē nē apænecä bagacäimpa. Iinque mīnitō iñömō tōmengä quiēmē ante apæneyongä ēamonca ongonte tōmänō ante eñencæminimpa. ²³ Iinque edæ mäningä Wængonguï beyæ nē apænecä ingante æcänō eñēnāmaï ina iñömō, tōmengä guidēnäni weca quēwēnāmaï edæ wæncæcäimpa,’ ante Möitee wodi

apænegacäimpa,” ante Pegodo apænecantapa.

²⁴ Ayæ apænedinque Pegodo, “Æpodänidö Wængongui beyæ nè apænegainäni inäni. Edæ tömënäni Tämöedo tönö ayæ pönäni tönö tömänäni adoyömö apænedinque Codito ñowoönæ nänö cädö ante apænegadänimpa. ²⁵ Ìninqe mīnitö guiquënë Wængongui beyæ nè apænegainäni wēmīni inōmīni inte tömënäni nāni angainö ante nè ænguīmīni imīnipa. Ayæ edæ Wængongui, Botö pönö cæbo ate Ao ämīni Ìninqe mönö godongämæ waa cæcäimpa, ante nänö angainö ante mīnitö edæ mīni quëwenguinque ëñente quëwencæmīnimpā. Abadäo wodi ingante apænedinque Wængongui, ‘Abadäo ëñemi. Mīnitö mīni quëwencabo tönö wadäni tömämæ quëwënäni nāni cabo nāni cabo tönö tömämīni iñōmīnite bitö Pæingä pönö waadete cæcä beyænque waa quëwëninque tocæmīnimpā,’ ante apænegacäimpa. ²⁶ Wængongui, Botö Wengä pönö aa pecä ëñëninque mīnitö wæætë wënæ wënæ cæte mīni gogainö ocæ ëmænte wadæ pöninque wæætë waa quëwenguinö cægöninque waa tocæmīnimpā. Ante cædinque tömengä täno mīnitö beyæ ante tömengä ingante nè cædongä mönö Codito ingante da pönongä pongacäimpa,” Ante Pegodo Ìninqe apænegacäimpa.

4

Pegodo tönö Wäo awënëidi weca gongænte apænedapa

¹ Pegodo tönö Wäo tömänäni inänite tæcæ apæneyöna wadäni tömëna weca mäo godongämæ pönänitapa. Ìnāni iñömö nè, Wængongui qui, ante

godönäni tönö Tadoteoidi tönö Wængonguï oncö ñænæncö ante nê wææ wänönäni awënë tönö mäninäni pongadänimpa. ² Itota ñäni ömæmongä bai mönö adobai ñäni ömæmongæimpa, ante Pegodo tönö Wäö apænedapa, ante do wædönäni inte tömënäni ñöwo pïinte mämö pönänitapa.

³ Pöningue tömënäni iñäna ñnate bæi ongönänitapa. Ayæ wëmö ba ñinque baänæ ate näna taquinque tömëna ñnate tee mönedäni guuidatapa. ⁴ Incæte tömëna äna nê eññänäni guiquënë pancadäniya nanguï ñnäni incæ nê pönänäni bagadänimpa. ñinque onguïñænäni näni nê pönencabo iñömö wodo tinco müido ganca ñnäni mänimpodäni bai bagadänimpa.

⁵ Baänæ ate oodeoidi awënëidi tönö tömënäni ñnante nê aadäni näni Picæncabo tönö nê odömönäni tönö Eedotadëe iñömö godongämæ ponte ongönänitapa. ⁶ Wængonguï qui, ante nê godongä ñænængä pöni Änato ponte a ongöñongä tömengä guidänäni Caiapato Wäö Adecantodo tönö wadäni tömengä guidänäni incæ tömengä weca godongämæ pö guidänitapa. ⁷ Pö guidique edæ Wäö tönö Pegodo ñnate tæcæguedë mämö gönönäni gongæñöna änanitapa.

—Minatö æcänö tönö tæi piñænte cæmina ate cömawadingä waa bawacantawo. Edæ æcänö emöwo apænete cæminäi.

⁸ Ante äñönäni Pegodo iñömö Wængonguï Tæiyæ Waëmö Önöwoca tönö apænedinque,

—Awënëidi imini eññedäni, nê aamini mini Picæncabo eññedäni. ⁹ Cömawaingä æbänö cæte waa bawacäi, äminitawo. Edæ cömawaingä ingante möna waa cædi beyænque minitö ñöwoönæ

pönö apænte ämīni awædö. ¹⁰ Īnīnque mīnitö tönö idægoidi wadāni tönö botö tōmāmīni ĩmīnite adoyōmō apænebo ēñencæmīnimpa. Itota Codito Nāatadeta quēwēningā ingante awæ ñænquedīmæ cæte mīni nē wænōningā ingante Wængonguī angā do ñāni ömæmongacāimpa. Tōmengā adocā Itota emōwo beyænque cōmāwaingā ĩningā tæi piñængā badinque mīnitö weca a ongongā apa ānewēmīnii. ¹¹ Edæ wainca nē mænōnāni nāni wido cædinca incæ wacā, Tæcæ manca pōni tæi manguimpa, ante cōnongampa. Itota ĩñōmō mānīnca bai ææmōnga pōni ongongampa.

¹² Īnīnque Itota, Quēwencæmīnimpa, ante mōnō ĩmonte ængā bai wacā ædö cæte adobai ænguingā. Itota emōwo beyænque quēwencæmīnimpa, ante pönö cægāingā ĩte Wængonguī wæætē, Wawo adobai ĩ, ante dicæ pönö cæcantawogaa. Īñæmpa ĩnguipoga tōmāmæ ĩñōmō edæ æcāmenque incæ adobai nē tæi piñænte emōnongā ĩñōmō edæ dæ angampa, ante apænedatapa.

¹³ Ayæ Pegodo tönö Wäö önōnaque ĩna ĩte nanguī adāmai ĩna incæte edæ guññēnāmai edonque apænedapa, ante adinque tōmēnāni, Æbānō cæte edæ do ēñēnatawoo, ante wædinque, Itota miñæ nē godina ĩte do ēñēnapa. Nāwangā ĩmpa, ante wædānitapa. ¹⁴ Edæ cōmāwadingā ĩningā tōmēnāni weca a ongongā adinque tōmēnāni ædö cæte wadö ante tedequinānii. ¹⁵ Īnīnque tōmēna ĩnate, Mōnitö godongāmæ Apænte Äincabo weca ongōnāmai godōmenque goeda, ānāni goda ĩnīnque, Tōmēna ĩnate æbānō cæquīi, ante pōnēninque godongāmæ tedecōnānitapa. ¹⁶ Īīmai

ante apænedänitapa.

—Mänina inate quinö cæquimöo. Ìñæmpa tömëna tæi piñænte bamönengæ cædatapa, ante Eedotadëe quëwënäni, Näwangä impa, ante tömänäni do ëñënanipa. Ìninqe, Waa cædämaï inatapa, ante mönö ædö cæte anguii. ¹⁷ Incæte mäninö näni apænedö ante wadäni wii godömenque ëñencædänimpa, ante wææ cædinque mönö tömëna inate wææ angæimpa. Mänii ëmöwo ante minatö mina wæquinque apænemina. Wacä æcämenque ingante apænedämaï imæweda, ante mönö wææ angæimpa, ante nämäneque tededänitapa.

¹⁸ Ayæ iinque tedinque Wäo tönö Pegodo inate añete mämönäni pöna adinque tömëna inate wæætë, Ëñenguënë quëwëmïnaa, änänitapa. Edæ mina panguinque ante Itota ëmöwo ante apænemina. Ìncayæ ate tömengä ëmöwo ante apænedinque edæ adopoque incæ odömönämaï imæweda. ¹⁹ Ante añönänite Pegodo tönö Wäo wæætë,

—Ìñæmpa æcänö ingante ëñente cæquimöna, ante pönëminii. Minitö änö ëñëninque wæætë Wængongui nänö änö ëñënämaï inte cämöna adinque Wængongui edæ, Nö cämïna abopa, anguingä. ²⁰ Edæ möna adinö ante möna ëñënö ante ædö cæte apænedämaï inguimönaa.

²¹ Ante apæneda ëñente wædinque awënëidi wæætë, Mini panguinque, ante ancaa apænedänitapa. Incæte wadäni, Cömälingä ingante Wængongui waa pönï cæcantapa, ante watapæ apænedäni ate wædinque awënëidi wæætë Wäo tönö Pegodo inate pancæte ante

cædinäni inte, Iñæmpa waodäni püinäni inique mönö æbänö cæte panguimöö, ante guiñente wædinque pänämaï inte ñimpo cædäni godatapa. ²² Edæ waa nē bawadingä iñömö do coadenta wadepo ayæ godömenque tömengä nänö eñadi iñonte Wængongui bamönengæ cæcä waa bacä adinque tömänäni ædö cæte wadö ante pönenguinänii.

Wede pönente tæi piñænte cæcæmönimpa, ante Wængongui ingante apænedänipa

²³ Mänii ñimpo cædäni godinque Pegodo tönö Wäö iñömö tömäna tönö godongämæ pönänäni weca ponte apænedinque, Wængongui qui, ante nē godönäni ñænænäni tönö nē aadäni näni Picæncabo iñömö mönatö imönate iïmaï änäni wætämönapa, ante tömänö ante adodö ante apæneda. ²⁴ Eñëninque tömënäni näni pönencabo adoyömö pönëninque Wængongui ingante adotedæ tedete apænegadänimpa. “Awënë Wængongui eñëmi. Tæiyæ Awënë inömi inte bitö öönæ owocoo tömancoo inguipoga tömämæ gäwapæntibæ tömämæ badöninque öönæde owodäni yæipodë quëwënäni gäwapäa owodäni æyömömë quëwënäni tömänäni inänite bitö adobique badongabiimpa. ²⁵ Inique mönitö mæmæ Dabii wodi ingante apænedinque bitö, Dabii eñëmi, Bitö botö imote nē cædömi iñömite botö Tæiyæ Waëmö Önowoca apænecä eñëninque bitö wæætë iïmaï ante apænecæbiimpa.

Wadäni nē eñënämaï inäni incæ quinante ængui badinque wido cæcæte ante cædänii.

Waodäni näni cabo waodäni näni cabo incæ
idiquibæ ante quinate pönänitawo.

²⁶ Inguipoga awënë odeyeidi, Wido cæcæimpa,
ante tæi gongænte ongönänpa.

Pancabaa awënëidi adobaï, Æbänö cæquimöö, ante
godongämæ pönëninque

mönö Awënë ingante ayæ tömengä nänö nē
öni pæcadongä Codito ingante piinte
änewänänpa töö,' ante apænebi ëñëninque
mæmæ Dabii wodi wæætē bitö beyæ
apænegacäimpa.”

²⁷ Ante Wængonguï ingante apænedinque
ñowodäni näni pönencabo godömenque
apænedänitapa. “Wængonguï ëñëmi. Tömëmi
Wengä bitö Tæiyæ Waëmö inongä iñongante
bitö, Botö imote nē cæbi bacæbiimpa, ante öni
pæcagabiimpa. Näwangä impa. Incæte bitö imite nē
cædongä iñongante Itota bitö nē öni pæcadongä
ingante edæ Edode tönö Pontio Pidato tönö
idægoidi tönö wadäni tönö piinte adoyömö ponte
möni quëwëñömö incæ ongöninque bitö imite nē
cædongä ingante, Æbänö cæte wido cæquiï, ante
do cædänitapa. ²⁸ Edæ bitö tæi piñæmi inömi inte
nämä pönëninque edæ, Iïmaï baquinö angüenë,
ante do angabiimpa. Tömënanï guiquënë bitö
angainö baï wæætē cædinque piinte pö gongænte
cædänitapa. ²⁹ Nöwo iñömö bitö imite nē cæmöni
iñömönite ñowodäni pönö piinte änäni ate wædinque
bitö wæætē pönö cæbi ate mönitö tæi piñæninque
bitö änö ante guiñënämaï apænecæmönimpa.
³⁰ Ayæ nē wënæ wënæ inäni inänite bitö önompoca
pönö gampobi ate waa bacædänimpa, ämönipa.
Ayæ bitö Wengä Itota Tæiyæ Waëmö iñongante

mönitö tömengä ëmowo apænedinque, Wadäni pönencädänimpa, ante mä cædinque bamönengæ cæmöni adinque tömënäni guiñente wæcädänimpa ämönipa,” ante Wængonguï ingante apænedänitapa.

³¹ Ìnque apænedäni ate tömënäni näni godämæ ongöñömö incæ iñontobæ ocæ ocæ cætapa. Cæyö tömänäni inänite Wængonguï Tæiyæ Waëmö Önöwoca pö guicä æninque ædæmö ewocadinque tömënäni Wængonguï nänö änö ante guiñenedämaï inte edonque apænegadänimpa.

Tömämö mönö quincöo impa, ante cædänipa

³² Ayæ tömänäni näni pönencabo incæ tömënäni näni ewocadö adodö ewocate bai inäni inte mimönë adodö ante pönëninque tömënäni ëadincoo incæ, Botö quï impa, ante änämaï inäni inte, Tömämö mönö quï impa, ante pæ gompodämaï inönänimpa. ³³ Ayæ Itota nänö da godongainäni iñömö tæi piñænte apænedinque, Itota Codito ñäni ömæmongantapa, ante cöwë näni apænedi bai apænedönänimpa. Edæ Wængonguï tömënäni inänite waadete pönö cæcä ate watapæ quëwënönänimpa. ³⁴ Ayæ tömënäni näni cabo incæ æcämenque ömæpocä i iñömö edæ dæ angantapa. Edæ ömæ näni ëadi incæ godonte æninque oncö mænonte näni ëadi incæ godonte æninque tömënäni näni godonte æninta ænte pöninque ³⁵ Itota nänö da godongainäni weca ænte mämö ñö cædäni æninque tömënäni wæætë ömæpodäni inänite godönäni eyepæ eyepæ ænönänimpa. ³⁶ Ìninque Itota nänö da godongainäni iñönäni adocanque Debiï wodi pæingä Ootee ingacäimpa. Tömengä iñömö, Wadäni wampo

pönente quëwencædänimpa, ante nē ædæmō apænedongä iñongante wadäni tōmengä ingante Bedēnabee ante pönō pemongadänimpa. Íngä Ootee Bedēnabee näni pemöningä iñömō Tipidebæ quëwente pöningä inte edæ, ³⁷ tōmengä ömæ ëadī godonte æninque tōmengä nänō godonte æninta Itota nänō da godongainäni weca mämō ñō cægacäimpa.

5

Änäniya tönö Tapidæ

¹ Mäniñedē Änäniya näni änogä tōmengä nänöogængä Tapidæ tönö tōmēnāni näni cæi bai cædinque ömæ nāna ëadīmæ godonte ænatapa. ² Ayæ nänöogængä ëñëñongä tōmēna godonte nāna æninta incæ Änäniya iñömō pancataa pæ gompote æninque wæætē pancataa ænte mämō Itota nänō da godongainäni weca ñō cæcantapa. ³ Ñō cæcä adinque Pegodo,

—Änäniya ëñēmi. Tatāna ingante ædæmō entawēmi inte ömæ beyæ bitō æninta pancataa, Botō quī, ante awēmō ñō cædinque edæ pancataa ænte mämō ñō cædinque bitō, Tōmanta impa, ante quīmæ änewēē. Iñæmpa, babæ cædīmi inte bitō Wængonguī Tæiyæ Waēmō Önöwoca ingante babæ ämipa töö. ⁴ Edæ bitō ömæ ini incæ bitō quī cōwē intapa. Ayæ ñöwo mäninta æninque, Æbänö cæquī, ante tōmēmi nē ämi ïmitapa. Íninque edæ mīmōno pönēninque quīmæ wapiticæ cæbitawo. Bitō mänömaī cædinque waodäni inänite wīi

babæ apænedinque Wængonguī ingante babæ apænebitapa töö.

⁵ Angä eñente wædinque Änāniya iñömö tæ wæente æmæwo wængantapa. Wængä adinque tededäni eñëninque tömänäni guñente wædänitapa.

⁶ Wængä ininque edëninäni ponte wīni caate nææente mǎo daga wënänitapa. ⁷ Dobæ wængä ate todee ooda go ate tömengä æbänö wængä ante eñënämaī iningä inte tömengä nänöogængä incæ pö guicä. ⁸ Adinque Pegodo tömengä ingante,

—Apænebi eñëmoe. Mīnatö ömæ godöninque mänimpota æmīnatawo. Äñongä,

Ao, mänimpota.

⁹ Angä eñëninque Pegodo wæætë,

Mīnatö iñæmpa edæ guëa pönëninque, Mönö Awënë Önöwoca æbänö panguingää, ante quimæ cæmīnatawo. Edæ bitö nänöogængä baö inī nē daga wëninäni incæ do dao dao pönäni eñëmii. Edæ bitö baö adobaī ænte gocædänimpa töö.

¹⁰ Tæcæ ante äñongä onquiyængä iñömö tömengä önöwa gäänë tæ wææninque näñe wængantapa. Wængä ate mänii edëninäni pö guiite ayönäni dobæ wæente a öñongä adinque tömengä baö inī æninque tömengä nänöogængä wodido gäänë mǎo daga wënänitapa. ¹¹ Mänömaī näñe wænapa, ante tededäni eñëninque Codito ingante nāni nē godongämæ pönencabo tönö wadäni tömänäni ancai guñente wægadänimpa.

Ate eñencædänimpa, ante bamönengæ nanguī cædänipa

¹² Mäniñedë Itota nänö da godongainäni iñömö Wængonguī Önöwoca tönö cædinque, Ate

pönencädänimpa, ante wadāni ayönāni mā cædinque bamönengæ nanguï cædönänimpa. Ayæ adoyömö pönëninque tömänāni Wængonguï oncö Tadömöö yabæcönë nāni ānoncönë pö guii pö guii cædönänimpa. ¹³ Wadāni tömēnāni inānite adinque, Nē pönēnāni waa quēwēnāni inānipa, ante pönēnāni incæte guĩñente wædinque godongāmæ pö guiidāmaï gomö adönänimpa. ¹⁴ Pancadāniya guiquēnë onguĩñænāni tönö onquiyænāni tönö nanguï ināni mönö Awēnë ingante ñowo pönēnānitapa. Īnāni iñömö do pönēnināni tönö adocabodāni bacoo ināni bagadänimpa. ¹⁵ Īninqe mänī bamönengæ cædāni adinque wadāni wēnæ wēnæ ināni inānite ænte pöninque möimoga möincodë ñö cædänitapa. Edæ, Pegodo nænque pämo wodo pänta goyongä tömengä gänëñömö öñöninque adocanque adocanque waa bacædänimpa, ante cædinque Pegodo nänö goquïnö ante ænte mämö ñö cædāni öñönānitapa. ¹⁶ Ayæ adobaï Eedotadëe eyequeï wayömö nāni quēwēñömö wayömö nāni quēwēñömö quēwēninque wadāni wēnæ wēnæ ināni inānite næænte mämö næænte mämö cönönāni ate tömänāni waa badänitapa. Ayæ wēnæ nē wentamö ewocadāni inte yewænte wæwēnāni inānite adobaï ænte mämö pöninque waa badänitapa.

Itota nänö da godongaināni inānite piinte tee mönedänipa

¹⁷ Wængonguï qui, ante nē godongä ñænængä pönī inongä tönö wadāni tömengä tönö godongāmæ cædāni incæ Tadoteoidi inönāni inte, Nāni ömæmönāmaï ingæimpa, ante nē pönēnāni

inōnānimpa. Īninqe Itota nānō da godongaināni mǎnōmaī waa cǣdāni ate wǣdinqe awēnē tōnō Tadoteoidi iñōmō tōmēnāni inānite piinte agadānimpa. ¹⁸ Īninqe Itota nānō da godongaināni inānite yao ongonte æninqe tōmānāni ayōnāni tee mōnedānitapa. ¹⁹ Tee mōnedāni wǣcōñōnānite Wǣngonguī anquedo woyowotæ ponte odemō wi ænete mantacā tayōnānite apǣnecantapa. ²⁰ “Goedāni. Wǣngonguī oncō ñænæncō yabæcōnē go guiite næ gongæninqe mīnitō māniñōmō pōnāni inānite apǣnedinqe, Wǣngonguī pōnō cǣcā beyænque mōnō quēwengæimpa, ante ædæmō apǣnemīni eñencǣdānimpa.” ²¹ Angā eñente cǣdinqe tōmēnāni baōnæ ñāō bayonte Wǣngonguī oncō ñænæncō yabæcōnē do go guidinqe odōmonte apǣnedāni eñēnānitapa.

Mǎnōmaī do go guiite apǣnedānipa, ante eñēnāmaī ināni inte edæ, Wǣngonguī quī, ante nē godongā ñænængā pōni inongā guiquēnē tōmengā tōnō godongāmæ cǣdāni tōnō adoyōmō pō guidānitapa. Pōninqe tōmēnāni idægoidi inānite nē aadāni Picænāni godongāmæ nāni Apǣnte Änoncabo tōmānāni inānite añete pōnānitapa. Īnāni wǣætē tontadoidi awēnēidi inānite āninqe, Mīnitō tee mōneincōnē gote Itota nānō da godongaināni inānite añete māmōmīni poncǣdānimpa. ²² Änāni tee mōneincōnē gote ayōnāni edæ dæ ānāni ante wǣdinqe wǣæ wānōnāni awēnēidi gode ancæ pōninqe, ²³ iīmaī ante apǣnedānitapa.

—Gote ayōmōni oncō ædæmō tee mōnete in-tapa. Ayæ tontadoidi odemō pōni a ongōnāni adinqe mōnitō go wi ænete guiyōmōni edæ dæ

änäni ate wædinque wadæ pömönipa. ²⁴ Ante ted-
edäni eñëninque, Wængongui qui, ante nē godönäni
ñænænäni tönö Wængongui oncö ñænæncö ante
nē wææ wänönäni tæiyæ awënë tönö guiñente
wædinque, Ñöwo quiëmē bai bacæimpa. ²⁵ Ante
wæyönäni wacä do pö guiddinque tömënäni inänite,
—Aquënë quëwëmini. Mäninäni mīni tee
mönedīnāni incæ Wængongui oncö ñænæncö
yabæcönē go guiite a ongöninque mänīñömö
pönäni inänite odömönte apænedäni eñënäni
ataqueedäni.

²⁶ Ante apænecä eñente wædinque wææ
wänönäni awënë tömengä nänö wææ wänoncabo
tönö Itota nänö da godongainäni inänite æncæ
godinque, Godongämæ ongönäni incæ piinte
tacadäni wæcæ wæ, äninque pänämaī inte ee ænte
pönänitapa. ²⁷ Ænte pöninque nē aadäni Picænäni
godongämæ näni Apænte Änoncabo weca ænte
mämö gönönäni gongæñönänite, Wængongui qui,
ante nē godongä ñænængä pönī inongä iñömö
tömënäni inänite angantapa.

²⁸ —Mäningä Itota emöwo apænedinque
wadäni inänite odömönämaī imæwedäni, ante
ancaa antamönipa töö. Incæte mīnitö mänīne
mīni odömönte anewënö ante Eedotadëe tömäo
odömönte apænemīnipa. Ayæ godömenque
tedewëninque mīnitö, Mäningä nē wængaingä
ingante awënëidi nē wënæ wënæ cædinäni inänipa,
ante mönitö imönitedö ante anewëminipa töö.

²⁹ Ante nē ñænængä pīiñongä Pegodoidi wæætë,
—Mönitö quiquënë waomīni imīnite
eñënämaī inte Wængongui ingante eñente
cæquënëmöni imönipa. ³⁰ Mīnitö Itota ingante

ñænquedimæ timpote wænömīni wængä ate mōnō wæmæidi Wængonguī incæ angä ñāni ömæmongantapa. ³¹ Ayæ nē ñāni ömæmōningä ingante apænedinque Wængonguī, Bitō, Quëwencæðänimpa, ante nē Æmi bacæbiimpa, angacäimpa. Nē Æmi iñōmite idægoidi tōmänāni, Idæwaa wënæ wënæ cæte quëwente awædō, ante botō gämænō poncæðänimpa, ante cæcæbiimpa. Bitō æmi beyænque botō tōmēnāni inānite pōnō waadete ñimpo cæcæboimpa. Ante cædinque edæ Itota nānō Awēnē baquinque Wængonguī æmonga ænte mæicä æidinque Wængonguī tōmēmæ inō tæ contate ongongampa. ³² Itota ingante Wængonguī ænte mæicä æigacäimpa, ante nē adimōni inte mōnitō mäninō ante nē apænemōni imōnipa. Ayæ nē eñēmō cæmō iñōmonte Wængonguī tōmengä Tæiyæ Waēmō Önōwoca ingante da pōnongä ænte ewocamompa. Tōmengä Önōwoca adobaī mōnitō tōnō godongämæ nē apænecä ingampa, ante Pegodoidi apænedänitapa.

³³ Mänōmaī apænedāni eñëninque awënëidi ænguī badinque tōmēnāni inānite edæ wænoncæ cæðänitapa. ³⁴ Mäniñedē adocanque Paditeocä incæ tōmengä emōwo Gämadiedo tōmēnāni nāni wææ angainō ante nē eñengä iñongante tōmänāni tōmengä ingante waa adōnänimpa. Ìninque tōmēnāni nāni Apænte Äincabo wænoncæ cæyōnāni mäningä iñōmō tōmēnāni nāni nē waadecä inongä inte ængæ gantidinque, Itota nānō da godongaināni inānite oncodo mantamīni wantæ ongoncæðänimpa. ³⁵ Angä dæ godāni ïninque Gämadiedo wæætē awënëidi inānite

apænecantapa.

—Idægoidi eñeedäni. Mäninäni inänite æbänö cæquii, ante ædæmō pönente ate edæ ee cæedäni. ³⁶ Edæ doyedē wacä Teodo adobaingä ængæ gantidinqe, Botö nē nangui cæbo imopa, ante añongante edæ tömengä miñæ coatodo tiento ganca inäni godänitapa, ante pönëedäni. Tömengä ingante wadäni māo wænönäni wængä ate tömengä emiñæninäni wæætē nāwæ godäni ate edæ dæ batimpa. ³⁷ Ayæ ate edæ awënë, Minitö emōwo ponte yewæmoncæminimpa, ante nänö aniñedē wacä Gadideabæ quëwëningä Oodaa adobaï awënë ingante wido cæcæte ante ængæ gantiyongä nangui inäni tömengä miñæ goyönäni tömengä ingante wænönäni wængä ate nāwæ adobaï gogadänimpa. ³⁸ Ìninqe, Mänömaï batimpa, ante pönente cæedäni. Nöwo iñömö iinäni adobaï ængæ gantidäni adinqe mīnitö tömënäni inänite ee ate gomō aedäni ämopa. Tömënäni waodänique inte cædäni baï ædö cæte cæquinänii. Edæ dæ bacæimpa. ³⁹ Wæætē Wængongui angä eñente cædäni baï mīnitö ædö cæte Baa ante wido cæquimīnii. Edæ mīnitö mänömaï cædinque Wængongui ingante pūmīni inte wæbaïmīnipa.

Ante wææ angä eñente wædinque Ao ante tömengä nänö änö baï cædänitapa. ⁴⁰ Itota nänö da godongainäni inänite aa pedäni pönäni ate awënëidi, Pædäni, änäni eñëninque nē wææ wänönäni æmontaimenca tæi tæi pänänitapa. Ayæ awënëidi godömenque, Itota emōwo ante apænedämaï imæwedäni, ante äninque Itota nänö da godongainäni inänite ñimpo cædäni godänitapa.

41 Nē Apænte näni Äincabo weca ongonte tao godinque tömēnāni wæætē, Wængonguī mōnō imonte adinque, Botō Wēñængä émōwo beyæ wadāni wēnæ wēnæ änāni ate mīnitō eyepæ inte caate wæcæmīnimpa, ante do cæcampa, ante pōnēninque edæ nanguī togadānimpa. 42 İninque Wængonguī oncō ñænæncō yabæcōnē incæ waodāni oncōnē incæ tömēnāni ñimpo cædāmaī inte cōwē go guī go guī cædinque cōwē odōmonte apænedinque, Itota tömengä näwangä mōnō Codito ingampa, ante watapæ apænedāni ēñengadānimpa.

6

Ticete ganca ināni nē nēnempodāni badānipa

1 Itota ingante nē tee empote quēwēnāni māññedē nanguī ināni badāni ate pancadāniya guidiego tededō nē tededāni iñōmō ebedeo tededō nē tededāni inānite pīnte āninque, Mīnitō mīni cabo owæmpoīnāni inānite iimō iñō iimō iñō cænguī eyepæ godōninque mōni cabo owæmpoīnāni inānite pōnōnāmaī imīnipa tōō, ante änāni. 2 Itota nānō nē da godongaināni iñōmō dote ganca ināni iñōnānite wadāni, Dote inānipa, ante pemonte baī apænedōnānimpa. İñāni iñōmō guidiegoidi mānōmaīnō ante wædānipa, ante ēñente wædinque wadāni Itota ingante nē tee empote quēwēnāni inānite aññete godongāmæ pōnāni ate tömēnāni inānite,

—Wængonguī nānō apænedō ante nē apænequēnēmōni inte mōnitō ædō cæte mōni cæquēnēnō ante ñimpo cædinque cænguinque ante godonguimōnii. 3 İninque botō tōññamīni

ēñēdāni. Mīni pōnencabo nāmā cōwā adinque, Æcānō æcānō Wængonguī Ōnōwoca tōnō āawocaque bai ēwocate nō cædāni inānii, ante adinque mīnitō tiæte ganca ināni mānimpodāni inānite apænte æedāni. Apænte æmīni adinque mōnitō tōmēnāni inānite, Cænguī nē godōmīni bacæmīnimpa, āmōni ēñente cæcædānimpa. ⁴ Mōnitō wæætē Wængonguī ingante cōwē apænedinque Wængonguī nānō apænedō ante godōmenque odōmonte apænedinque mānīnonque cæte quēwencæmōnimpa.

⁵ Mānōmaīnō ante ēñēninque tōmēnāni nanguī ināni inōnāni inte tōmānāni Ao ante edæ, Īināni mānōmaī inānipa, ante adinque iūmaī ēmōnāni inānite apænte ængadānimpa. Adocanque Etebā nē wede pōnengā inte Wængonguī Tæiyæ Waēmō Ōnōwoca tōnō āawocaque bai ēwocacā inongāimpa. Tōmengā tōnō Pedipe, Podocodo tōnō Nīicānodo, Timōnō tōnō Padōmēna, ayæ Antioquiya iñōmō nē quēwēningā Nīicodato. Īingā iñōmō oodeoidi nāni pōnēnō bai pōnengā inte do oodeo bai bacā inongāimpa. Mānimpodāni inānite apænte ænānitapa. ⁶ Apænte æninque Itota nānō nē da godongaināni weca ænte māmō gōnōnāni ongōñōnānite iināni iñōmō, Mīnitō nē godōmīni bacæmīnimpa, ante cædinque tōmēnāni inānite gampodinque Wængonguī ingante apænedānitapa.

⁷ Īininque Wængonguī nānō apænedō ante gode ā gode ā cædinque māo apænedāni ēñēnōnānimpa. Īininque Eedotadēē iñōmō Codito miñæ nāni tee empote quēwencabo tæiyænāni yebænte bagadānimpa. Wængonguī quī, ante nē godōnāni

incæ adobai nangui inäni wede pönëninque eñente bagadänimpa.

Etebä ingante bæi ongönänipa

⁸ Etebä iñömö Wængongui waadete pönö cæcä ate tæi piñænte ewocadongä inte bamönengæ nangui cædongäimpa. Ayæ, Cæbo ate pönencædänimpa, ante mä cæcä adinque godongämæ ongönäni pancadäniya, Æbänö cæcää, ante wædänitapa. ⁹ Wadäni guiquënë Etebä tönö guëa wæætedö wæætë ancæte ante cædänitapa. Iñäni iñömö oodeoidi inönäni incæ pancadäniya Tidënebæ quëwëninäni iñönäni pancadäniya Adecantodia iñömö quëwëninäni iñönäni pancadäniya Tiditiabæ quëwëninäni iñönäni pancadäniya Atiabæ quëwëninäni inönänimpa. Tömënanäni doyedë wadäni inänite nê cægäinäni inönäni inte ñowo abæ tawænte godinäni inönäni inte godongämæ pöninque adocabodäni bai badinäni inönänimpa. Tömënanäni odömöincö ante, Möni nê Abæ Tawænte Gocabo Odömöincö impa, ante pemönönänimpa. Iñinque tömënanäni pancadäniya Etebä ingante wæætedö wæætë ante cæyönäni, ¹⁰ tömengä nê nö eñënogä inte Wængongui Önöwoca tönö godongämæ apænecä eñëninque tömënanäni, Æ mönö wæætë ædö cæte wææ anguii, ante wædänitapa.

¹¹ Iñinque nê wæætedö wæætë änäni adodäni incæ wadäni inänite godö awëmö änänitapa. Minitö babæ ante i incæte, Möitee wodi ingante ante Etebä godö wënæ wënæ apænecä eñëntamönipa, ante önonque äedäni. Ayæ Wængongui ingante adobai tömengä godö wënæ wënæ ante babæ

apæ necä eñentamönipa töö, ante incæ äedäni, ante nē abæ tawænte godināni änānitapa. Mänömainö änāni Ao ante tömēnāni näni angainö bai cædinque Etebä ingante ante babæ ante pīinānitapa. ¹² Mänömainö ante babæ ante pīināni eñēninque wadāni önönānique incæ nē aadāni näni Picæncabo incæ nē odömönāni incæ tömānāni ænguī badānitapa. Mänömai ænguī badinque tömēnāni Etebä wodi ingante bæi ongonte nē Apænte näni Äincabo weca ænte mao gönönāni ongongantapa. ¹³ Pancadāniya Etebä ingante ante babæ apænedinque iīmai änānitapa. İngä iñömö ñimpo cædāmai inte cōwē Wængonguī oncö tæiyæ waēmö oncö iñonte wiwa tedewēninque tömengä godömenque Möitee wodi nānō wææ angainö ante godö wiwa ante babæ apæ necä eñentamönipa. ¹⁴ İñömö oncö ante apænedinque adocä Etebä iñömö, Itota Näatadeta nē quēwēningä iī oncö bæ tadete wido cæcæcäimpa, ante anewengampa. Ayæ adocä Itota iñömö, İīmai cæedāni, ante Möitee wodi nānō wææ angainö ante Ao änāmai inte edæ, Wadö ante cæquēnēmīni iminipa, ante odömongampa, ante İngä Etebä iñömö adobai anewengä eñentamönipa töö, ante babæ apænegadānimpā.

¹⁵ Mänömai babæ apænedāni eñēninque nē Apænte näni Äincabo incæ Etebä ingante cōwä ayönāni tömengä awinca Wængonguī anquedo nānō emönö bai emongä agadānimpā.

7

Etebä nämä wææ apæ necampa

1 Ìninque, Wængonguï qui, ante nē godongä ñænængä pōni inongä iñömō Etebä ingante äninque, Bitō ìmitedō näni äninō näwangä intawoo.

2 Äñongante Etebä wæætē iïmaï ante nämä wææ apænecantapa. “Botō wæmpoidi eñeedäni. Botō tōniñamini eñeedäni. Mönō wæmæ Abadäo wodi Mëetopotämiabæ ayæ quëwëninque Cadäna iñömō ayæ quëwencæ godämaï iñongante Wængonguï nē ñäo apäite bai ëmönongä inte Abadäo weca ponte a ongongä agacäimpa. 3 Ayæ Abadäo ingante apænedinque Wængonguï, ‘Bitō guidënäni inänite ëmō cæte bitō ömæ ëmō cæte godinque wabæca botō odömonguïmæca æmæwo wadæ goe,’ angacäimpa. 4 Angä eñente cædinque Abadäo wodi mänïömæ Cadeabæ ëmō cæte wadæ godinque Cadäna näni quëwëñömō ganca pōninque quëwengacäimpa. Ayæ tömengä wæmpo wodi wængä ate Wængonguï tömengä ingante angä eñëninque Abadäo iïmæca mönō ñöwo quëwëmæ ponte quëwengacäimpa.”

5 “Incæte Wængonguï, Tömëmi ömæ, ante Abadäo wodi ingante cabo incæ ömæ pönönämaï ingacäimpa. Wæætē Abadäo wodi wëñængä mæmpo inämaï iñongante Wængonguï, iïmæ incæ bitō ænguïmæ iñonte bitō pæinäni adobæ tōmäo quëwencädänimpa, ante odömongacäimpa. 6 Ayæ godömenque apænedinque Wængonguï, Bitō pæinäni iñömō wabæca gote mänimæ quëwënäni weca quëwëñönänite iïnäni wæætē bitō pæinäni inänite edæ ö ænte bai cædinque, Mönitō beyænque cæedäni, ante nanguï änäni wæcädänimpa. Ayæ tömënäni nempo wantæpiyæ coatodo tiento wadepo ganca mänimpoga quëwëñönänite adodäni

wënæ wënæ cædäni beyæ caate wæcædänimpa.
 7 Ante Wængonguï godömenque apænedinque,
 ‘Bitö pæinäni inänite në ö ænte wënæ wënæ cædäni
 inänite botö wæætë apænte äninque pancæboimpa.
 Ayæ iincayæ ate bitö pæinäni mänïömæ tömënäni
 näni caate wædiömæ emö cæte wadæ pöninque
 iimæca wæætë pöninque botö Wængonguïmo
 iñömote botö beyæ cæquïnäni inänipa.’ 8 Äninque
 Wængonguï, Mönö godongämæ cæcæimpa, ante
 pönö cæbo ate mïnitö wæætë Ao ante eñente
 cæcæmïninpa. Mänömaï ante cædinque mïnitö
 onguïñæmïnique eö togænte caate wædinque
 eñencæmïninpa. Angä eñëninque Abadäo wodi
 wëñængä Itæca eñacä ate tömengä nänö eñadi
 adoque Wængonguï itædë go ate tömengä ingante
 eö togængacäimpa. Itæca wodi pæte wææ Aacobo
 wæmpo bagacäimpa. Aacobo wodi pæte wææ dote
 ganca inäni tapæicä wææ mönö wæmæidi wodi
 baquinque pægädänimpa.”

9 Ante apænedinque Etebä godömenque,
 “Mäninäni mönö wæmæidi ingainäni iñömö
 tömënäni biwi Ootee ingante ante adinque piinte
 wædinque tigitamö beyænque pædæ godönäni
 ö æninque Equitobæ ænte mäodäni gogacäimpa.
 Equitobæ pöninque tömënäni godonte æncæte ante
 cædinque Ootee wodi ingante mänïñömö quëwengä
 nempo pædæ godönäni awënë beyænque cæte
 quëwengantapa. Mänömaï quëwengä incæte
 tömengä tönö godongämæ Wængonguï cöwë
 cægacäimpa. 10 Ìninque Ootee wodi ingante
 nangü wiwa cædäni wæyongante Wængonguï cöwë
 wææ aacä quëwengacäimpa. Ayæ Wængonguï

pönō apæ necā eñēninque nē eñēnte bayongante Equitobæ tæiyæ awēnē Padaönō incæ tōmengā ingante waa adinque, Botō tæiyæ awēnē imo bai bitō wodo adobai badinque Equitobæ wædænque awēnē bacæbiimpa. Ayæ adobai botō awēnē onconcoo bitō aacæbiimpa, angacäimpa.”

¹¹ Ante apæ necā eñēñönāni Etebā godōmenque, “Māniñedē Equitobæ tōmāo Cānaāmæ tōmāo to aminte bayonte tepæmpo gæwænte wædönānimpa. Mönō wæmæidi cænguī æncæte ante cædinque ænāmaī inönānimpa. ¹² Īninque, Equitobæ cænguī ayæ mæ õñompa, ante tededāni eñēninque wæmpocā Aacobo wodi mönō mæmæidi nē baquināni inānite āninque, Botō wēmīni, Equitobæ godinque cænguī ænte pōedāni, angā mā gogadānimpa. ¹³ Gote pōninque ayæ wæætē mempoga gote a ongönāni adinque Ootee wodi incæ tōmengā mēmōidi inānite, Botō mīnitō biwīmo eñagaimō imopa, angā wægadānimpa. Ayæ, Ootee guidēnāni do pönānipa, ante tededāni eñēninque awēnē Padaönō ingante gode ānāni edonque eñengacäimpa. ¹⁴ Ayæ ate Ootee wodi tōmengā wæmpo Aacobo wodi nāni pæincabo tetenta i tinto ganca mānimpodāni añecā gogadānimpa. ¹⁵ Aacobo wodi mānōmaī Equitobæ gote quēwēninque wængacäimpa. Ayæ tōmengā pæināni wææ mönō wæmæidi ingaināni inte adobai māniñömō gote quēwente wængadānimpa. ¹⁶ Abadāo wodi wēēnēñedē, Mōnitō wodido, ante Caāmōdo wēnāni nāni ānimpota mānimpota godonte æninque Tiquemō iñömō omæ godonte ænongäimpa. Ante do againāni inte mönō wæmæidi ñowo Aacobo wodi bayetoca ingai Cānaāmæ ænte pōninque, ayæ

iincayæ ate wææ tōmengä wēnāni bayetoca ingai Abadäo wodi nānō ængaimæ tōmēnāni wodido ingaiñōmō māmō daga wengadānimpa.”

¹⁷ Ante apænedinque Etebä godōmenque apænecantapa. “Abadäo wodi ingante Wængonguī wēenēñedē nānō, Botō wantæpiyæ ate bitō pæināni inānite adodō ænte māmōmo poncädānimpa, ante nānō angaiñedē wodo iinque bayonte tōmēnāni Equitobæ quēwēninque nanguī bacoo yebænte bagadānimpa. ¹⁸ Māniñedē wacā onguiñængä ñōwocā incæ, Ootee wodi æcānō ingacāi, ante ēñēnāmaī inongä inte Equitobæ awēnē bagacāimpa. ¹⁹ Tōmengä iñōmō mōnō guidēnāni wodi inānite wapiticæ ante wēnæ wēnæ cægacāimpa. Tōmengä, Minitō wēñænāni tæcæ ēñadāni inānite wido cædāni, ante piingä ēñente wædinque mōnō wæmæidi wodi incæ tæcæ ēñadāni inānite yabæque wido yabæque wido cædāni wængadānimpa.”

²⁰ “Tōmēnāni mānōmaī nāni cægaiñedē incæ Mōitee wodi ēñate pægacāimpa. Tōmengä waēmō wēñæ iñongante Wængonguī waa acampa, ante pōnēninque mēa go adoque apāicā go ate tōmengä ingante mæmpo oncōnē pæ gompote pæpogada pæcantapa. ²¹ Ayæ, Wænōnāni wæncæ wæ, ante guñente cædinque tōmēna tōmengä ingante yabæque gāwapæ yædopæ wo cæda ongōñongante awēnē Padaönō wengä onquiyængä adinque, Botō wē, ante cædinque Mōitee ingante ænte pæpogacā pægacāimpa. ²² Mānōmaī cæcā beyæ equitoidi nāni ēñengainō ante tōmānō ante odōmōnāni ēñente pædinque Mōitee wodi nē angä baquinque nanguī cæcā baquinque tæi piñænongä inte pægacāimpa.”

23 Ante Etebä godömenque apænedinque, “Ayæ æmæwo pædinque coadenta wadepo nänö eñagaiñedē Möitee wodi, Idægoidi botö tönïñadäni inänite eñacæ gobote, ante eñacæ gocantapa. 24 Gote eñayongä, Equito onguïñængä incæ botö guidengä ingante wiwa cæcä caate wæcampa, ante adinque Möitee wodi tömengä guidengä ingante wææ cæcæte ante cædinque tiyænö tiyæ cædinque Equito onguïñængä ingante wæñongä wængacäimpa. 25 Edæ, Wængongui botö imote äninque, Bitö idægoidi inänite ö ænte mäobi wadæ gocædänimpa, ante do angä eñentabopa, ante do eñëningä inte Möitee wodi, Idægoidi adobaï ante eñente pönencædänimpa, ante pönente cæyongä tömënäni wæætë mäninö ante eñënämaï ingadänimpa. 26 Mänömaï iïininque Möitee wodi iimö ate ponte ayongä idægoda wæætedö wæætë cæda adinque, ‘Iñäna, mïna guidencaya incæ wacä ingante quïmæ wænæ wænæ cæte quëwëminaa.’ 27 Ante, Guëa waa waadete quëwencædaimpa, ante cæyongä adocanque tömengä guidengä ingante në wænæ wænæ cædingä guiquënë Möitee wodi ingante bæ tadinque angantapa. ‘Iñæmpa, Bitö mönitö awënë inömi imipa, ante, Në apænte ämi imipa, ante æcänö bitö imite në änaï. 28 Edæ Equito ingante iimö bitö wænömi bai ñowoönæ adobaï botö imote wænoncæte ante pönëmi awædö.’ 29 Angä eñente wædinque Möitee wæætë wodii winongacäimpa. Wodii winonte wabæca Mäadiämæ gote wadäni ömæ quëwëninque wëñæna mënaa wæmpocä bagacäimpa.”

30 Ante apænedinque Etebä godömenque

awënëidi inänite iïmaï ante apænecantapa.

“Ayæ wæætë coadenta wadepo go ate Möitee wodi önömæca cægöningue onquiyabo Tinaiquidi gämænö gote dadi ëmænte ayongä ocãñequiwæ gonga bæcoyömö Wængonguï anquedo ponte a ongongä agacäimpa. ³¹ Ate wædinque Möitee wodi, Quinö bai inte bæco ante botö wiïmonte bai aboo, ante acæte ante pönömenque pöñongante mönö Awënë tömengä ingante iïmaï ante apænecäimpa. ³² ‘Bitö wæmæidi Wængonguïmo inömo inte botö Abadäo wodi Itæca wodi Aacobo wodi Wængonguïmo inömo imopa.’ Ante apænecä ëñente wædinque Möitee wodi do do wæate guiñente wædinque, Wiï aïnente awædö, ante cægacäimpa. ³³ Mänömaï cæyongante mönö Awënë wæætë, ‘Bitö næ gongænte ongöñömö botö adoyömö ongömo beyænque onguipoi tæiyæ waëmö impa, ante pönëningue bitö awæncata gä tadöwæ ämopa. ³⁴ Botö edæ cöwä adinque, Botö quinäni inänite equitoidi æbänö wænæ wænæ cædänii, ante do abopa. Tömënäni caate ö ö wædäni do ëñente wædinque botö, Ñimpo cæbo ate abæ tawænte gocædänimpa, ante wææ pömo imopa. Ñöwo iñömö edæ ægodöe. Botö, Equitobæ gocæbiimpa, ante bitö imite adodö da godömo gocæbiimpa,’ ante Wængonguï Möitee wodi ingante angacäimpa.”

³⁵ Ante apænedinque Etebä iïmaï ante godömenque apænecantapa. “Adocä Möitee ingante piïningue idægoidi doyedë, ‘Iñæmpa, Bitö mönitö awënë inömi imipa, Næ apænte änömi imipa, ante æcänö bitö imite næ änaï,’ ante änönänimpa. Ñöwo iñömö Wængonguï anquedo ocãñequi iñömö

pöningue tömēnāni nāni nē pīngaingā adocā Möitee ingante, Bitö idægoidi awēnē bacæbiimpa, angacäimpa. Bitö tömēnāni inānite ö æningue ænte māobi abæ tawænte gocædānimpa, ante cædinque Wængonguī bitö imite da godongā gocæbiimpa, ante Wængonguī beyæ apænedinque Wængonguī anquedo angacäimpa. ³⁶ Möitee iñömö, Ate pönencædānimpa, ante mā cædinque ayæ Wængonguī tönö bamönengæ nanguī cædinque idægoidi inānite ænte māocā gogadānimpa. Equitobæ emö cæte wadæ pöningue gāwapæntibæ Opatawæmæ yæwedecapæ pö ongöningue adocā Möitee mantacā imæmäa pongadānimpa. Önömæca ta pöningue coadenta wadepo ganca cægöñnāni tömengä, Ate pönencædānimpa, ante mā cædinque bamönengæ nanguī cægacäimpa,” ante Etebā wodi apænecantapa.

³⁷ Ayæ, “Adocā Möitee, Idægoidi eññedāni. Botö Wængonguī beyæ nē apænebo imo bai wacā edæ mīnitö tönīñacā incæ adobaī edæ Wængonguī beyæ nē apænecā bacæcäimpa. Tömengä ponte apænecā eññeningue mīnitö tömengä ingante ædæmö eññente cæcæmīnimpa, ante Möitee wodi apænecäcäimpa. ³⁸ Godongämæ nāni Wængonguī ingante apæneincabo tönö Möitee wodi önömæca cægönongäimpa. Mönö mæmæidi tönö cægöñnāni Wængonguī anquedo wēenēñedē Tinaiquidi nē ponte äningä incæ adocā tönö Möitee wodi önömæca cægönongäimpa. Māniñedē mönö imonte ante pönö cædinque Wængonguī, Möitee eññemi, angacäimpa. İncayæ quēwenguīnāni eññente quēwencædānimpa, ante cædinque botö,

Minitö cæte quëwenguimīni, ante apænebo ëñëninque bitö adodö ante yewæmoncæbiimpa, ante apænegacäimpa,” ante Etebä apænecantapa.

³⁹ Ayæ, “Möitee wodi mänömaï cæyongante mönö wæmæidi guiquënë ëñënämaï ināni inte tömengä ingante Baa äninque Equitobæ mönö adodö gocäimpa, ante önöwënenque pönente wægadänimpa. ⁴⁰ Mänömaï nē wædönāni inte tömënāni wæætë Aadöo wodi ingante apænedinque, ‘Aadöo ëñëmi. Mäningä, Equitobæ nē ëmö cæte mönö imonte mämöningä Möitee wodi ædönö gote dæ angää, ante adāmaï imönipa cæbii. Wængonguïdi inānipa, ante mönö imonte nē töo æmænte ænte goquïnāni ante bitö badömi æmönie.’ ⁴¹ Äninque mäniñedë, Mönö wængonguï ingampa, ante cædinque tömënāni wagada wë bai badongadänimpa. Ayæ, Mönö wængonguï quï impa, ante cædinque cænīnāni wænöninque baö tömënāni nāni badöinca gäänë ænte mämö ñö cædinque onompoca nāni badöinca adinque ææmæ bai cæte togadänimpa. ⁴² Mänömaï cædāni ate wædinque Wængonguï näëmæ, Pönë cæmīniyaa, ante pīngacäimpa. Ayæ, İināni öönædë owocooque ante, Wængonguïdi inānipa, ante oda cæcædänimpa, ante cædinque idægoidi inānite ñimpo cædinque dadi ëmæninque aadāmaï ingacäimpa. Edæ mäninö tömënāni nāni cægainö bai ante pönente yewæmöninque wacä wantæpiyæ ate Wængonguï beyæ iïmaï ante yewæmongacäimpa.

‘Idægoidi ëñëedāni. Önömæca gote coadenta wadepo ganca cægöninque minitö,

Wængonguï quï, ante pönoncæte ante cædinque

cænināni wænōninque baō tönō mǎincoo
 ænte pō ænte pō cæmīni incæte
 dicæ botō imote ante pōnēninque pōnōmīni
 æntawogaa.

⁴³ Īñæmpa, Mönō wængonguīdi ĩñōnānite ædæ
 wæænte apænecæimpa,
 ante cædinque mīnitō mīni badōninca adoca Mönoco
 mīni ānonca beyæ
 æmontaicō oncō næænte godinque wocæ wocæ
 cædōmīni awædō.

Ayæ waca, Mōni wængonguī Adempaō nēmō bai
 owocæimpa, ante mīni badōninca næænte
 æmonga cō cæ cō cæ cædōmīnimpa tōō.

Ante adinque Wængonguī, Mānōmaī cæmīni beyæ
 botō mīnitō ĩmīnite

Babidōnia ganca da godōninque godōmenque gobæ
 da godōmo gocæmīnimpa,

angampa, ante yewæmongatimpa.” Ante
 apænedinque Etebā, Mönō wæmæidi ĩmaī
 cægadānimpa, ante godōmenque apænecantapa.

⁴⁴ “Wængonguī doyedē Mōitee wodi ingante
 apænedinque, Mīnitō æmontaicō mænonte
 ate botō wææ ante yewæmōninca cō cæte
 mancæmīnimpa. Īmaī mænoncæmīnimpa, ante
 odōmongā adinque Mōitee wodi wæætē mönō
 wæmæidi ĩnānite odōmongā ate eñēninque
 tōmēnāni wæætē Wængonguī nānō odōmōnō bai
 mānōmaīnonque æmontaicō mænongadānimpa.
 Mānōmaī mænonte ate dica wææ ante Wængonguī
 nānō yewæmongainca incæ mǎnincōnē cō
 cægadānimpa. Ayæ önōmæca wayōmō wayōmō
 gocæte ante æmontaicō capote mongænte māo
 wocæ wocæ cægadānimpa. ⁴⁵ Ayæ wadāni

mäniömæ nē quēwēnāni iññōnānite Wængonguī wido cæcā ate mōnō wæmæidi Ootowee wodi miñæ ponte ömæ æninqe Wængonguī oncö æmontaicö näni ænte mongængaincö mämö wodongadānimpa. Wodönāni ate Awēnē Dabii wodi nānō ēñate quēwenguimpoga mänincö æmontaicö incæ ayæ a owogatimpa.

⁴⁶ Awēnē Dabii ingante Wængonguī pönö waa agacäimpa. İninqe Dabii wæætē Wængonguī ingante apænedinque, Bitö Aacobo wodi Wængonguī inömi imipa, ante adinque botö, Bitö quēwenguñmō, ante oncö ämi mænonguimo, añngante Wængonguī Baa angacäimpa. ⁴⁷ Wæætē Tadömöö wodi Wængonguī beyæ nē oncö mænongä ingacäimpa. ⁴⁸ Mänömaï cægaināni incæte Wængonguī iñmō edæ æmonga pōni nē ongongä inte waocā nānō önompoca mænönincönē ædö cæte pönö Ao ante guiite quēwenguingää. Mänömainö ante pönente wædinque Wængonguī beyæ nē apænegaingä iïmaï ante apænegacäimpa.

⁴⁹ ‘Botö nē Tæiyæ Awēnē inömo iñmote öönæ incæ botö Awēnē tæ contaqui bai impa, inguipoga wæætē botö önöwa podöwate qui bai impa.

Mänömaï nē ongömo beyæ mīnitö botö oncö ante ædö cæte mænonguimīni.

Inguipoga æcönēnō guidinque guēmanguimoo, ante Wængonguī angampa.

⁵⁰ Botö iñæmpa tömēmo önompoca tömää nē badongaimo inömo imopa,’ ante Wængonguī Awēnē angampa, ante wacä yewæmongacäimpa.”

51 Ante apænedinque Etebä godömenque iïmaï ante apænecantapa. “Ñowo eñeedäni. Minitö mïmö ömædë imïni inte wïi pönencædö. Önömoncaque eñëninque wïi ædæmö eñëmïni imïni awædö. Minitö wæmæidi nāni cægainö ante eñëmïnitawo. Iñæmpa tömënāni nāni cægai bai adobai cædinque mïnitö Wængongui Tæiyæ Waëmö Önöwoca ingante Baa äninque cöwë wææ ämïnipa töö. 52 Minitö wæmæidi doyedë Wængongui beyæ në apænegaināni inänite togænte päninque adocanque ingante ata cæpodāmaï inte tömänāni inänite togænte pangadänimpa. Edæ në apænedäni, Në nō entawënogä inte ponguingä ingampa, ante apæneyönänite tömënāni inänite do wænönāni wængadänimpa. Ñowo iñömö tömënāni nāni, Ponguingä, angaingä incæ do pongä adinque mïnitö godö wænömïnitapa töö. 53 Edæ, iïmaï cæedäni, ante Wængongui wææ angampa, ante Wængongui anquedoidi änāni eñëninque yewæmönāni ate mïnitö në adömïni incæ Baa äninque eñënāmaï cöwë cæmïnipa töö,” ante Etebä iinque apænecantapa.

Etebä ingante wænönāni wængampa

54 Mänïi awënëidi guiquënë Etebä nänö apænedö ante eñente wædinque äināni badinque бага wentoquënë wentoquënë angate piinānitapa. 55 Etebä iñömö Wængongui Tæiyæ Waëmö Önöwoca ingante ædæmö ewocadinque öönædë inö æmö adinque Wængongui ñäö apäite bai nänö emönö acantapa. Ayæ në Waocä eñagaingä inte Itota incæ

Wængongui tömëmæ inö adiyæ ongongä acantapa.
⁵⁶ Adinque,

—Badogaa, öönädë wi ænete bai ba abopa.
 Waocä nē eñagaingä incæ Wængongui tömëmæ inö
 adiyæ ongongä abopa.

⁵⁷ Ante apæ necä eñente wædinque tömënäni
 pïinte Yæ yæ äninque eñenämäi cæcæte ante
 önömonca ñi mämoncate cædänitapa. Godongämæ
 pïinte quingæ tömengä weca pogodo pöningue,
⁵⁸ tömengä ingante bæi ongöningue tömënäni näni
 quëwëñömö yabæque ænte mäo dicaca tæi tacacæ
 cædänitapa. Tömengä æbänö angää, ante ënëninäni
 inte nē apænedäni iñömö edæ tacacæ cædinque
 tömënäni wecoo yabæcooque gä tadongate tæcæ
 æmæwo pædingä Taodo näni ängongä önöwaca
 inö ñö cædönänimpa. ⁵⁹ Dicaca tacayönäni Etebä
 iñömö Wængongui ingante apænedinque, “Awënë
 Itota, bitö botö önöwoca æncæbiimpa.” ⁶⁰ Ante da
 guicapodinque yedæ äninque, “Awënë, tömënäni
 näni wënæ wënæ cædönö ante ee ae,” äninque edæ
 mö ñonte bai wængacäimpa.

8

¹ Etebä wodi ingante wænoncæte ante dicaca
 tacadäni adinque Taodo guiquënë, Waa wænömïni
 wængampa, ante Ao ante ongongacäimpa.

*Në godongämæ pönëinäni inänite Taodo togænte
 pangä*

Mänïönæ incæ mä togænte päningue Eedotadëe
 iñömö Codito ingante näni nē godongämæ
 pönencabo inänite godömenque nanguï togænte
 pïinte pangadänimpa. Ate wædinque Itota nänö

nē da godongainānique godāmaī ongōñōnāni wadāni iñōmō nāwæ wodii winōninque Oodeabæ Tāmadiabæ æmænō æmænō gogadānimpa. ² Mānīi Etebā wodi ingante æmæwo wænōnāni wængā ate Wængonguī ingante nē waa adāni incæ Ca ca wædinque māo daga wenānitapa. ³ Taodo guiquēnē, Itota ingante nē pōnēnāni inānite wido cæcæimpa, ante nanguī wēnæ wēnæ cædinque wacōnē pō guīi wacōnē pō guīi cædinque onguīñænāni tōnō onquiyænāni inānite bæi ongonte wēā māo tee mōnegadānimpa.

Tāmadiabæ godinque Pedipe apænecā ēñēnānipa

⁴ Mānīi nē wodii winōnāni iñōmō ædōmē godinque Codito ingantedō ante cōwē watapæ apænedāni ēñēnōnānimpa. ⁵ Īninque Pedipe iñōmō Tāmadia nāni nanguī quēwēñōmō gote apænedinque, Mōnō Codito æbānō do ponte cægacāi, ante apænecā ēñēnānitapa. ⁶ Mānōmainō ante apænedinque tōmengā, Ate pōnencædānimpa, ante mā cæcā adinque nanguī ināni adoyōmō pōnēninque, Mōnō ēñengæimpa, ante cædānitapa. ⁷ Waodāni nanguī ināni wēnæidi wentamō ēwocadāni tōnō quēwēnāni adinque Pedipe angā ēñēninque wēnæidi incæ Yæ āninque dæ tao godāni ate onōnānique badānitapa. Ayæ cōmāināni incæ cabæināni incæ tæiyænāni inānite Pedipe cæcā ate waa badānitapa. ⁸ Ante adinque māniñōmō quēwēnāni wæætē watapæ togadānimpa.

⁹ Wacā idō tōmengā emōwo Timōnō iñōmō tōmengā adoyōmō quēwēninque wēnæ tōnō wantæpiyæ cæcā inongāimpa. Īninque Tāmadiabæ quēwēnāni tōmānāni, Æbānō nanguī cæcāā, ante

guiñente wæyönänite tömengä, Nē idömo inömo inte botö iñömö edæ nanguï cæte beyæ ñæñæmo pöni imo aedäni. ¹⁰ Angä eñëningue awënëidi incæ önönänique incæ tömänäni adoyömö pönëningue, “Wængonguï nänö tæi piñænö bai entawëningue ingä idö iñömö nē Tæi Piñænongä ingampa,” ante pönëwëningue, Nē Ñænængä pöni inongä ingampa, ante pemongadingue tömengä apæneçä ate ædæmö eñënonänimpa.

¹¹ Ayæ tömengä wantæpiyæ wënæ tönö wæætë wæætë mä cæçä adingue tömënäni, Tömengä ingante mönö eñengæimpa, ante tee empo tee empo godönänimpa. ¹² Mänömai cæyönänite Pedipe guiquënë, Wængonguï Awënë Odeye nempo mönö quëwengæimpa, ante watapæ apæneçä eñënanitapa. Ayæ, Mönö Codito iñömö tömengä emöwo Itota emongampa, ante apænebo eñëedäni. Ante apæneçä eñëningue onguiñænäni incæ onquiyænäni incæ wede pönëningue æpænë guiidänitapa. ¹³ Ìningue Timönö incæ adobaï pönëningue æpænë guiidingue Pedipe miñæ tee empo tee empo gocantapa. Pedipe, Ate pönencædänimpa, ante mä cædingue tæi piñænte nanguï cæçä ate wædingue Timönö adocä cöwë guiñente wægacäimpa.

¹⁴ Ìningue, Tämadiabæ quëwënäni Wængonguï nänö apænedö ante eñëningue do Ao änänipa, ante Eedotadëe ponte tedeyönänite Itota tömengä nänö da godongainäni incæ do eñënanitapa. Eñëningue Pegodo tönö Wäö inate Tämadiabæ da godönäni godatapa. ¹⁵ Godingue Tämadiabæ pöningue tæcæ mä pönënäni beyæ ante tömëna

Wængonguï ingante iïmaï ante apænedatapa. Wængonguï eññemi. Bitö Tæiyæ Waëmö Önöwoca ingante tömënäniya da pönömi pö guicä ate ewocacædänimpa, ämönapa. ¹⁶ Edæ Awënë Itota emöwo apænedinque tömënäni mä æpænë guiyönänite bitö Tæiyæ Waëmö Önöwoca tömënäniya wææ guidämaï ingantapa cæbii. Nöwo ämi pö guicæcäimpa. ¹⁷ Ante apænedinque Pegodo tönö Wäö tömënäniya pönö gampote apæneyöna Wængonguï Tæiyæ Waëmö Önöwoca pö tömënäni baonga guicantapa.

¹⁸ Mänömaï pönö gampoyöna Wængonguï Tæiyæ Waëmö Önöwoca tömënäniya pö guicä ate wædinque Timönö guiquënë tömënäni godonte æinta pædæ pönöninque, ¹⁹ tömëna ïnate,

—Minatö bai botö adobai në cæbo bacæboimpa ämopa. Pönö cæmina ate botö në cæbo badinque wadäniya pönö gampobo ate Wængonguï Önöwoca adobai pö guicæcäimpa, ämopa.

²⁰ Äñongante Pegodo,

—Bitö mini godonte æintaque pædæ godöninque, Wængonguï Önöwoca nänö da pönönongä ingante æncæboimpa, ante pönewëmii. Edæ tömëmi tigitamonque nææninque edæ bitö ömæe ewenguinque gobäwe. ²¹ Iñæmpa, Wængonguï Önöwoca nänö da pönönongä ingante æninque godongämæ cæcæboimpa, ämitawoo. Wængonguï ayongä nö pönente cæbipa ænguimii. Edæ mönatö tönö ædö cæte cæquimii. ²² Nöwo edæ mäninö bitö wiwa cædinö ante wæwente pönëninque ñimpo cæe. Ayæ mönitö Awënë ingante apænebi eññëninque

tömengä wabänö pönö waadete cædinque mīmōno bitō pönēwēnō ante wadæ cædinque ñimpo cæbaingampa. ²³ Bitō nāmā beyænque ante nē æīnēmi inte bitō mīmōnē guīnæmæ entawente bai quēwēmipa. Ayæ bitō tōmēmi wīwa cædō beyænque ñā cæyænte bai quēwēmipa, ante awædō.

²⁴ Angä eñēninque Timōnō wæætē,

—Æ ämi awædō, äninque Pegodo ingante, Botō mīnatō änō bai wīi bacæboimpa, ante cædinque mīnatō botō beyæ Wængonguī ingante apæneedā, angantapa.

²⁵ Ayæ Wäo tönō Pegodo iñōmō, Itota incæ mönō Codito ingaingä ingampa, ante mänīñōmō quēwēnāni inānite mönō Awēnē nānō änō ante apæneedā eñēnānitapa. Ìnque apænedinque adodō Eedotadēē gocæte ante wadæ gote Tämadiabæ godinque tōmēna wayōmō wayōmō māo wædænque quēwēnāni weca pō pō cædinque nanguī ināni inānite apænedinque Codito ingantedō ante watapæ apæneedā eñēnānitapa.

Etiopæcæ awēnē ingante Pedipe bee tengampa

²⁶ Mäningä Pedipe ingante anquedo ayæ ate ponte äninque, “Bitō ægodōe, Eedotadēē wæi Gata goquīnō pædæ taoquinque betamonca gocæbiimpa,” angantapa. Mänīnō önömæcaque wæidō inompa. ²⁷ Mänōmainō angä eñēninque Pedipe ængæ gantidinque wadæ godinque anquedo nānō äñinonque cægonte ayongä onguīñægä Etiopæcæ quēwēningä pō eyepæ bee tengä acantapa. Ìngä iñōmō Etiopæcæ tæiyæ awēnē onquiyægä Cantate beyæ tōmēnāni godonte æinta nē aacä inongä inte ñænæ awēnē

inongäimpa. Tömengä ñöwo Wængonguï weca ædæ wææninqe watapæ apæ necæte ante Eedotadëe æidingä inte ocæ emænte pöningue Pedipe ingante eyepæ mämö bee tengantapa. ²⁸ Ìngä inñömö cabayo nänö wëä pönoncadea æi tæ contate ocæ emænte pöningue Itaiya wodi Wængonguï beyæ nē apænegaingä nänö yewæmongainta næænte a congantapa.

²⁹ Mänömaï a conte pönongante Pedipe ingante Wængonguï Önöwoca, “Goe, Ìi cabayo nänö wëä pönoncade eyepæ godinque guëa goe,” angantapa. ³⁰ Angä eñëningue Pedipe pogodo godinque obo ponte eñëngä Etiopebæ awënë inñömö Itaiya wodi nänö Wængonguï beyæ yewæmongainta adinque apæ necä eñëningue,

—Bitö ate apæ nedö ante ædæmö eñëmitawo.

³¹ Äñongante,

—Inñæmpa eñëmogaa. Botö imote apæ nedänipa eñënguimoo.

Ante apæ nedinque Pedipe ingante, Bitö botö weca ææ guiite tæ contae, angä ææ guii tæ contacantapa.

³² Mäninta Wængonguï angä eñente nāni yewæmongainta Etiopebæ awënë nänö aintaa iïmaï ante yewæmonte ongönönimpa.

“Codotedo ingante wænongäimpa, ante bæi ongonte æninqe töö godonte bai cædinque tömengä ingante adobai wænoncæte ante bæi ongonte ænte godänitapa.

Obegaidi ocaguincoo ëö toyönāni wädämaï pæ wëenecä bai tömengä adobai wädämaï inte pæ wëenecantapa.

³³ Piinte änāni wæyongante nē apænte anguēnēnāni
incæ, Pangæimpa, ante cædinque nōingā
ante änāmaï inānitapa.

Tömengä ingante æmæwo wænōnāni wængaingä
iñongante,

Tömengä nānō pæināni, ante ædō cæte apænequii.”

³⁴ Ante nāni yewæmongainö adingā inte
Etiopæbæ awēnē ñōwo Pedipe ingante,

—Apænebi eñēmoe. Nē Wængonguï beyæ
apænegaingä iñömō æcānō ingante ante nē
apænecāi. Tömengä nāmā ingante ante
yewæmongantawo. Edæ wacā ingante ante
yewæmongantawo, ante eñencæte ante wæbopa.

³⁵ Ante añongante Pedipe iñömō Etiopæbæ
awēnē nānō adinta adotaa ate apænedinque
ayæ wataa wataa adinque Itota ingantedō ante
watapæ apæneca eñengantapa. ³⁶ Apæneyongä
taadō godinque wapæ ganca pōnatapa. Equitobæ
awēnē mänimæ adinque Pedipe ingante, Waa ae.
Iñömō gāwapæ impa. Æpænē guidāmaï inguïmo,
āmitawoo.

³⁷ Angä eñēninqe,

—Bitō mīmōno wede pōnēmi ate botō Ao
āmaïmopa, angantapa. Añongante,

—Ao botō, Itota Codito nāwangä Wængonguï
Wengä inongä ingampa, ante wede pōnēmopa.

³⁸ Äninqe Etiopæbæ awēnē angä cabayo næ
gongæ ate Pedipe tōnō guëa æpænē ti wææna
ate Pedipe tömengä ingante æpænē guidongä
guicantapa. ³⁹ Ayæ æpænē guuite ate tömengä tao
gongæñongä Wængonguï Awēnē Önōwoca Pedipe
ingante iñæ æænonte ö ængä. Ate æmæwo

adinque Etiopebæ awënë watapæ todinque oncönë goinö gocantapa. ⁴⁰ Pedipe guiquënë Atota iñömö iñontobæ a ongöninque godömenque wadāni nāni quëwëñömö go apænedinque wayömö nāni quëwëñömö go apænedinque Tetadea ganca godinque Codito ingantedö ante watapæ apæneca ëñengadānimpa.

9

Awënë Itota ingante Taodo acampa (Nāni Cægainö 22.6-16, 26.12-18)

¹ Taodo guiquënë mönö Awënë ingante nē tee empote quëwënāni inānite pīinque, Wængongæimpa, ante bæi ongö bæi ongö cædinque cöwë ñimpo cædāmaï ingacäimpa. Nöwo godömenque cæcæte ante Wængongui oncönë gote nē godongä ñænængä pönï inongä ingante apænedinque, ² Awënë ëñëmi, angantapa. Bitö Ao ämi ininque botö Daāmaco nāni quëwëñömö gote ayömo, Onguiñænāni incæ onquiyænāni incæ æcāmenque Itota Taadö ante nē godāni inānii, ante adinque tömënāni inānite bæi ongonte goti winte Eedotadëë ænte pömaïmopa. Ininque bitö, Taodo mänömaï cæcæcäimpa, ante botö beyæ cadota ante yewæmöninque pædæ pönömi æninque botö wæætë Daāmaco iñömö mäo oodeoidi odömöincönë awënëidi weca gote pædæ godömo ænte adinque tömënāni Ao äñönāni mänömaï cæbaïmopa. ³ Äñongä awënë Ao ante yewæmöninque pædæ pönongä æninque Taodo Daāmaco obo gote ayongante iñontobæ öönæde inö näinte bai cædinque tömengä nänö ongöñömö

tömäo guinæ gongæ. ⁴ Adinque Taodo guidömëmæ tæ go wæængantapa. Ayæ wæænte öñöñongante tömengä ingante, “Taodo. Taodo. Quinante botö imote togænte pämi.”

⁵ Angä ëñente wædinque Taodo wæætë, “Awënë, æmömidö inömi imii.” Ante ëñëñongä, “Botö Itotabo inömo inte bitö në togænte päniimo mänimotö imopa cæbii. Ìñæmpa wagada päintoca bai bitö nämä ìñæ æwate bai cædinque cowate bai edæ caate bai wæbipa töö.” ⁶ Mänömaï apænecä ëñëninque Taodo ancai guiñente do do wæadinque, “Awënë, æbänö cæquïmo ämii.” Äñongante mönö Awënë wæætë apænecantapa. “Bitö ængæ gantidinke iïnäni näni quëwëñömö goe. Botö, Taodo iïmaï cæcæcäimpa, ante wacä ingante Daämaco ìñömö në quëwengä ingante do apænebo ëñengampa cæbii. Bitö Daämaco ìñömö gote ongöñömi tömengä wæætë bitö imite apænecä ëñente cæcæbiimpa.”

⁷ Taodo tönö godongämæ godäni guiquënë waocä ingante adämaï inäni incæte, Önonque tempa, ante pönëninque ancai guiñente wædänitapa. ⁸ Taodo ìñömö onguipoga ayæ a öñongä inte ængæ gantidinke awinca adämaï ingä adinque wadäni tömengä ingante önonpo bæi ongöninque Daämaco ganca ænte mäodäni gocantapa. ⁹ Mänïñömö gote ongöninque tömengä adämaï inongä inte cænämaï bedämaï mëönaa go adoönæque ìñonte wæwengacäimpa.

¹⁰ Ayæ wacä në pönengä Änäniya Daämaco ìñömö quëwengä inte mä pönï wïimonte bai ayongä mönö

Awënë, “Änäniya,” angä eñëinque, “Awënë, botö eñëe cömopa.”

¹¹ Äñongä mönö Awënë wæætë, “Taodo ñowo Wængonguï ingante apænecampa cæbii. Bitö ængæ gantidinqe taadö näni Töinö änönö godinque Codaa oncönë gote äninque, Tadoto në quëwëningä Taodo iñömö owocantawo, ante acæbiimpa. ¹² Wængonguï ingante ñowo apænedinque ate bai ayongä wacä Änäniya pö guidinque, Ñowo edonque acæbiimpa, ante gampocampa, ante ate bai Taodo wæcantapa cæbii. Tömengä wüimonte bai adinque nänö wädö bai cædinque bitö ñowo gote cæcæbiimpa.”

¹³ Angä eñente wædinque Änäniya wæætë, “Awënë iñæmpa botö, Mäningä Taodo iñömö quinäo bai onguïñængä ingää, ante nanguï tededäni do eñemopa. Ayæ, Eedotadëe iñömö tömengä bitö quinäni inänite wënæ wënæ cæcampa, ante tededäni eñente wæbopa. ¹⁴ Ayæ në godönäni ñænænäni Ao ante yewæmönäni æninque tömengä iñæmpa në angä badinque bitö emöwo ante në apænemöni iñömönite bæi ongonte tee mönecæte ante pongampa cæbii.”

¹⁵ Ante wæyongante mönö Awënë wæætë Änäniya ingante, “Iingä ingante do apænte æmo apa änewëe. Tömengä ingante, Bitö wabæca gote wadäni inänite botö emöwo ante apænedinque ayæ tömënäni awënëidi inänite botö emöwo ante apænedinque idægoidi inänite adobai botö emöwo apænebi eñencædänimpa, ante tömengä ingante do antabopa cæbii. Ñowo tömengä weca gobäwe. ¹⁶ Ayæ botö në æningä inte tömengä æbänö botö

ëmöwo beyæ nanguï caate wæquënegä ingää, ante odömömo ate ëñencæcäimpa.”

17 Angä ëñëninque Taodo nänö owoyömo go guidinque Änäniya tömengä ingante gampomöninque, —Taodo botö tönĩñabi ëñëmi. Bitö taadö pöninque Itota ingante abitawo. Tömengä iñömö nē Awënë inongä inte botö imote apænegantapa. Bitö Taodo weca godinque cæbi ate tömengä wëenëñedē nänö ëmönö bai adinque Wængongui Tæiyæ Waëmö Önöwoca ingante da pönömo æninque ëwocacæcäimpa, ante mönö Awënë angä ëñëninque botö bitö weca pontabopa.

18 Ante Änäniya tæcæ apæneyongä Taodo tömentagæ nänö ëmönintagæ tæ wæænte iñontobæ edonque acantapa. Ayæ ængæ gantiyongante Änäniya tömengä ingante æpænē guidongä guicantapa. 19 Ayæ cængui cæninque tömengä baö wæætē tæi piñængä bacantapa. Ayæ Daämaco iñömö Itota ingante nē tee empote quëwënäni weca godömenque tæönæ quëwengantapa.

Daämaco iñömö Taodo apænegä ëñënanipa

20 Mäniñömö quëwëninque Taodo do odeoidi odömöincönē go guï go guï cædinque, Itota Codito näwangä Wængongui Wengä ingampa, ante apænegä ëñënanitapa. 21 Mänömai apænegä ëñëninque tömengä ingante nē ëñënäni iñömö ancai guïñëninque, “Æ. Ìngä adocä Eedotadëe iñömö Itota ëmöwo ante nē apænedäni inänite nē wido cæcä imaingampa. Tömengä adocä nē wido cæcä incæ adodäni inänite bæi ongonte æninque, Wængongui qui, ante nē godönäni ñænænäni weca

mäo pædæ godoncæte ante ñöwo iñömö pöningue cæcä awædö. Edæ adocä ingänö angüenë.”

²² Ante wædäni incæte Taodo godömenque tæi piñænte entawëningue iimaï ante apænecantapa. Awënë bacæcäimpa, ante Wængongui nänö në gao cæcadongä iñömö mönö Codito iñömö edæ Itota adocä inongä ingampa, ante, Näwangä impa, ante nöingä pöni apænecä. Adinque Oodeoidi Daämaco iñömö quëwënäni guiquënë, Ædö cæte wadö angui, ante wægadänimpa.

Oodeoidi wænnoncæ cæyönäni Taodo aamö cæte gocampa

²³ İninqe tæönæ go ate oodeoidi godongämæ pönente Ao äningue, Taodo ingante wængongæimpa, ante cædänitapa. ²⁴ Mänömaï ante cæyönäni Taodo mäninö nani äninö do eñgantapa. Tömënanäni guiquënë, Mönö quëwëñömö wææ cæinemö tacä ate wænömö wæncæcäimpa, ante itædë woyowotæ wææ wänönänitapa. ²⁵ Wææ wänöñönäni tömengä ingante në tee empote quëwënäni wæætë yabæ wææ cæte iñömö Taodo ingante woyowotæ mäi ayacömoyäa inö otodë pædæ wæænönäni ti wæænte gocantapa.

Taodo Eedotadëe ponte apænecampa

²⁶ Mänömaï godinque Taodo Eedotadëe pöningue, Itota ingante në tee empote quëwënäni weca gobote, ante pongä. Adinque tömänäni, Näwangä Itota ingante në pönengä ingantawogaa, ante guiñente awædö, ante pönëningue wææ adänitapa. ²⁷ Bedënabee guiquënë Taodo ingante bæi ongömænte æningue Itota nänö në da godongainäni weca ænte mämongä

pongantapa. Ayæ tōmēnāni īnānite Bedēnabee apænecantapa. Taodo ñōwo taadō godinque mōnō Awēnē ingante dobæ acāimpa. Mōnō Awēnē tōmengā ingante do apænecantapa. Daāmaco gote quēwēninque Itota ēmōwo ante tōmengā guiñēnāmaī apænedingā inte ñōwo iñōmō pongā apa quēwēmīni. ²⁸ Bedēnabee mānōmaī angā ēñēninque Ao añōnāni Taodo Eedotadēē iñōmō quēwēninque tao guiite ta tao guiite ta cædinque tōmēnāni tōnō godongāmæ cædinque mōnō Awēnē ēmōwo ante guiñēnedāmaī apænecantapa. ²⁹ Ayæ wadāni oodeoidi incæ guidiego tededō nē tededāni māniñōmō quēwēnōnānīmpa. Īnāni īnānite Pabodo mōnō Awēnē ēmōwo ante nangui apænedinque wæætedō wææte añongante tōmēnāni wææte wænoncæte ante cædānitapa. ³⁰ Mānōmaī cædānīpa, ante ēñente wædinque tōmengā nānō tōniñadāni bai badīnāni inte pancadāniya Taodo ingante Tetadea ganca māo ēmōninque, Godōmenque Tadoto iñōmō wodii winonte goe, ante da godōnāni gogacāimpa.

³¹ Īninque Codito ingante nāni godongāmæ pōnencabo incæ Oodeabæ Gadideabæ Tāmadiabæ tōmāo quēwēninque māniñedē wædāmaī inte guēmānānitapa. Ayæ tæi piñænte entawēnāni badānitapa. Ayæ Wængongui Tæiyæ Waēmō Ōnōwoca ædæmō apænecā ate tōmēnāni wampo pōnēnāni badinque yebænte nangui īnāni bagadānīmpa. Ayæ mōnō Awēnē ingante ædō cæte ēñēnāmaī cæquī, ante guiñente wægadānīmpa.

Ēnea ingante Pegodo angā waa bacampa

³² Mānōmaī tōmēnāni nāni pōnencabo nanguī yebænte bayōnāni Pegodo guiquēnē wayōmō wayōmō wodo tebæ wodo tebæ godinque Dida iñōmō pōninquē mōnō Awēnē quīnāni weca ēñacæ pongantapa. ³³ Māniñōmō ponte apæneyongā wacā tōmengā ēmōwo Ēnea do ocho wadepo ganca mōimoga cōmāingā inte nē ongōningā ingā. ³⁴ Adinque Pegodo tōmengā ingante,

—Ēnea ēñēmi. Itota Codito cæcā ate waa babipa cæbii. Ængæ gantidinquē tōmēmi mōimo nī capoe.

Āñongā Ēnea iñōmō do edæ ængæ ganticā.

³⁵ Adinque Dida quēwēnāni tōnō Tadōō quēwēnāni tōnō wēēnē nāni pōnēwengainō ante ēmō cædinque Wængonguī Awēnē gāmænō pōnānitapa.

*Dodoca wodi ingante Pegodo angā ñāni
ōmæmongampa*

³⁶ Māniñedē wacā onquiyængā nē pōnengā Tabita iñōmō Cope nāni quēwēñōmō quēwēnongäimpa. Tōmengā ēmōwo guidiego tededō Dodoca incæ mōnō tededō Cowāñe ēmongā inongäimpa. Tōmengā iñōmō nē waa cædongā inte ōmæpodāni wæwēnāni inānite nanguī waa cædongā inte Cope iñōmō quēwēnongäimpa. ³⁷ Tōmengā māniñedē nangæ badinque æmæwo wængā. Ate tōmengā baō ini æpæ āadēninque wænōmēnæcapaa mæi ñō cædānitapa. ³⁸ Cope iñōmō quēwēninque Dida wīi gobæ impa, eyequei impa. Mānōmaī beyæ, Pegodo Dida iñōmō ongongampa, ante tededāni ēñente wædinque Itota ingante do tee empote quēwēnāni iñōmō onguīñæna mēnaa inate da godōninque, Cope iñōmō gote Pegodo ingante, “Quingæ pōe, ante äeda.”

³⁹ Änäni gote añete pöñöñate Pegodo godongämæ pongä adinque tömengä ingante wænömënæcapaa mäidäni guiite acantapa. Owæmpoinäni godongämæ pöñinque doyæncoo tönö yabæcoo Dodoca miingä quëwengäñedë nänö badongaincoo odömöñinque Ca ca wædäni. ⁴⁰ Adinque Pegodo tömänäni inänite angä tao godäni adinque da guicapote Wængongui ingante apænecantapa. Ayæ dobæ wænte onguite a öñongä gämænö dadi ëmænte adinque,

—Tabita, ængæ gantibi ämo.

Äñongä Tabita wodi awinca wi æmöñinque Pegodo ingante adinque ængæ gantite contacantapa. ⁴¹ Ængæ ganti contayongante tömengä önompo bæi ongöñinque Pegodo töö æmængä ate ædæmö ængæ gantite adiyæ gongængantapa. Ayæ owæmpoinäni tönö mönö Awënë quinäni inänite Pegodo aa pecä pö guidäni ate miingä ingä odömongä adänitapa. ⁴² Ìninqe, Möñö Awënë mänömaï cæcantapa, ante Cope iñömö näni quëwëñömö tömäo gote tededäni ëñëñinque nangui inäni möñö Awënë ingante në pönëñäni badänitapa. ⁴³ Pegodo mäññedë æmontai në aminengä Timönö weca owodinque Cope iñömö tæönæ quëwengacäimpa.

10

Pegodo tönö Codöñedio

¹ Tetadea näni quëwëñömö odömäno tontadoidi Itadiaidi näni änoncabo inte quëwengadänimpa. Ìninqe tontadoidi tiëë ganca näni cabo tiëë ganca näni cabo iñönänite adocabodäni capitäo tömengä ëmöwo Codöñedio ëmongacäimpa. ² Tömengä

nāni wencabo nāni owocabo owodique, Mönö wadö pönēñömonte Wængonguī pangä wæcæ wæ, äninque Wængonguī nänö änö ante eñente quëwënönänimpa. Ayæ pæ gompodāmaī inte Codönedio, Ömæpodäni wæwënäni quī, ante pædæ godö pædæ godö cæcä ænönänimpa. Ayæ Wængonguī ingante ñimpo cædāmaī cöwë apænedongäimpa. ³ Tömengä iñömö ædæ wæicä ate mä pönī wīimonte bai acantapa.

Edonque wīimonte bai ayongante Wængonguī anquedo tömengä weca pö guidique, “Codönedio bitö imi.” ⁴ Angä wædique Codönedio tömengä ingante cöwä adinque ancai guñente wædique, “Awënë, æbänö ante ämii. Ämi eñemoe.” Äñongante, “Bitö Wængonguī ingante nē apænebi imitawo, ömæpodäni wæwënäni inänite nē godömi imitawo. Mäninö bitö apænedö ante mäninö bitö godönö ante adinque bitö imite waa abopa, Wængonguī angampa, angantapa. ⁵ Nöwo wadäni inänite ämi Cope iñömö gote Timönö Pegodo nāni änogä ingante äñete poncædänimpa. ⁶ Adowo emönongä Timönö weca Timönö Pegodo gäwapæntibæ wedeca owocampa. Mäningä Timönö æmontai nē aminënogä ingampa.”

⁷ Ante apænedingä inte Wængonguī anquedo ingæ gocä adinque Codönedio wæætë tömengä ingante nē cæda mënaa inate aa pecä pönatapa. Ayæ tontadoidi incæ pancadäniya tömengä ingante nē cædäni inönänimpa. Inique adocanque tontado incæ Codönedio ingante nē cæcä incæ Wængonguī ingante nē eñengä inongäimpa. Tömengä ingante Codönedio adobai aa pecä pongantapa. ⁸ Mänömaī

aa pecä ate tömënäni godongämæ pönäni ate Codönedio, Wængongui æbänö angantawoo, ante tömänö ante adodö apænedinque, Nöwo Cope iñömö goedäni, angantapa.

⁹ Angä godinque iimö wææñö taadö godinque Cope iñömö obo pöñönäni mäniñedë incæ tæcæbæcä incæ Pegodo guiquenë Wængongui ingante apænecæte ante oncömanca æicantapa.

¹⁰ Ayæ ate gue ænente wædinque wadäni inänite, Cæinente awædö, äñongante cængui iinque æænönämaï inte cönönämaï iñönänite tömengä wüimonte ate bai cæwëngantapa. ¹¹ Ate bai æmö ayongante öönædë wi ænete bai bayö möincoo bai ñænæncoo pönï iñonte æmænecoo bæi æmænecoo bæi ongönete bai inguipoga pædæ wæænonte bai wææ wäi wocæ acantapa. ¹² Wäi wocæñö në ocagui mongænäni incæ, në ocagui ömaadäni incæ, në öömä emænte æidämæ godäni incæ babæidi tömänäni weocoo cæncadenco inö ongönäni acantapa. ¹³ Ayongante wacä äninque, “Pegodo, ængæ gantidinque wænonte cæe.”

¹⁴ Angä ëñëninque Pegodo, “Awënë, ëñëmi. Önönänique iñönänite botö, Baacä awædö, äninque cöwë cænämaï imo apa anewëë.” ¹⁵ Äninque wæætë ëñëñongä, “Wængongui nänö ædæmö mënongadongä incæ bitö ædö cæte baacä ämiï.”

¹⁶ Äninque në apænedingä iñömö wæætë adodö adodö angä ëñëninque Pegodo wæætë, Baacä awædö, ante Baa angantapa. Ayæ mempoga go adopoque wæætedö wæætë adodö äna ate ñænæncoo pönï weocoo incæ öönædë inö wëä æænongä bai acantapa. ¹⁷ İninque, Mänömainö

ante wīimonte bai adīmo inte botō quīnō bai cæquīmoo, ante Timōnō Pegodo pōnēē congan-tapa. Pōnēē cōñongā Codōnedio nē nānō da pōnōnīnāni guiquēnē, Timōnō oncō æyōmōnō ī, ante diqui diqui minte adinque yabædemō inō næ gongæninque, ¹⁸ Timōnō Pegodo nāni ānongā iñōmō owocāā, ante eñencæte ante aa pedānitapa.

¹⁹ Pegodo wīimonte bai nānō adīnō ante ayæ pōnēē cōñongante Wængonguī Ōnōwoca, “Timōnō eñēmi, bitō īmite ante onguīñænāni mengāa go adocanque diqui diqui mīnānīpa quēwēmīi. ²⁰ Tōmēmo āmo pōnānīpa cæbīi. Bitō ængæ gantīnque yæipodē wæīdīnque tōmēnāni tōnō ee goe,” angantapa.

²¹ Angā eñēninque Pegodo yæipodē wæīdīnque tōmēnāni inānite, Botō mīnitō nē diqui diqui mīnōmo adobo īmopa. Mīnitō quīnante pōmīnīi.

²² Añongante,

—Mōnitō awēnē capitāō Codōnedio incæ angā pōmōnīpa. Tōmengā iñōmō Wængonguī ayongante nō cæcā inongā inte Wængonguī ingante guīñente quēwengampa. Nē nō cæcā ingampa, ante pōnēninque oodeoidi tōmānāni tōmengā ingante waa adānīpa. Īninque Wængonguī anquedo tæiyæ waēmō inongā inte wæætē Codōnedio ingante, Bitō wadāni inānite āmi gote Pegodo ingante āñete poncædānīmpa. Tōmengā iñōmō bitō weca pōninque apænecā eñencæbiīmpa, angā eñente wæīdīnque Codōnedio wæætē mōnitō īmōnite da pōnongā pōmōni ae.

²³ Ante apænedāni eñēninque Pegodo angā pō guīite tōmengā weca owodānitapa. Īmō ate

Pegodo tömënäni tönö tao goyongante Cope iñömö quëwente nē pönënäni incæ pancadäniya godongämæ tao wadæ godänitapa.

²⁴ Mänömaï godinque Pegodo iñabæ wæængä Tetadea pongantapa. Codönedio guiquënë, Oo ponguingä, ante pönëninque tömengä guidënäni tönö tömengä æmigoidi inänite do añecä ponte godongämæ ongönänitapa. ²⁵ İninque Pegodo iñömö oncönē pō guicæ cæyongä Codönedio wæætē oncodo tao bee tēninque, Æ, bitō Wængonguï anquedo inömi imipa, ante bai cædinque ædæ wæænte Pegodo önöwa gäänē guidömëmæ ñongængä. ²⁶ Adinque Pegodo wææ äninque,

—İñæmpa bitō waobi imi bai botō adobai waobo inömo imopa. Ængæ gantibi, äninque Pegodo angä ængæ ganticantapa.

²⁷ Ayæ Codönedio tönö guëa tededinque Pegodo oncönē guite ayongante nanguï inäni godongämæ mä ongönäni. ²⁸ Adinque tömënäni inänite,

—Minitō do eñëmīnīpa. Oodeoidi inömōni inte mōnitō Möitee wodi nänö wææ angainö ante Ao ante eñente cæmōnīpa. İninque, Oodeo inämaï inäni tönö godongämæ cädämaï incæmīnīpa, ante ayæ, Tömënäni weca go guidämaï incæmīnīpa, ante mōnitō eñengainö ante cæmōnīpa, ante mīnitō do eñëmīnitawoo. Incæte Wængonguï wæætē botō imote iīmaï ante odömongantapa. Bitō, Baacä awædö, ante tedete bai waocä ingantedö ante tededinque, Wentamö mongængampa, ante änämaï incæbiīpa. Ayæ, Önonganque ingampa, ante änämaï incæbiīpa, ante Wængonguï botō

imote do odömongä atabopa. ²⁹ Äñete pönäni ate botö, Wængonguï mänömainö ante odömongä atabopa, ante pönëninque ee pontabopa. İninque quİNante botö imote aa pemİnii, ante eñencæte ante wæbopa.

³⁰ Äñongante Codönedio wæætë,

—Do mēönaa go mēönaa İñonte botö tömëmo oncönë cænämaï inte Wængonguï ingante apænetabopa. Botö mänömaï ñöwo bai ædæ wæicä apæneyömo onguïñængä weocoo näämænta pönİ mongængä ponte botö weca a ongongä atabopa.

³¹ Ayæ botö imote apænedinque, “Codönedio, bitö Wængonguï ingante apænebitawo, angantapa. Mäninö bitö apænedö ante Wængonguï do eñengantapa. Ömæpodäni wæwënäni quï, ante bitö godömitawo. Mäninö bitö godönö ante adinque Wængonguï cöwë pönengampa cæbii. ³² Ñöwo ämi Cope gote Timönö Pegodo näni änogä ingante äñete poncædänimpa. Tömengä wacä Timönö æmontai nē aminengä weca gäwapæntibæ wedeca owocampa.” ³³ Angä eñëninque botö wæætë bitö imite ante, Äñete pödäni, antabopa. Ñöwo bitö do pömi waa abopa. İninque ñöwo İñömö Wængonguï ayongä tömämöni godongämæ a ongöñömöni bitö, Wængonguï Awënë mönitö beyæ ante bitö imite æbänö angää, ante apænebi eñencæte ante ongömönipa, angantapa.

*Codönedio oncönë ongöninque Pegodo
apænecampa*

³⁴ Codönedio mänömaï apænecä eñëninque Pegodo İimaï ante apænecantapa.

—Wængonguï, Adoyömö pönï iminipa, ante tömämö imonte pönö adoyömö pönï cæcampa, ante botö, Näwangä impa, ante ñowo tæcæ eñëmopa. ³⁵ Ìninqe ïimæca quëwënäni incæ wayömö wabæca wabæca quëwënäni incæ æcänö Wængonguï ingante guñente wædinque nö cæte quëwëna ante adinque Wængonguï mäningä ingante Ao ante do ængampa. ³⁶ Mänömaï cæbopa, ante idægoidi inänite apænemini eñencädänimpa, ante Wængonguï mönitö imönite da godongä gote ïimäi ante apænemöni eñënänipa. Tömämæ quëwëmö iñömonte mönö Tæiyæ Awënë iñömö Itota Codito ingampa. Tömengä waa pönï pönö cæcä beyænque Wængonguï piyænë nänö cægainö ante watapæ möni apænedö impa. ³⁷ Wäö wodi, Æpænë mönö guidongæimpa, ante apæneca eñënäni ate Itota Codito iñömö Gadideabæ iñömö mä cædinque Oodeabæ tömäo cægonte æbänö cægacäi, ante do eñëminipa. ³⁸ Ìimäi ingatimpa. Wængonguï tömengä Önöwoca ingante angä Itota Näatadeta në quëwengaingä baonga wææ guigacäimpa. Wææ guicä ate Itota tæi piñænte entawëninque wayömö wayömö gote tömäo cægöninque waa cægacäimpa. Edæ Wængonguï tömengä tönö godongämæ quëwente cæcä beyæ Itota iñömö, Wadäni wënæ angä eñëninque goti winte bai wæwënänipa, ante adinque wënæidi inänite angä tao godänitapa. Ayæ wadäni wënæ wënæ inte wæyönänite tömengä godö cæcä ate edæ waa inäni bagadänimpa.

³⁹ Pabodo mänömainö ante godömenque apænecantapa. “Oodeoidi ömæ cægöninque ayæ Eedotadëe iñömö quëwëninque, Itota Codito

æbänö cægacäi, ante nē adimōni inte mönitō iñömō mäninō tömänö ante nē apænemōni imōnipa. Tömengä ingante awæ ñænquedimæ cæte godö wænönäni wængacäimpa. ⁴⁰ Incæte Itota do wæningä inte meönaa go adoönæque öñongante Wængonguï angä ñäni ömæmonte müngä inte edonque pōni a ongongä agadänimpa. ⁴¹ Wüi tömänäni adänitapa. Pancamōniya atamōnipa. Itota ñäni ömæmongä ate tömengä tönö nē godongämæ cænte bedimōni iñömönite Wængonguï, Mänimpodänique Itota müngä ongongä ingampa, ante nē adinäni inte nē apænedäni incädänimpa, ante mönitō imönite apænte ængacäimpa. Mönitō adomōnique tömengä ingante atamōnipa. ⁴² Ayæ mönitō imönite äninque Wængonguï, Minitō iñömō do eñënimini inte nē apænemini badinque waodäni inänite mänömainö ante apænedinque iïmaï ante apænegämimimpa. Müi quëwënäni inänite do wænünäni inänite Itota Codito iñömō edæ tömänäni inänite edæ nē apænte anguingänö angüënë, ante apænemini eñencädänimpa, ante Wængonguï mönitō imönite angacäimpa. ⁴³ Ayæ, Mönö Codito poncæcäimpa, ante do eñengainäni inte tömänäni Wængonguï beyæ adoyömö apænegadänimpa. Tömënäni, Codito ingante nē pönänäni wënæ wënæ nani cædö ante adocä Codito emöwo beyænque Wængonguï pönö waadedinque ñimpo cæcä quëwencädänimpa, ante doyedë apænegadänimpa,” ante Pegodo Codönedioidi inänite apænegä eñënanitapa.

Oodeoidi inämaï inäni Wængonguï Önöwoca ingante ænäni

44 Pegodo mäninö ante tæcæ apæ necä eñëë cöñönänite Wængonguï Tæiyæ Waëmö Önöwoca tömënäni tömänäni baonga wææ guicantapa. 45 Pegodo tönö godongämæ pöninäni guiquënë nē pönēnāni ināni incæte, Mönö eö togænte quëwengæimpa, ante nē änönāni ingadānimpā. Ìninqe tömēnāni, Oodeoidi ināmaï ināni inānite Wængonguï Tæiyæ Waëmö Önöwoca do wææ guicampa, ante adinqe edæ guiñente wædānitapa. 46 Edæ Codōnedioidi Wængonguï Önöwoca ingante ewocadinque wadāni nāni tede bai wadāni nāni tede bai iñontobæ apænedinqe Wængonguï ingante waa adinqe waa todāni eñente wædinque oodeoidi mänömaï guiñente wædānitapa. 47 Adinqe Pegodo tömengä tönö nē pöninäni inānite,

—Tömēnāni mönö bai Wængonguï Tæiyæ Waëmö Önöwoca do ænināni inānite adinqe tömēnāni, Æpænē guidōmi guiiboe, añönänite mönö ædö cæte wææ anguï. 48 Äninqe Pegodo angä eñēninqe tömēnāni Itota Codito emöwo apænedinqe æpænē guidönāni guidānitapa. Æpænē nē guidēnāni iñömö ayæ Pegodo ingante, Tæönæ mönitö weca quëwencæbiimpa, änāni Ao ante quëwengacäimpa.

11

Eedotadëë iñömö nē pönēnāni inānite Pegodo apæ necä

¹ Oodeoidi ināmaï ināni incæ Wængonguï nänö änö ante do Ao ante eñēnānipa, ante wadāni Oodeabæ tömäo cægonte tededānitapa. Ìninqe Itota

nänö da gogainäni tönö wadäni nē pönēnāni tönö mäninö ante do eñēnānitapa. ² İninque Pegodo Eedotadēē iñömö æite quēwēñongante nē pönēnāni incæ pancadāniya, Mönö eö togængæimpa, ante nē änönāni inte tömengä ingante püinque, ³ iimaï ante änānitapa.

—Quimæ bitö togænāmaï ināni weca incæ go guidinque cæmitapa töö.

⁴ Äñönānite Pegodo, Æbänö cæte i, ante adodö adodö ante apæncä eñēnānitapa.

⁵ —Botö Cope näni quēwēñömö gote quēwēninque Wængonguï ingante apænedinque cæwēnente ongöninque wüimonte bai atabopa. Wüimonte bai ayömote weocoo ñænæncoo möincoo bai æmænecoo yao æmænecoo yao oncönete bai öönädē inö pædæ wæænonte bai ayömote botö weca wææ wäi wocæ atabopa. ⁶ Wäi wocæñö botö acæte ante guimö ayömo babæidi bai ināni inte ocaguï mongænāni, æmontaique mongænāni, öömä emænāni yæmiñæncoo inö ongönāni bai atabopa. ⁷ Ayæ wacä botimote, “Pegodo, ængæ gantidique wænonte cæe.” ⁸ Angä eñēninque botö, “Awënë eñēmi. Baacä ingä anewëe. Näwaaqingä ināmaï iñongante cöwē cænāmaï imoi ae.” ⁹ Ante wæyömote öönädē apæncä botö nē eñēningä godömenque äninque, “Wængonguï nänö ædæmö mēnongadongä ædö cæte baacä ämii.” ¹⁰ Äninque tömengä wæætē wæætē mempoga go adopoque adodö angä ate ñænæncoo bai adodö öönädē ingæ æi atabopa. ¹¹ Mäniñedē Tetadea nē quēwengä da pönongä pöninque onguïñænāni mengäa go adocanque botö imote ante diqui

mincæte ante botö owocö boyæ tæcæ pöninge næ gongænänitapa. ¹² Ayæ Wængongui Önöwoca incæ botö imote angä eñëninge botö, Wadäni inänipa, ante pünämaï imo inte guiñenämaï tömënäni tönö ee gotabopa. Ayæ botö tönö iinäni iñömö tei ganca inäni mänimpodäni godongämæ godänitapa. Gote ayömöni, Codönedio oncö impa, ante adingue go guitamönipa, ante Pegodo apænecantapa. ¹³ Ayæ, Go guiite eñëñömönite Codönedio iñömö, Æbänö cætimpa, ante apænedingue mönitö imönite iimaï ante apænecantapa. Botö oncönë Wængongui anquedo a ongongä atabopa. Ayæ botö imote äninge anquedo iñömö, “Bitö Cope iñömö ämi wadäni gote Timönö Pegodo näni ängängä ingante äñete poncædänimpa. ¹⁴ Tömengä pöninge, Mïni quëwencabo æbänö cæte wænämaï quëwenguimïni, ante bitö imite apænecä eñencæbiimpa.” Mänömainö ante Wængongui anquedo apænecä eñente cætabopa, ante Codönedio mönitö imönite apænecä eñentamönipa.

¹⁵ Mäninganca apænedingue Pegodo iimaï angantapa. “Wængongui Tæiyæ Waëmö Önöwoca mä pöninge mönitö imönite nänö guidö bai ñowo iñömö botö tæcæ apænecæ cæyömo adocä edæ tömënäniya adobaï wææ guicantapa. ¹⁶ İninge botö, Mönö Awënë Itota æbänö angacäi, ante adodö ante pönentabopa. ‘Wäö wodi iñömö æpænë guidongacäimpa. Wængongui Tæiyæ Waëmö Önöwoca guiquënë mïnitö baonga pö guicæcäimpa,’ ante Itota do apænecäcäimpa, ante botö önöwënenque pönentabopa. ¹⁷ Ayæ, Mönö Awënë Itota Codito ingante wede pönëmöni

ate Wængongui tömengä Tæiyæ Waëmö Önowoca ingante da pönongä æntamönipa. Nöwo tömënäni adobaï wede pönënäni ate Wængongui mönitö imönite nänö da pönongaingä ingante tömënäniya adobaï da pönongä ænänipa, ante pönentabopa. Mänömaï cæcampa, ante pönëninque botö, Ædö cæte Wængongui ingante Baa anguimoo.”

¹⁸ Ante Pegodo, Æbänö cætimpa, ante tömänö ante edonque apæneca ëñëninque tömënäni wæætë, Mönö ædö cæte godömenque püinte anguii, ante piyænë cæte apænedänitapa.

—Nöwo idæwaa ämönipa. Wadäni oodeoidi inämaï inäni incæ mönö bai, Idæwaa wënæ wënæ cæte awædö, ante guingo imonte wädäni ate Wængongui pönö waadete cæcä ate quëwënänipa, ante ñöwo tæcæ mä ëñëmönipa, ante todinque Wængongui ingante edæ watapæ apænegadänimpa.

Antioquiya iñömö Itota ingante näni pönencabo

¹⁹ Mäningä Etebä wodi ingante wænöninque oodeoidi godömenque wadäni në pönënäni inänite wënæ wënæ togænte pänäni wædinque në pönënäni iñömö wodii winöninque näwæ gote Pënitia ganca Tipidebæ ganca Antioquiya ganca godänitapa. Godinque tömënäni, Itota Codito æbänö cægacäi, ante oodeoidique inänite apænedinque wadäni inänite apænedämaï ingadänimpa. ²⁰ Incæte Tipidebæ iñömö quëwënäni tönö Tidënebæ iñömö quëwënäni pancadäniya Antioquiya iñömö godinque guidiegoidi inänite adobaï Itota Codito ingantedö ante watapæ apænedäni ëñënänitapa.

²¹ Iinque mönö Awënë tömënäni tönö godongämæ

cæcā beyænque nanguī ināni tæcæ pönëninque tōmengä gämænō pönānitapa.

²² Mänōmaī pönënanīpa, ante tededāni eñëninque Eedotadëe iñōmō Codito ingante nāni godongāmæ pönencabo incæ Bedënabee ingante, Bitō Antioquiya iñōmō godinque ate pōe, ānāni. ²³ Māniñōmō gote pōninque Bedënabee iñōmō, Antioquiya iñōmō quëwënāni inānite Wængonguī waadete pönō cæcampa, ante adinque nanguī todinque tōmānāni inānite, Minitō mīmōno wede pönëninque mōnō Awënë miñæ cōwë quëwëedāni, ante nanguī angantapa. ²⁴ Bedënabee iñōmō Wængonguī Tæiyæ Waëmō Ōnōwoca ingante ewocadinque nē wede pōnengä inongä inte nē waa cæcā inongäimpa. İninque tōmengä apænecā eñëninque tōmënāni nanguī ināni mōnō Awënë gämænō pongadānimpa.

²⁵ Bedënabee wæætë Taodo ingante diqui mincæte ante Tadoto iñōmō gote, ²⁶ adinque tōmengä ingante Antioquiya iñōmō ænte pongantapa. Pōninque adoque wadepo quëwëninque tōmënāni Codito ingante nē tee empote quëwencabo tōnō cōwë godongāmæ ponte apænedinque nanguī ināni inānite odōmonte apæneda eñënanītapapa. Ayæ Antioquiya iñōmō quëwënāni Codito ingante nē tee empote quëwënāni inānitedō ante apænedinque, Coditoidi inānipa, ante mā pemōninque apænedōnānimpa.

²⁷ Ayæ Wængonguī beyæ nē apænedāni pancadāniya māniñedë Eedotadëe quëwëninque Antioquiya pönānitapa. ²⁸ Tōmënāni nāni Wængonguī beyæ apæneincabo incæ adocanque

Agabo näni änonnä iñömö Wængongui Önowoca ingante ewocate apænedinque, Mönö waocabo quëwëñömö tömämæ cængui oo dæ ba adinque mönö gæwænte wæquimämo baquinö angüenë, ante angacäimpa. İninque iincayæ ate Codaodio Awënë ingäñedë Agabo nö nänö äninö bai do batimpa. ²⁹ Ba adinque Antioquiya näni pönencabo godongämæ pönëninque, Mönö tönñadäni iñömö Oodeabæ quëwëninque edæ tepæmpo gæwænte wädänipa cæmöö. Tömënanä beyæ mönö godonte æinta pædæ godöninque adocanque eyepæ inte nänö godonganca wacä eyepæ inte nänö godonganca godongæimpa, ante godongämæ Ao änanitapa. ³⁰ Äninque eyepæ pædæ pönöninque Bedënabee tönö Taodo ïnate, Æente mäo godinque në pönënanä ïnanite në aadäni në Picænäni nempo pædæ godöminä æncädänimpa, ante da pönönäni ænte gote godöna ængadänimpa.

12

Tantiago wængä ate Pegodo ingante tee mönedänipa

¹ Mäniñedë Codito ingante näni godongämæ pönencabo iñönänite awënë odeye Edode iñömö pancadäniya ïnanite wënæ wënæ cæcæte ante angä bæi ongonte ængadänimpa. ² Mänömaï cædinque tömengä angä ëñëninque Wäö tönñacä Santiago ingante yaëmenca wænönäni wængacäimpa. ³ Santiago wodi mänömaï wængä adinque oodeoidi todäni ate wædinque Edode, Godömenque cæbo ate nanguï todinque botö imote waa acädänimpa, ante cædinque Pegodo ingante adobäi

bæi ongongantapa. Edæ päö yedæ æmpoqui
 ömæmō ī nāni ææmæ cæyedē māniñedē tōmengä
 ingante bæi ongonte ængantapa. ⁴ Mänömaī
 æninque Edode iñömō, Oodeoidi Patowa ææmæ
 iinque bedāni ate botō Pegodo ingante ænte
 tadonte tōmānāni ayōnānite apænte ancæboimpa,
 ante pōnēninque tōmengä ingante tee mōnecantapa.
 Tee mōnedinque Edode godōmenque angä
 ēñēninque tontadoidi mengäa go mengäa nāni cabo
 pō wææ wānonte goyōnāni wacabo adopodāni pō
 wææ wānonte godōnānimpa. Mänömaī wacabo
 pō wacabo pō cædinque mencabodāniya go
 mencabodāniya wæætē wæætē ponte wææ
 wānonte godōnānimpa. ⁵ Īninque Pegodo ayæ
 tee mōnete ongōngäimpa. Incæte tōmēnāni
 Codito ingante godongämæ nāni pōnencabo
 Wængongui ingante tōmengä beyæ cōwē nanguī
 apænegadānimpa.

*Pegodo ingante Wængongui incæ ñimpo cæcä go-
 campa*

⁶ Pegodo ingante tontadoda mēnaa tōnō
 æmæncaipo æmæncaipo yaēmengō tæī goti
 wincapodāni wæyongante wada odemō cōwē wānō
 cōnōnaimpa. Īninque Edode tōmengä nānō apænte
 anguiōnæ ado woyowotæ Pegodo mänömaī goti
 winte wædongä inte mō ñongantapa. ⁷ Īñontobæ
 Wængongui Awēnē nānō da pōnōningä anquedo
 a ongongantapa. Tee mōnete oncōnē ñāō
 gongæntapa. Pegodo mō ññongante Wængongui
 nānō da pōnōningä iñömō æmætæ inō tao
 cædinque, “Pegodo, ñāni ömæmonte quingæ ængæ
 gantibi.” Añongä daagömē nāni tæī wīni incæ

tōmenque ñimæncæ tæ wæængatimpa. ⁸ Ayæ, “Bitō weocooga pacadeyænta pacadeyænte awæncata wēwabi.” Angä ēñente cæcä adinque Wængongui anquedo godōmenque, “Yacoo wīni caadinque botō miñæ pōe.”

⁹ Angä ēñēninque Pegodo, Awii cæmonte awædō. Anquedo dicæ ponte cæcää. Mänōmaī ponte cæcampa, ante botō wīimonte bai aboimpa, ante wawique pōnengä incæte anquedo miñæ tee empote tao gocantapa. ¹⁰ Mänōmaī tao godinque guicōnē nē wänōna ongōñōna wodo tebæ tao godinque yabæcōnē tamongademō nē wänōna ongōñōna wodo tebæ tao godinque yaēmewæ odemō tōmēnāni quēwēñōmō ante nāni tao goquīnemō ganca pōnatapa. Mänīnemō ganca ponte ongōñōna yaēmewæ odemō incæ tōmenque æ ænete bayō tao godinque taadō adodonque cægōna ate anquedo iñōmō ingæ gocä ate Pegodo guiquēnē adocanque a ongongantapa.

¹¹ Adoboque a ongōmopa, ante wædinque tōmengä wæætē nāmā pōnengä badinque, “Æ. Nāwangä incæ do tate ēñēmopa. Edode nempo wæwēninque botō oodeoidi nāni piīnō wæquēnēmo imo adinque Wængongui angä ēñēninque tōmengä anquedo ponte botō imote gā pe æmpote ō ængä ate aamō cæbopa, ante tæcæ pōnēmopa.”

¹² Ante pōnente wædinque Pegodo wadæ godinque Wäō Mäadoco nāni ānongä tōmengä badä Mäadiya oncō boyæ ponte næ gongængantapa. Mänincōnē wadāni nē pōnēnāni incæ do pōninque Wængongui ingante godongāmæ apænee cōnōnānimpa. ¹³ Pegodo iñōmō yabædemō ongonte aa peyongä baquecä nē ēacä ingante nē cæcä

inte tōmengä emōwo Adoda iñömō eñencæte ante pongantapa. ¹⁴ Ponte eñeñongä Pegodo incæ aa pecä eñëninque watapæ tote wædinque tōmengä wii pönëninque odemö wi ænedāmaï pogodo gote edæ wadæ guidinque, Pegodo incæ oncodo a ongongä tamëñedāni. ¹⁵ Ante apæ necä eñëninque tōmënāni wæætë,

—Adoque antedö amini.

Ante wæyönāni tōmengä, Nāwangä impa, ante ancaa angä eñëninque tōmënāni,

—Wa. Pegodo ingante nē aacä anquedo ïmaingampa.

¹⁶ Ante tedeyönāni Pegodo iñömō ayæ aa pete ongönongäimpa. Ayæ ponte wi ænete ayönāni Pegodo ingante adinque ancai guiñente wædānitapa. ¹⁷ Tōmengä wæætë, Apocæñë ïedāni, ante önompocaque compo cæcä adinque pæ wëneyönāni tōmënāni ïnānite apæ necantapa. Botö tee mönete wæyömote Wængongui æbänö pönö cæcä ate tate pömoo, ante tōmänö ante adodö ante apænedinque,

—Botö apænebo mīni eñëñö ante mīnitö wæætë wacä Tantiago ingante apænedinque wadāni mönö tönñadāni ïnānite apænemīni eñencædänimpa.

Äninqe Pegodo wayömö wadæ gocantapa.

¹⁸ ïimö wæñö ñäö bayonte tontadoidi guiquënë, Pegodo ædönö gote dæ angää, ante nanguï Yæ yæ ante cædānitapa. ¹⁹ Mänömaï cætimpa, ante apænedāni eñente wædinque Edode angä diqui diqui mīñönāni Pegodo ayæ dæ angantapa. ïninqe nē wææ wänönināni ïnānite Edode, Æbänö

cætii, ante ancaa angä wædinque tömënäni, Mönö ædö cæte angüii, ante wæyönänite tömengä wadäni inänite angä capo wænönäni wængadänimpa. Edode tömë Oodeabæ wadæ tao godinque Tetadea gote quëwengacäimpa.

Edode wængampa

²⁰ Tido iñömö quëwënäni tönö Tidöo iñömö quëwënäni inänite awënë Edode wodi mäniñedë ênogate ænguï bacä adinque tömënäni wæætë godongämæ pönente Ao äninque Edode weca apæ necæ pönänitapa. Tömënäni, Mönö iñömö awënë odeye Edode ömæ quëwënäni pönönäni æninque mäniñonque cænte quëwëmompä, ante wædönäni inte tömengä ingante, Bitö piñämäi inte piyænë cæbi quëwëmönie, ante ancæte ante pönänitapa. Pöninque tömënäni Edode oncönë owodäni inänite në aacä Bodato ingante waa cædinque tömengä ingante änäni Ao ante tömengä wæætë Awënë Edode ingante tömënäni beyæ apæ necä êñengacäimpa. ²¹ Edode iñömö, iñönæ ba ate botö ponte apæ necæboimpa, ante tömengä nänö äniönæ iñque ba ate tömengä awënë weocoo wæmoncoo wëñate pöninque awënë nänö apænte ante containpaa tæ contadinque tömänäni ayönäni tömënäni inänite apæ necantapa. ²² Apæ necä êñëninque tömänäni Yæ yæ äninque, “Wii waocanque tedecä êñëmompä. Wængonguïdi nani tedepämo bai tedecä êñëmompä.” ²³ Ante Yæ äñönäni Edode wodi wæætë, Näwä Wængonguinque në waa cæcampa, ante angüenengä incæte änämäi pæ wëenecä adinque tömengä ingante Wængonguï

anquedo wæætē godö cæcä ate ayago cæ æmæwo wængacäimpa.

24 Incæte Wængonguī nänö angainö ante mǎniñedē wayömö mǎo wayömö mǎo apænedāni eññenique nanguī ināni mōnō Awēnē ingante nē wede pōnēnāni badānitapa.

25 Bedēnabee tōnō Taodo iñōmō Eedotadēē iñōmō godinque tōmēna nāna cæquēnēnō tōmānō iñique cædinque wadæ godinque Wäö Māadoco nāni ānongā ingante tōmēna tōnō æninue adodō godānitapa.

13

Wængonguī angä eññente Bedēnabee tōnō Taodo godapa

1 Antioquiya iñōmō Itota Codito ingante nāni godongāmæ pōnencabo inōnāni iñōmō pancadāniya Wængonguī beyæ nē apænedāni iñōnāni pancadāniya guiquēnē nē odōmonte apænedāni inōnānimpa. Bedēnabee tōnō wacä Timōnō Nēegodo nāni ānongā inōnaimpa. Tidēnebæ nē quēwēningä Dotio inongäimpa. Pancabaa awēnē Edode tōnō godongāmæ nē pædingä Mänäenē tōnō Taodo inōnaimpa. Mänimpodāni ingadānimpa. 2 İninue tōmānāni godongāmæ mōnō Awēnē ingante, Tæiyæ Waēmö imipa, ante watapæ apænecæte ante cænāmaī apæneyōnānite Wængonguī Tæiyæ Waēmö Önōwoca incæ iīmaī angacäimpa. “Bedēnabee tōnō Taodo mīnitō tōnō nē cæda iñōnate āmīni botō beyænque cædinque nānēnē godinque botō ānīnō ante cæcædaimpa,” angacäimpa.

³ Īnque ĭnque cænāmaī inte apænedinque tōmēnāni Bedēnabee tōnō Taodo ĭnate gampocadinque Wængonguī ingante apænedinque ānāni ate wadæ gogadaimpa.

Wāā tēiwænē Tipidebæ gote apæneda ēñēnāni

⁴ Bedēnabee tōnō Taodo ĭñōmō Wængonguī Tæiyæ Waēmō Ōnōwoca mănōmaī angā godīna inte Tedeotia ĭñōmō wæi wipodē ñænæmpodē go guuidinque wogaa godinque wāā tēiwænē Tipidebæ nāni āmæ godatapa. ⁵ Tadamīna nāni quēwēñōmō pōninque oodeoidi odōmōincōnē wacōnē go guī wacōnē go guī cædinque Wængonguī nānō apænedō ante nōingā apæneda ēñengadānimpa. Ayæ Wāō tōmēna mīñæ godinque tōmēna beyæ nē cæcā ĭnongāimpa.

⁶ Mănōmaī wāā tēiwænē tæcæguedē wodo tebæ cægōninque yæcado godinque Papo nāni quēwēñōmō ganca pōnānitapa. Pōninque tōmēnāni wacā idō tōmengā ēmōwo Baditota ingante māmō bee tēnānitapa. Tōmengā ĭñōmō oodeocā ĭnongā inte, Wængonguī beyæ nē apænebo ĭmopa, āninque nē babæ ānongā ĭnongāimpa. ⁷ Tōmengā wāā tēimæ awēnē Tedeguo Pabodo nāni ānongā tōnō godongāmæ nē cædongā ĭnongāimpa. Awēnē Tedeguo guiquēnē nē ocai encadongā inte Wængonguī nānō ānō ante ēñēinente wædinque Bedēnabee tōnō Taodo ĭnate āñete māmongā pōnatapa. ⁸ Tōmēna ponte apæneyōnate idō Baditota guiquēnē guidiego tededō Edīma nāni ānongā ĭnongā inte edæ, Awēnē nē pōnengā badāmaī incæcāimpa, ante wææ cæcæte ante pīinte cæcantapa. ⁹ Īnque Taodo Pabodo nāni ānongā ĭñōmō Wængonguī Tæiyæ Waēmō Ōnōwocaque

ēwocadinque idō ingante gomō adinque, ¹⁰ tōmengā ingante angantapa.

—Bitō iñōmō wēnæ awēnē nānōmōmi bai imidō anguēnē. Iñæmpa, Wadāni quiēmē nō impa, ante oda cæcædānimpā, ante bitō piinte pōnēwēnonque entawēninque bitō nē babæ cædōmi imipa tōō. Wængonguī nānō tōinō ponguīnō ante idiquibæ bacæimpā, ante bitō æpogamē incæ cæbii. ¹¹ Nōwo iñōmō Wængonguī Awēnē nē piñægā inongā inte bitō imite pancæcāimpā. Tōmengā pōnō gam-pomongā ate bitō babetamōmi badinque nænque ñāō tamōnō wantæpiyæ tōmengā nānō ānimpoga adāmaī incæbiimpā.

Åñongā boguīmā bai do wææ iñinque wēmō emōninque Edīma Baditota nāni ānongā gampo gampo cædinque, Æcānō botō imote tōō æmænte māoda goquīmoo, ante diqui diqui mingantapa. ¹² Mānōmaī bacā adinque wāā tēimæ awēnē wæætē Wængonguī Awēnē ingantedō ante iñāna nāna odōmonte apænedō ante pōnente guiñente wædinque nē pōnengā bagacāimpā.

Pitidiabæ Antioquiya godinque cædapa

¹³ Pabodoidi iñōmō Papo iñōmō wadæ godinque wipodē ñænæmpodē wogaa taodinque Pampidiabæ pōninque Pedegue iñōmō ti wææñōnāni Wāō wæætē adodō Eedotadēē gocæte ante tōmēna inate emō cæte wadæ gogacāimpā.

¹⁴ Tōmēna wæætē Pedegue wadæ godinque Pitidiabæ pōninque Antioquiya nāni quēwēñōmō pōnatapa. Ayæ tōmēnāni guēmanguīōnæ iñinque bayō oodeoidi odōmōincōnē pō guiite tæ contadatapa.

¹⁵ Tæ contate a cōñōna Mōitee wodi nānō

yewæmongainta adinque Wængongui beyæ nē apænegainäni näni yewæmongainta ate apænedänitapa. Ayæ mäniñömö awënëidi iñömö tömënäni weca ongongä adocanque ingante apænedinque,

—Bitö ñowo pöna inate mäo äninque iimaï apænegäbiimpa, Iñäna, möni tönñamäna eñëmäna. Iñömö ongönäni wampo pönëninque tæi gongænte ongoncädänimpa, ante cædinque minatö ædæmö apænemäna eñenguñänii, ante ämi apænebaïnapa.

¹⁶ Änäni eñente mäo angä eñëninque Pabodo iñömö ængæ gantidinque önompoca compo compo cædinque tömënäni inänite apænegantapa.

—Minitö, pancamäniya idægoidi iñöminite pancamäniya wämi incæ, Näwä Wængongui inongä ingampa, ante nē guñente wämäni iñöminite botö tömämäni iminite apænebo eñëedäni. ¹⁷ Idægoidi, minitö iminite täno apænebo eñëedäni. Mönö idægocabo Wængongui incæ mönö mæmæidi inänite apænte ængä ate wadäni nëmæ Equitobæ iñömö quëwëñönänite tömengä pönö cæcä ate tömënäni tæiyænäni yebængadänimpa. Ayæ Wængongui tæi piñængä inte ingæ æmæninque töö æmænte mäocä wadæ gogadänimpa. ¹⁸ Godinque tömënäni coadenta wadepo mänimpoga önomæca cægöninque æbämë wënæ wënæ cæte quëwënäni ate wæcä incæte tömengä pänämaï inte ata cæpote ænte mäocä gogadänimpa. ¹⁹ Ayæ wadäni Cänaämæ quëwënäni önompo æmæmpoque go mencabodäniya iñönänite wido cædinque Wængongui, Tömënäni ömæ inï minitö ömæ wæætë bacäimpa, ante mönö

wæmæidi inānite pōnongā ængadānimpa. ²⁰ Edæ coatodo tiento tincoenta wadepo mānimpoga wabæca quēwēnāni ate māniñedē ate Wængonguī, Minitō ōmæ, āninqe mōnō wæmæidi inānite pōnongā æninqe quēwengadānimpa.

Ante apænedinque Pabodo, Idægoidi dodāni æbānō cægadāni, ante godōmenque apænecantapa. “Mānimæca ponte wantæpiyæ quēwēnāni ate pancadāniya nē apænte ānāni iñōnānite Wængonguī angā ate adodāni awēnēidi bai badinque wayedē wacā adocanque wayedē wacā adocanque wayedē wacā adocanque aagadānimpa. Tāmoedo Wængonguī beyæ nē apænecā nānō ponte apæneganca mānīnānique aagadānimpa.

²¹ Īncayæ ate mōnitō dodāni iñōmō Wængonguī ingante apænedinque, Bitō adocanque ingante āmi ate tōmengā tæiyæ awēnē bacæcāimpa, ante ancaa ānāni ēñente wædinque tōmengā wæætē Beencamīnō wodi pæingā incæ Titæ wengā Taodo ingante angā bagacāimpa. Tæiyæ awēnē badinque tōmengā coadenta wadepo mānimpoga iñonte aagacāimpa.

²² Ayæ ate Wængonguī wæætē, Idæwaa, ante Taodo wodi ingante wido cædinque Dabii wodi ingante wæætē angā tæiyæ awēnē bagacāimpa. Adocā Dabii ingantedō ante apænedinque Wængonguī, Botō waa pōni entawēmo bai Yæte wengā Dabii iñōmō adobai entawengā abopa. Tōmengā iñōmō botō ānō bai edæ tōmānō cæqingā ingampa, ante apænegacāimpa.”

²³ “Wængonguī doyedē, Codito ængā beyænque idægoidi quēwencādānimpa, ante do nānō angainō bai ñōwo cædinque adocā Dabii pæingā Itota

Codito ingante da pönongä pongacäimpa. ²⁴ Itota ayæ pönāmaï iñongä Wäö wodi idægoidi tömänāni inānite apænedinque, Minitö, Idæwaa wënæ wënæ cæte awædö, ante Wængonguï gämænö wadæ pöningue æpænë guiedāni, ante apænegä eñengadānimpa. ²⁵ Ayæ adocä Wäö incæ, ‘Botö æbodö imoo, ante pönëmini. Minitö pönënö bai wii imopa. Botö do pönimo iñömote mini nē pönëngä iñömö ayæ poncæcäimpa. Tömengä ingante adinque botö waëmö imopa diyæ tömengä awæncata godö ñi cæquimoo.’ Ante Wäö tömengä nänö cæquënënö wodo iinque cæyedë apænegacäimpa.”

²⁶ Ante apænedinque Pabodo godömenque apænegantapa. “Iñānāni, pancamīniya Abadö wodi pæimīni iñömīni pancamīniya wamīni incæ Wængonguï ingante guñēmīni iñömīni edæ botö tömāmīni imīnite apænebo eñeedāni. Māninö, Codito ængä beyænque quëwencæminimpa, ante Wængonguï tömämö beyæ pönö apænegacäimpa. ²⁷ Eedotadëë quëwënāni tönö tömënāni awënëidi iñömö, Itota æcänö ingää, ante pönënāmaï ingadānimpa. Iinque guëmanguïönæ iñö guëmanguïönæ iñö Wængonguï beyæ nē apænegaināni nāni yewæmongainta cöwë adāni incæte tömënāni, Itota nänö wænguinque wënæ wënæ cæcä ingampa töö, ante babæ ante apænte änewëninque edæ dodāni nāni yewæmonte angainö bai iinque cädānitapa. ²⁸ Tömënāni, Itota nänö wænguinque æbänö wentamö mongængää, ante cöwä ayönāni edæ dæ ampa. Ante wædinque awënë Pidato ingante apænedinque tömënāni,

Itota ingante ämi wænönāni wængäe, ante ancaa änāni eñēninque Pidato Ao angä wænönāni wængacäimpa. ²⁹ İninque Itota ingante awäa timpote wænöninque tömēnāni dodāni tömengä ingante ante nāni yewæmonte angainō bai tömänö ante iinque cädānitapa. Mänömaï cädāni ate wængä ate tömēnāni änāni ate tömengä miñæ godināni wæætē tömengä nänö ongöwäa pædæ æmpodique önompo o togæmpote wæi önöwa o togæwadinque pædæ wæænöninque edæ ænte mao daga wengadānimpa.”

³⁰ “Incæte Wængongui guiquēnē do wæningä ingante, Nāni ömæmöe, angä ñāni ömæmonte quëwengampa. ³¹ Nāni ömæmöninque tömengä tæönæ iñonte pö pö cædinque a ongöñongante edæ tömengä tönö wëēnēnedē Gadideabæ quëwēninque Eedotadēe iñömö nē pongaināni iñömö edæ tömengä ingante wæætē adānitapa. İninque tömēnāni iñömö nē adināni inte waodāni inānite, Itota näwangä ñāni ömæmonte müngä quëwengampa, ante nē apænedāni inānipa.”

³² Ante apænedinque Pabodo, “Dodāni inānite Wængongui, Minitö beyæ botö cöwē pönö cæcæboimpa, ante apænegacäimpa, ante eñēmīnitawo. Mäninö ante watapæ nänö apænegainö ante mönitö ñöwo iïmai ante apænemönipa. ³³ Mäninö tömengä dodāni inānite nänö angainō bai ñöwo tömēnāni mömoidi beyæ iinque cædinque Wængongui Itota ingante, Nāni ömæmöe, angä ñāni ömæmongacäimpa. Tömengä ñöwo iinque cæcampa, ante Ämotamini nāni Angainta tänota gao wæintaa Wængongui

beyæ iīmaī ante yewæmongatimpa. ‘Botō Wēmi inōmi imipa. Nōwoönæ bitō Mæmpobo babopa.’
³⁴ Ayæ mäninō, Tömengä Wengä do wæningä iñongante Wængonguī angä nāni ömæmōninque baö nñömädāmaī incæcäimpa, ante pönëninque Itaiya wodi iīmaī ante Wængonguī beyæ ante yewæmongacäimpa. ‘Awënë Dabii wodi ingante apænedinque botō, Tæiyæ waëmō botō cædō bai cædinque cōwë ædæmō aate cæcæboimpa, ante nō botō angainō bai cædinque mīnitō imīnite pönō adobai cæcæboimpa,’ ante Wængonguī angampa, ante yewæmongacäimpa. ³⁵ Ayæ mäninō ante wataa adobai Wængonguī ingante apænete bai Dabii wodi yewæmongacäimpa. ‘Bitō imite nē Cæcä iñömō bitō cædō ante cōwë cædongä inte wængä adinque bitō ædō cæte tömengä ingante ænāmaī inte ee abi baö nñömäaquiringä,’ ante yewæmongacäimpa.”

³⁶ “Awënë Dabii wodi guiquënë Wængonguī nānō änönō ante eñëninque adoyedë quëwënāni beyæ waa cædingä inte edæ nāñe wæninque tömengä mæmæidi weca æiyongä tömengä baö ini nñömænte bagatimpa. ³⁷ Wæætë Wængonguī, Nāni ömæmōe, angä eñente nē ömæmongaingä iñömō tömengä baö nñömädāmaī ingatimpa. ³⁸ Iñinque onguīñæmīni botō tönīñamīni eñëedāni. Itota pönō cæcä beyænque mōnitō mīnitō imīnite apænedinque, Wënæ wënæ mōnō cædō ante adinque Wængonguī pönō nīmpo cæcä ate quëwëmompa, ante apænemōni eñëmīnīpa. Mōitee wodi nānō wææ angainō ante eñente beyænque mōnō iñömō dicæ nō cæte quëwëmō imongaa.

39 Wæætē māningā onguiñægā iñömō Itota iñömō tōmengā nō pōni nānō entawēnō ante pōnongā ænte entawēmō beyænque mōnō nē pōnēmō tōmāmō wæætē Wængongui ayongā edæ nō cæte quēwēmō inōmō imōmpa. 40 İinque Wængongui beyæ nē apænegaïnāni iïmaï ante nāni apænegaïnō ante pōnēninque mīnitō iñömō, Mōnitō imōnite wīi bacæïmpa, ante nāmā wææ aquēnē quēwēedāni. İïmaï ante edæ ämotamīni ante baï yewæmongadānimpa.

41 ‘Mīnitō nē badete towēmīni inte cōwā aquēnē quēwēedāni.

Botō cæbo adinque mīnitō ancai guiñente wæcæmīnimpa.

Mīnitō ayæ mīimīni quēwēñōmīni edæ botō mā pōni cæcæboïmpa, ante pōnēmīniyaa.

Wængongui mănōmaï cæcæcäïmpa, ante edonque pōni apænedāni baï

mīnitō wæætē, Babæ ancædō, ante wæcædōmīnimpa.’

Ante nāni yewæmongainō ante adinque edæ badete todāmaï iedāni,” ante Pabodo apænecantapa.

42 Mănōmaïnō ante iinque apænedinque Pabodo tōnō Bedēnabee tōmēnāni odōmōincōnē ongonte oncodo tao goyōnate Antioquiya iñömō quēwēnāni iñömō, Wacā guēmanguïönæ bayonte mīnatō ñōwoönæ mīna apænedō baï godōmenque apænemīna eñencæmōnimpa, änānitapa. 43 Ayæ godongāmæ nāni ponte ongönincabo tao goyōnāni oodeoidi pancadāniya ayæ oodeoidi baï nē bagaināni adobaï Wængongui ingante guiñente quēwēnāni nanguï ināni iñömō Pabodo tōnō

Bedēnabee inate edæ tee empote godäni. Adinque iñäna wæætē tōmēnāni inānite apænedinque, Wængonguī waadete nānō pōnō cædōnō ante pōnēninque mīnitō cōwē ñimpo cædāmaī tæi ongōninque edæ waa quēwēedāni, ante nanguī apænedatapa.

⁴⁴ Ayæ adoque Wængonguī itædē go ate tōmēnāni nāni guēmanguïönæ bayonte māniñōmō quēwēnāni wodo tōmānāni Wængonguī Awēnē nānō änō ēñencæte ante godongāmæ pōnānitapa.

⁴⁵ Nanguī ināni mănōmaī pōnāni ate wædinque oodeoidi guiquēnē pīinte badinque, Babæ ante ānewengampa, ante Pabodo ingante godō pīinte tedewēnānitapa. ⁴⁶ Mănōmaī tedewēñōnānite Pabodo tōnō Bedēnabee wæætē guiñēnedāmaī inte apænedatapa.

—Mīnitō oodeoidi imīni inte edæ tāno ēñencæmīnimpa, ante cædinque mōnatō Wængonguī nānō änō ante edæ mā apænedinque mīnitō imīnite tāno apænequēnēmōna intamōnapa. Mīnitō iñæmpa mīni cōwē wænāmaī quēwenguīnō ante apæneyōmōna mīni apænte pangā wæquinque edæ Baa āmīnīpa. Ante wæmōna inte mōnatō ñōwo emō cæte godinque edæ oodeoidi ināmaī ināni weca edæ apænecæ gomōna tamēñedāni. ⁴⁷ Mōnitō Awēnē iīmaī ante mōnatō imōnate angacāimpa.

“Quēwencæmīnimpa, ante botō cægainō ante bitō inguipoga tōmāmæ māo apænedinque Oodeoidi ināmaī ināni beyæ tica ēnente baī cæcæbiimpa, ante cædinque botō bitō imite da godōmo apænecæ gocæbiimpa.”

Ante nē apænegaingä inte Wængongui mönatö imönate angä eñente apænemönapa.

⁴⁸ Mänömainö ante apæneda eñëninque oodeoidi inämaï inäni iñömö, Awënë nänö apænedö waa eñëmönipa, ante watapæ apænedänitapa. Ayæ mönö Awënë doyedë apænedinque, Mänimpodänique wede pönëninque cöwë wädämaï quëwenguinäni incädänimpa, ante tömengä nänö nē angainänique ñöwo pönënanitapa. ⁴⁹ Ininque mönö Awënë tömengä nänö apænedö ante mäo apæneyönäni mäniömæ tömäo quëwënäni eñënanitapa.

⁵⁰ Oodeoidi guiquënë, Pabodo tönö Bedënabee inate mönö wido cæcæimpa, ante cædinque iïmaï cädänitapa. Onquiyænäni näni nē waa adäni inte Wængongui ingante guiñente quëwënäni iñönänite tömënäni tönö onguiñænäni mäniñömö quëwënäni awënëidi bai inte ñænænäni iñönänite oodeoidi, Badogaa, ante nanguï änäni eñënanitapa. Oodeoidi nanguï änäni eñente cædinque mäninäni wæætë Pabodo tönö Bedënabee inate togænte päninque, Mönitö ömæ quëwënämaï, ante wido cädäni godatapa. ⁵¹ Mänömaï cädäni godinque tömëna iñömö, Mänimæ näwate awädö, ante bai cædinque piwacæ piwacæ cædinque Icönio iñömö gocæte ante wadæ godatapa. ⁵² Itota ingante nē tee empote quëwënäni guiquënë watapæ todäni badinque Wængongui Tæiyæ Waëmö Önöwoca ingante ænte ewocadinque edæ waa quëwengadänimpa.

14

Pabodo tönö Bedënabee Icönio iñömö godapa

1 Māniī godinque Icōnio nāni quēwēñōmō pōninque Pabodo tōnō Bedēnabee cōwē nāna cæi bai cædinque oodeoidi odōmōincōnē go guuidatapa. Go guiite apæneyōna, Nō apæneda, ante pōnēninque oodeoidi tōnō oodeoidi ināmaī ināni tōnō nanguī ināni nāni wede pōnenguinque ēñēnānitapa. ² Wæætē oodeoidi incæ pancadāniya nē Baa ānāni inte babæ wapiticæ apænedinque, Iñāna nē wēnæ wēnæ apæneda inate wīi ēñengæimpa. Ante tedewēnāni ēñente wædinque wadāni oodeoidi ināmaī ināni wæætē piinte badinque mōnō tōniñada inate ante wīwa adānitapa. ³ Incæte iñāna wantæpiyæ māniñōmō quēwēninque guiñēnedāmaī inte mōnō Awēnē beyæ apænedatapa. Apæneyōna mōnō Awēnē incæ, Pabodo tōnō Bedēnabee iñōmō botō pōnō waadete cægainō ante nē nō apæneda inōnapa, ante wadāni pōnencædānimpa, ante cædinque tōmēna tōnō godongāmæ cæcā ate tōmēna, Ate pōnencædānimpa, ante mā cædinque bamōnengæ cædatapa.

⁴ Mānōmaī cæda incæte māniñōmō quēwēnāni pancadāniya, Oodeoidi bai pōnēmōnīpa, āñōnānite wadāni guiquēnē, Itota da godongā nē pōna bai pōnēmōnīpa, ante pancadāniya wadō pancadāniya wadō cædānitapa. ⁵ Iñinque oodeoidi tōnō oodeoidi ināmaī ināni tōnō tōmēnāni awēnēidi tōnō godongāmæ pōnēninque, Pabodo tōnō Bedēnabee inate mōnō piinte cædinque dicaca tacamō wæncædaimpa. ⁶ Ante Ao ante cæyōnāni Pabodo tōnō Bedēnabee iñōmō, Mānōmaī ante cædānīpa, ante ēñente wædinque wodii wīnōnatapa. Wodii wīnonte godinque Dicaōniabæ pōninque

tömëna Ditada näni quëwëñömö Dedebe näni quëwëñömö wayömö wayömö godinque, ⁷ mönö Awënë ingantedö ante watapæ mäo godömenque apæneda ëñënönänimpa.

Ditada iñömö Pabodo ingante tacadänipa

⁸ Mäniñömö Ditada iñömö edæ wacä cabæwaingä tömengä önöwa tipæwaa wënæ wënæ ëwacä ëñagaingä inte dao dao godämaingä pægaingä inte tæ contate a ongongantapa. ⁹ A ongöñongä Pabodo ponte apænecä ëñëe congantapa. Pabodo wææmö adinque önöwënenque pönëninque, Ìngä nänö waa bawaquinque në pönengä ingampa, ante do pönente wædinque, ¹⁰ tömengä ingante ogæ tedete,

—Ængæ gantidique adiyæ gongæmi ämopa.

Angä ëñëninque në cabæwaingä incæ quingæ ængæ gantidique dao dao gocantapa. ¹¹ Mäniñömö ongönäni guiquënë Pabodo mänömaï cæcä ate wædinque dicaöniaidi tömënäni tededö yedæ äninque,

—Ìñäna iñömö wængonguina incæ waoda bai bate mönö weca wæænte ongöna abaimpa.

¹² Ante pönente wædinque Bedënabee ingantedö ante apænedinque, Mönö wængongui Deoto ingänö anguënë, ante Deoto pönö pemöninque, Ìngä wæætë në apænecä ingampa, ante pönëninque Pabodo ingante, Mönö wængongui Edëme ingänö anguënë, ante pemönänitapa. ¹³ Ayæ tömënäni quëwëñömö yæcado tömënäni wængongui Deoto oncö mænonte ongönimpa. Deoto qui, ante në godongä iñömö edæ, Pabodo tönö Bedënabee në wængonguina ìnapa, ante wapiticæ pönëninque,

Mönö wængonguina qui, ante tömänäni tönö godoncæ cæcantapa. Mänömainö ante cædinque tömengä näni que cædi ongai ænte pöningue wagadaidi onguĩñænäni inänite yabædemö ænte ponte wænoncæ cæcantapa. ¹⁴ Mänömai cæcä ate wædinque në ponte apænedä Bedënabee tönö Pabodo iñömö, Wiwa cæminipa, ante bai cædinque nämä weocoo wänä ñæningue pogodo mämö nangui ongönäni weca tæcæguedé næ gongæningue,

¹⁵—Iñänäni, quimæ quëwëminii. Minitö waomini iminipa, mönatö minitö bai adobai waomöna imöna apa quëwëminii. Mönatö iñæmpa watapæ möna eñënö ante apænecæte ante pönimöna inte minitö iminite iimaï ante ämönäpa. Iincoo mini waa adincoo incæ edæ, Önoncooque impa, ante adinque minitö mänincooque wido cædinque Wængongui në Quëwengä gämænö pöedäni. Tömengä iñömö öönæ inguipoga gäwapæntibæ në badongaingä inte öönædë quëwënäni tömänäni inguipoga quëwënäni tömänäni gäwapäa quëwënäni tömänäni inänite në badongaingä Wængongui inongä ingampa. ¹⁶ Tömengä wëenëñedë tömämæ quëwënäni nämä pönëningue näni goquïnonque ee acä gogadänimpa. ¹⁷ Incæte tömënäni inänite wii æmæwo emö cæte gogacäimpa. Wæætë edæ, Wængongui æbänö ingää, ante eñencädänimpa, ante cædinque tömengä ñimpo cädämaï cöwë odömongacäimpa. Edæ minitö iminite pönö waadete cædinque Wængongui cöönæ angä inguipoga wææ inique incadepo incadepo cængui eyepæ pönongä cæningue minitö watapæ todinque quëwëminipa.

18 Mänömainō ante Pabodo tönō Bedēnabee wææ cæcæte ante apæneda ēñēnāni incæte godongāmæ ongönāni guiquēnē, Minatō wængonguimīna qui, ante cōwē pōnoncæmönimpa, ante wawique pōnēninque cædānitapa. Wodo edæ pönōñōnānite iñāna godōmenque wææ āna ēñēninque ñimpo cæte wīi pönōnānitapa.

19 Ayæ ate oodeoidi Antioquiya iñömō quēwēninque Icōnio iñömō quēwēninque pō Ditada iñömō pōninque māniñömō godongāmæ ongönāni inānite, İina onguñæna inate mōnō wīi ēñengæimpa, ante ānāni. Ēñēninque godongāmæ Ao āninque Pabodo ingante dicaca tacadāni wæyongā, Æmæwo wængampa, ante pōnēninque tōmēnāni nāni quēwēñömō yabæ inō wēä māo wido cædānitapa. 20 Incæte Itota ingante tee empote quēwēnāni godongāmæ ponte æænīmæ gongænte ayōnāni Pabodo yabæque æmæwo wænte bai ōñōningā inte ængæ gantidinque adodō tōmēnāni quēwēñömō pongantapa. Ayæ iimō ate tōmengā Bedēnabee tönō wæætē Dedebe nāni quēwēñömō adodō gocæte ante wadæ godatapa.

21 Godinque Dedebe iñömō pōninque Codito ingantedō ante watapæ apæneda ēñēninque tōmēnāni nanguī ināni Itota miñæ quēwēnāni bagadānimpa. İinque tōmēna māniñömō idæwaa apænete wadæ godinque Ditada iñömō adodō pō godinque Icōnio iñömō adodō pō godinque Antioquiya nāni quēwēñömō wæætē pōnatapa. 22 Mänömaī wayömō wayömō godinque Itota ingante nē tee empote quēwēnāni inānite bee tēninque Pabodo tönō Bedēnabee nanguī

apæneda eñëninque iinäni godömenque tæi piñænte entawënäni badänitapa. Ayæ tömënäni inänite, Mini pönëno ante ñimpo cædämaï inte godömenque wede pönëninque tæi ongoncæminimpa, ante ædæmö apæneda eñënänitapa. Ayæ waadete apænedinque, Mönö nanguï nantate wædinque Wængonguï Awënë Odeye nempo guicæimpa, ante apænedatapa. ²³ Ayæ wayömö wayömö tömäo godinque Itota ingante godongämæ näni pönencabo weca go guiite ongöninque Pabodo tönö Bedënabee iñömö iïmaï cædatapa. Nè nö cædäni inänite adinque tömäna, Itota Codito ingante mini godongämæ pönencabo iñöminite iinäninque edæ nè aadäni bacædänimpa, ante äna ate mäninäninque nè Picænäni näni änönäni badänitapa. Ayæ cænämaï inte Wængonguï ingante apænete ate tömënäni inänite iñäna, Minitö mönö Awënë ingante wede pönëminitawoo. Tömengä mini nè pönëngä incæ minitö iminite wææ aacæcäimpa, ante apænedatapa.

Tidiabæ Antioquiya iñömö ocæ emcænte godapa

²⁴ Pabodo tönö Bedënabee ayæ Pitidiabæ wodo tebæ godinque Pampidiabæ pönatapa. ²⁵ Mäniñömö ponte Pedegue näni quëwëñömö mönö Awënë nänö angainö ante apænedinque Ataya näni quëwëñömö wææ pönatapa. ²⁶ Mäniñömö pönninque tömäna imæmäa Antioquiya iñömö adodö tacæte ante ñænæ wipodë guuidatapa. Doyedë iñömö tömäna näna mäniñömö quëwente tao goyedë wadäni nè pönënäni inte tömäna inate, Wængonguï pönö waadete godongämæ cæcä ate minatö eyepæ

cæcæmīnaimpa, ante da godongaināni inōnānimpā. Nōwo iñōmō tōmēnāni nāni ānīnō do iinque eyepæ cædīna inte tōmēna adoyōmō nāni da godiñōmō ocæ ēmænte pōnatapa. ²⁷ Māniñōmō pōninque tōmēnā Itota ingante godongāmæ nāni pōnencabo inānite āñete pōnāni ate tōmēnāni inānite apænedinque Wængonguī tōmēna tōnō nānō cædīnō ante adodō adodō tōmānō ante apænedatapa. Oodeoidi ināmaī ināni wede pōnēninque guicædānimpā, ante Wængonguī odemō wi ænete baī cæcā ate do pōnente badānimpā, ante apæneda ēñēnānitapa. ²⁸ Ayæ māniñōmō Itota ingate nē tee empote quēwēnāni tōnō wantæpiyæ quēwengadaimpā.

15

Eedotadēē iñōmō pōninque wæætēdō wæætē ānāni

¹ Māniñēdē onguīñænāni Oodeabæ quēwēnāni pancadāniya Antioquiya iñōmō wææ pōninque nē pōnēnāni inānite iīmaī ante odōmonte wææ angadānimpā. Minitō bagāamīni inte Mōitee wodi nānō wææ angainō baī wīi cæmīni adinque Wængonguī dicæ ængampa quēwenguīmīni. ² Ante wææ ānewēnāni ēñente wædinque Pabodo tōnō Bedēnabee iñōmō, Quīmæ ānewēmīni, ante nāēmæ wææ ānatapa. Ininque Antioquiya iñōmō quēwēnāni guiquēnē Pabodo tōnō Bedēnabee tōnō wadāni nē pōnēnāni inānite, Minitō Eedotadēē godinque Itota nānō da godongaināni tōnō nē aadāni Picænāni inānite bee tēninque, Oodeabæ quēwēnāni nāni wææ ānōnō ante æbānō cæquīi, ante ēñencæte ante æedāni.

³ Äninqe Itota Codito ingante godongämæ näni pönencabo incæ Pabodoidi inänite da godönäni wadæ godänitapa. Ayæ godinque Pënitabæ wodo tebæ godinque mänimæ quëwënäni inänite apænedinque godömenque Tämadiabæ adobaï wodo tebæ gote apænedinque, Wængongui pönö cæcä ate oodeoidi inämaï inäni incæ mönö Awënë gämænö do pönänipa, ante Pabodoidi apænedäni. Eñëninque mönö tönïñadäni mänimæ quëwënäni incæ watapæ todänitapa.

⁴ Pabodoidi Eedotadëe iñömö pönäni adinque Codito ingante näni godongämæ pönencabo tönö Itota nänö da godongainäni tönö në pönänäni inänite në aadäni në Picænäni tönö godongämæ ponte ongöninque Pabodoidi inänite, Waa pömïni amönipa. Ante äñönänite Pabodo tönö Bedënabee iñömö, Wængongui iïmaï mönatö tönö godongämæ cæcampa, ante tömänö ante adodö adodö apænedä eñënanitapa. ⁵ Mänïñedë Paditeoidi incæ pancadäniya në pönänäni badinäni inte ængæ gantidinque iïmaï ante apænedänitapa.

—Iñæmpa oodeoidi inämaï inäni inänite, Cöwë eö togænguënëmïni iïminipa, ante mönö wææ angæimpa. Ayæ Möitee wodi, iïmaï cæedäni, ante nänö angainö ante eñenguënëmïni iïminipa, ante mönö cöwë angæimpa.

⁶ Änäni ate Itota nänö da godongainäni tönö në pönänäni inänite në aadäni Picænäni tönö godongämæ pöninque, Oodeoidi inämaï inäni inänite mönö æbänö anguiï, ante tedecönänitapa. ⁷ Mäninö ante wæætedö wææte apænedäni adinque Pegodo guiquënë ængæ gantidinque

godongämæ ongönäni inänite iimaï ante apænecantapa.

—Botö mēmōidi, mīnitō iimainö ante do eñēmīnīpa. Wængonguī do inōñedē, Oodeoidi ināmaï ināni incæ Codito ingantedö ante watapæ eñēninque edæ nē pōnēnāni bacædānimpa, ante cædinque mōnō imonte apænte æninque botö imote angä gote mäninö ante apænebo eñēnānitapa. ⁸ Da godongä gote apæneyōmo Wængonguī, Waocä æbänö mīmōno pōnengä ingää, ante nē eñēnongä inte edæ tōmengä Tæiyæ Waēmö Önōwoca ingante oodeoidi ināmaï ināni inänite da pōnongä ænte ewocadānīpa. İninque mōnō imonte pōnō cæcä baï tōmēnāni inänite adobaï cædinque tōmengä edæ, Oodeoidi ināmaï ināni inänite botö Ao ante do æmopa, ante odōmongä abaimpa. ⁹ Tōmēnāni wede näni pōnēnō beyænque Wængonguī tōmēnāni mīmō ñā mēnongadinque, Oodeoidi ināmaï ināni incæ mīnitō baï adobaï ināni apa ānewēmīnīi, angampa. ¹⁰ Mōnō iñōmō mōnō mæmæidi tōnō teēmē mongænte baï wædinque edæ, Mōitee wodi nänö wææ angainö ante mōnō ædö cæte eñente cæquīi, ante godongämæ wægāmōimpa. Ñōwo guiquēnē Oodeoidi ināmaï ināni incæ tæcæ pōnēñōnänite mīnitō iñōmō teēmē cōnōnancapænte baï cædinque tōmēnāni inänite, Cædāni, ante wææ ämīnīpa tōö. Mänōmaï cædinque mīnitō, Wængonguī önonque cæcampa, ante baï cæmīnīpa tōö. ¹¹ İñæmpa mōnō Awēnē Itota pōnō waadete ængä beyænque tōmēnāni wænāmaï inte quēwēnāni baï mōnō adobaï mäninö beyænque wænāmaï inte quēwēmōmpa, ante pōnēmōnīpa. Mänōmainö ante Pegodo iinque

apænecä eññänitapa.

¹² Ayæ Bedënabee tönö Pabodo wæætë tömënäni inänite apæneda eññëningue godongämæ ongönäni tömänäni edæ tededämaï inte eññë cönänitapa. Tömëna iñömö, Wængonguï mönatö tönö godongämæ cædinque edæ, Mīnatö mä cæmīna adinque Oodeoidi inämaï inäni incæ pönencædänimpa, ante cædinque bamönengæ wæætë wæætë cæcantapa, ante adodö adodö ante apænedatapa. ¹³ Ìnque apæneda ate Tantiago wæætë tömangä apænecantapa.

—Botö biwiidi, botö ñöwo apænebo eññedäni.

¹⁴ Wængonguï täno waadete pönö cædinque oodeoidi inämaï inäni pancadäniya inänite apænte æningue, Botö quimīni bacæminimpa, ante cæcantapa, ante Timönö do apænecä eññentamompa.

¹⁵ Ayæ Wængonguï beyæ nē apænegainäni incæ, Ìincayæ ate Wængonguï mänömaï cæcæcäimpa, ante pönëningue adoyömö ante iimainö ante do yewæmongadänimpa.

¹⁶ “Awënë Dabii nempo nē quëwengainäni näwæ godäni adinque

botö iñömö oncö wodintai wæætë tæï mænonte bai cædinque,

ìincayæ ate adodö pöninque pönö cæbo ate

näwæ gogainäni iñömö Awënë nempo adodö pöninque quëwencædänimpa.

¹⁷ Mänömaï cæbo ate edæ wadäni tömämæ quëwëningue

oodeoidi inämaï inäni incæ botö emöwo ante nē ewocadäni inte

näwä Awënë ingante ante diqui diqui minte acædänimpa,

18 ante mönö Awënë iñömö edæ
mäninö ante nē cægaingä inongä inte,
do cæcä näni eñengainö ante apæ necampa.”

19 Ante yewæmongatimpa, ante Tantiago
godömenque apæ necantapa. “Botö Wængonguï
nänö apæ negainö ante pönente wædinque,
ïimai cæcæimpa, ante pönemopa. Oodeoidi
inämai inäni, Idæwaa wapiticæ pönente awädö,
ante wædinque ocæ emænte näwä Wængonguï
gämænö pöñönänite mönö edæ ee cædinque
tömänäni taadö ganta cædedämai ingæimpa.

20 Önonque, Tömänäni acædänimpa, ante ïimai ante
yewæmongæimpa, Wadäni, Wængonguïdi quï,
ante cænguï näni cönönï cænämai incæminimpa.
Ayæ nänöogængä inämai iñongante godö mönämai
incæminimpa. Ööingä ñë wëmencate wæningä ate
cænämai incæminimpa. Baö wepæ owemöingä
i adinque cænämai incæminimpa, ante mönö
yewæmongæimpa, ämopa. 21 Edæ doyedë pönï
oodeoidi näni quëwëñömö näni quëwëñömö tömää
iñömö mäo Möitee wodi nänö wææ angainö ante
apæ nedäni eñengadänimpa. Ayæ ñowo ganca
adobainö ante guëmanguïönæ iñö guëmanguïönæ
iñö mönö odömöincönë go guïite apæ nedäni eñente
mänömainö ante eñente cæquënänäni inänipa.
Mäninonque ante mönö yewæmongæimpa,
ämopa,” ante Tantiago iñque apæ necantapa.

*Oodeoidi inämai inäni acædänimpa, ante
yewæmönänipa*

22 Mänömainö ante apæ necä eñëninque Itota
nänö da godongainäni tönö nē aadäni Picænäni
tönö Itota Codito ingante godongämæ näni

pōnencabo tōmancabo tōnō godongāmæ pōnēninque, Mōnō cabo incæ mēnaa inate apænte æninque tōmēna inate, Mīnatō Pabodo tōnō Bedēnabee miñæ Antioquiya goeda, amō gocædaimpa. Ante Ao āninque tōmēnāni, Mōnō pōnencabo iñōmonte Codaa Badatabato mōnō ānongā tōnō Tidato iñōmō nē āna inapa, ante adinque tōmēna inate apænte ænānitapa. ²³ Ayæ, Cadota ante ænte gocædānimpa, ante iīmaī ante yewæmongadānimpa.

Mōnitō pancamōniya Itota nānō da godongaīmōni iñōmōni pancamōniya nē pōnēnāni inānite nē aamōni Picæmōni imōnipa. Mānōmaī imōni inte mōnitō mīnitō tōniñamōni imōnipa. Mīnitō oodeoidi ināmaī imīni inte Antioquiya iñōmō Tidiabæ iñōmō Tiditiabæ iñōmō quēwēninque mīni pōnencabo mīni pōnencabo iñōmīnite mōnitō, Waa quēwencæmīnimpa, amōnipa.

²⁴ Iīmaī ante tededāni eñentamōnipa. Mōnitō, Goedāni, ānāmaī iñōmōni wadāni mōni cabo incæ pancadāniya wadæ gote mīnitō weca pōninque mīnitō imīnite, Eō togæedāni, ante wææ ānāni. Eñēninque mīnitō tōmēnāni nāni wææ ānīnō beyænque teēmē mongænte bai, Æbānō cæquī, ante wæmīnipa, ante tededāni eñēmōnipa. ²⁵ Mānōmainō ante tededāni eñente wædinque mōnitō godongāmæ pōnēninque onguīñæna mēnaa inate apænte æninque tōmēna inate iīmaī antamōnipa. Mīnatō Bedēnabee tōnō Pabodo mōnō nē waadeda tōnō godongāmæ godinque oodeoidi ināmaī ināni weca goeda, ante cætamōnipa. ²⁶ Bedēnabee tōnō Pabodo iñōmō mōnō Awēnē Itota Codito

ēmōwo beyænque cædinque nāna nāmā wodo wænguinque cædatapa. ²⁷ Īninque, Īi cadota mōni yewæmōnō nāwangā impa, ante adodō ante apæ necædaimpa, ante cædinque mōnitō Codaa tōnō Tidato ĩnate da godōmōni godinque mīnitō weca pōna aedāni. ²⁸ Edæ, mōnitō Wængonguī Tæiyæ Waēmō Ōnōwoca tōnō godongāmæ pōnēninque, Mīnitō godōmenque teēmē mongænāmaī incæmīnimpā, antamōnipā. Īninque, Mīnitō ĩmaī cædinque idæwaa, ante pōnēmōnipā.

²⁹ Wadāni, Wængonguīdi quī, ante cænguī nāni cōnōnincoo ante cænāmaī gomō aedāni. Wepæ owemōingā adinque ōōingā ñē wēmencate wæningā adinque cænāmaī ĩedāni. Ayæ nānōogængā ĩnāmaī ĩñongante godō mōnāmaī ĩedāni. Mīnitō māninque ante ee ate cædāmaī ĩmīni ĩninque waa quēwēmaīmīnipā. Māninque ante yewæmōmōnipā.

³⁰ Ante yewæmonte pædæ pōnōnāni ænte wadæ godinque Antioquiya ĩñōmō wæidinque nē pōnēnāni ĩnānite añete godongāmæ pōnāni ate Eedotadēē quēwente pōnāni tōmēnāni nāni yewæmōninta pædæ pōnōnāni ænte adānitapa. ³¹ Eedotadēē quēwēnāni, Mīnitō godōmenque teēmē mongænāmaī incæmīnimpā, ante nāni yewæmonte ānīnō adinque oodeoidi ĩnāmaī ĩnāni ĩñōmō wampo pōninque todānitapa. ³² Codaa tōnō Tidato ĩñōmō Wængonguī beyæ nē apæneda inte adobaī, Tæi pīñænte entawencæmīnimpā, ante cædinque ædæmō apæneda ēñēninque tōmēnāni nāni pōnencabo mīmōnē gancæ batawente

wede pōnēnānitapa. ³³ Īninqe tæōnæ quēwēna ate māniñōmō quēwēnāni nāni pōnencabo wæætē tōmēna inate waa apænedinque, Ñowo gānē pōnēninque waa goeda, ante tōmēna inate nē da pōnōnāni weca wæætē adodō da godōnāni godatapa. ³⁴ Tidato guiquēnē, Īñōmō ongoncæboimpa, ante ayæ ongongantapa. ³⁵ Pabodo tōnō Bedēnabee guiquēnē Antioquiya iñōmō ayæ quēwēninque wadāni nanguī ināni tōnō godongāmæ odōmōninque Wængonguī nānō änō ante watapæ apæneda eñengadānimpa.

Pabodo ingante wæætē da godōnāni gocampa

³⁶ Īncayæ ate Bedēnabee ingante Pabodo,
—Wēēnēñedē Wængonguī nānō änō ante mōna gote apænediñōmō wæætē adoyōmō gote mōnatō tōniñadāni weca gote eñadinque, Æbānō quēwēnāni, ante acæmōnaimpa.

³⁷ Añongā Bedēnabee Ao angantapa. Ayæ tōmengā, Wāō Mādoco nāni ānongā ingante mōnatō tōnō godongāmæ gocæcāimpa, ante cæcantapa. ³⁸ Pabodo guiquēnē, Īñæmpa wēēnēñedē Pampidiabæ iñōmō pōñōmōnate ñingā Mādoco iñōmō mōnatō tōnō godōmenque cædāmaī inte edæ wadæ gocantapa, āninque, Ñowo wīī ænte gocæimpa, ante Baa angantapa. ³⁹ Īninqe tōmēna wæætedō wæætē āninque tōmēna wadō wadō gote panguimæ godatapa. Bedēnabee guiquēnē Mādoco ingante ænte ñænæ gāwapāa gote wipodē ñænæmpodē guite wogaa godinque wāā tēiwænē Tipidebæ tao gocantapa. ⁴⁰ Pabodo guiquēnē Tidato ingante apænte ænte gocæ cæyongante

tömənäni näni pönencabo iñömö tömëna inate apænedinque, Wængongui mīnatö beyæ pönö waadete cæcæcäimpa, änäni eñëninque wadæ godatapa. ⁴¹ Ayæ Tidiabæ tömāo godinque Tiditiabæ tömāo godinque Pabodo iñömö Codito ingante näni godongämæ pönencabo inänite apænecä eñëninque tömənäni wede pönëninque tæi piñænte batawengadänimpa.

16

Pabodo tönö Tidato miñcæ Timoteo gocampa

¹ Mänii godinque Pabodo Dedebe iñömö ponganque go Ditada iñömö pongantapa. Itota ingante tee empote nē gocä Timoteo mäniiñömö quëwengacäimpa. Tömengä wäänä oodea inöna incæ nē ædæmö cæte pönënä inönäimpa. Timoteo mæmpo wæætē guidiego inongäimpa. ² Timoteo iñömö Itota ingante pönente quëwengä adinque nē pönënäni Ditada iñömö quëwënäni incæ Icönio iñömö quëwënäni incæ, Timoteo nē waa quëwëngä ingampa, ante adoyömö apænedänitapa. ³ İninque Pabodo, Botö tönö Timoteo guëa gocæcäimpa, angantapa. Wæætē, Oodeoidi mänimæ quëwënäni tömänäni, Timoteo mæmpo guidiego ingampa, ante do eñënäni inte piinäni wæcæ wæ. Äninque Pabodo angä yæcadogæ ëö togænäni ate Timoteo ingante ænte gocantapa. ⁴ Godinque Pabodoidi wayömö näni quëwëñömö wayömö näni quëwëñömö godinque iimaï ante apænedänitapa. Minitö oodeoidi inämaï imini inte æbänö eñente cæte quëwenguimīnii, ante Eedotadëe iñömö nē aadäni Picænäni tönö

Itota nänö da godongainäni tönö godongämæ pönëninque do änänipa. Ante apænedinque Pabodoidi wæætë tømënanäni nänäni äninö ante adodö ante apænedäni ëñënanitapa. ⁵ Mänömaï apænedäni ëñente wædinque Codito ingante nänäni godongämæ pönencabo iñömö wayömö nänäni cabo wayömö nänäni cabo tømänäni wede pönëninque edæ tæï piñante badinque iimö iñö godömenque iimö iñö godömenque nangui yebænte bagadänimpa.

Mäatedöniabæ quëwengä ingante Pabodo wüimonte acä

⁶ Pabodoidi Atiabæ gocæ cæyönänite Wængongui Tæiyæ Waëmö Önöwoca iimäi ante apænecantapa. Minitö botö änö ante mänimæ apænecæ godämaï incæminimpa, ante wææ angä ëñente wædinque tømënanäni wæætë Gadatiabæ incæ pancabaa Pidiquiabæ tømäo cægöninque godänitapa. ⁷ Mänimæ cægönaque go Miitiyabæ ganca pöninque Bitiniabæ gocæ cæyönänite Itota Tæiyæ Waëmö Önöwoca incæ, Godämaï, Baa angä wædinque tømënanäni mäniñömö ñimpo cæte godömenque godämaï inänitapa. ⁸ Mänömaï beyæ tømënanäni Miitiyabæ wodo pänta go Todoa iñömö wæi godänitapa.

⁹ Mäniñömö wæi gote ongöninque woyowotæ ba ate Pabodo wüimonte bai ayongä Mäatedöniabæ onguiñængä a ongöninque tømengä ingante iimäi ante apænecantapa. “Mäatedöniabæ pöninque bitö mönitö imönite pönö cæquimi ämönipa,” ante Pabodo ingante angä ëñengantapa. ¹⁰ İninque Pabodo, Mänömaï wüimonte bai atabopa, ante apænecä ëñente wædinque

mōnitō wæætē, Mīnitō Māatedōniabæ gote māo apænemīni ēñencædānīmpa, ante Wængonguī incæ cæbaingampa. Ante pōnente wædinque botō Odocabo tōnō wadāni Pabodo tōnō nē godongāmæ cædāni tōnō wæætē, Mōnō māniñmō gote Codito ingantedō ante watapæ apænecæīmpa, ante pōnēninque gocæte ante cætamōnīpa.

Pabodo tōnō Tidato Pidipoto iñmō ponte cædapa

¹¹ Mānōmainō ante pōnēmōni inte mōnitō Todoa iñmō gāwapæ wedeca quēwēninque ñænæ wipodē guiite wogaa tao godinque wāā tēiwænē Tāmotadate tōingā gote mōninque iimō ate tao Nēapodi pontamōnīpa. ¹² Māniñmō pō ti wææninque taadonque godinque mōnitō Pidipoto odōmānoidi nāni ponte quēwēñmō adoyōmō pōninque tæōnæ quēwentamōnīpa. Māatedōniabæ incæ pancabaa quēwēnāni nāni yæcado quēwēñmō Pidipoto impa. ¹³ Mōnitō māniñmō ponte quēwēninque guēmanguīōnæ iinque bayonte tōmēnāni nāni quēwēñmō yabædemō tao godinque, Ōnō wedeca Wængonguī ingante godongāmæ apænebaīnānīpa, ante ōnōwēnenque pōnēninque māniñmō gotamōnīpa. Māniñmō ponte ayōmōni onquiyænāni do godongāmæ ponte a ongōnāni adinque mōnitō tæ contadinque tōmēnāni inānite apænetamōnīpa. ¹⁴ Māniñmō nē ēñēnāni tōnō adodanque tōmēnā emōwo Didia iñmō Tiatida quēwēnōnā inte weocoo awēnēidi nāni opatawæ ēmoncoo godonte ænte quēwēnōnāīmpa. Tōmēnā Wængonguī ingante nē waa ate pōnēnā inonāīmpa. Iinque Pabodo

apæneçä äamonca ongonte ëñëñönante mönö Awënë tömënä mïmö wi ænete bai çæçä ate tömënä wede pönënantapa. ¹⁵ Ìninqe tömënä näni owocabo pönëninque godongämæ æpænë guidäni ate tömënä ïñömö mönitö ïmönite apænedantapa.

—Botö ïmote ante adinqe mïnitö, Mönö Awënë ingante Didia ædæmö çæte pönengä ingampa, ante pönëmïnitawoo. Mänömainö ante pönëmïni inte mïnitö botö oncönë ponte owoedäni, ämopa.

Ante ancaa apænedä ëñente wædinqe mönitö Ao ante gote owotamönipa.

¹⁶ Mänïñedë wacä onquiyængä obe badä ïnogä inte wadäni nempo quëwëninque tömënäni beyænque në çæte quëwengä ïnogäimpa. Tömengä ïñömö në çæwënegä inte wadäni ïnänite, Ìncayæ ate æbänö baquïi, ante yewænte tedecä ïnogäimpa. Tedecä ëñëninque në ëñënäni wæætë tömënäni näni godonte æinta bacoo pædæ pönö pædæ pönö çädäni incæte tömengä awënëidi wæætë ö æ ö æ çädönänimpa. Ìninqe mänïñömö quëwëninque mönitö ayæ ate Wængonguï ingante näni apæneiñömö adodö gocæ çæyömönite mäningä onquiyængä mämö bee tengantapa. ¹⁷ Mänömai bee tëninque tömengä mönitö Pabodo tönö möni gocabo ïñömönite tee empo tee empo pöninqe yedæ angantapa.

—Ïnäni Wængonguï Æibæ pönï Quëwengä ingante në çädäni inte mïnitö ïmönite apænedinqe, Æçänö ængä beyænque quëwenguïi, ante apænedänipa.

¹⁸ Äninqe tæönæ ïñonte tömengä tömënäni ïnänite tee empote godinqe Yæ yæ änewengä

ēñente wædinque Pabodo, Ancaa ēñente awædö, ante dadi emænte wænæ ingante äninque,

—Bitö imite botö Itota Codito emöwo apænedinque, Tao gobäwe, ämopa.

Ante tæcæ apæneyongä wænæ incæ baquecä ingante emö cæte tao gocantapa.

¹⁹ Pabodo mänömaï angä ate tao go ate wædinque onquiyængä awënëidi guiquënë, Æ tömengä yewængä beyæ mönö æincädö incæ dæ gotimpa. Ñöwo æbänö cæte nanguï ænguïmöö. Ante piïnte wædinque tömënäni, Mönö tömëna inate odömäno awënëidi weca ænte gocæimpa, ante Pabodo tönö Tidato inate bæi ongonte wëä mäo tömënäni näni godonte æiñömö ænte godänitapa. ²⁰ Ayæ odömäno awënëna tömënäni quëwëñömö nē apænte äna iñönote nē piïnte cædäni mänina awënëna weca Pabododa inate ænte mämö gö cædinque,

—Iïna iñömö edæ oodeoda inöna inte mönitö quëwëñömö ponte wænæ wænæ apænedä ēñëninque tömänäni ænguï badinque Yæ yæ änänipa. ²¹ Mönö odömänocabo mönö wii cæquënëno ante odömonte apænedinque tömëna iñömö, Mäninonque cædäni, ante ancaa änewënapa.

²² Ante tæcæ apæneyönäni godongämæ ongönäni iñacabo cædinque Pabodo tönö Tidato inate piïnte cædänitapa. Ayæ odömäno awënëna iñömö, Tömëna weocoo gä tadongate tæi tæi päedäni. ²³ Äna ēñente tæi tæi pänäni wæyönate awënëna godömenque äna ēñente cædinque tömëna inate bæi ongonte mäo tee mönedinque tee möneincö nē aacä ingante, Iïna inate bitö ædæmö

wææ ae, änatapa. ²⁴ İninque mänömaï änäni eñente wædinque nē wææ wänongä wæætē Pabodo tönö Tidato İnate guimongacönē manguicä guuidatapa. Ayæ godömenque tömēna önöwa awæmpaa goti guidöwate tæï tee mönecä ongöñöna wadæ faocantapa.

²⁵ Ayaönænēña bayö Pabodo tönö Tidato mänömaï goti guidöwate wægöningue Wængonguï ingante apænedinque ämotamini äncöñönote wadäni nē tee mönete ongönäni eñēē cönänitapa.

²⁶ İñontobæ goinque nanguï ocæ ocæ pöningue tee möneincö tæñöninca incæ wancæ wancæ cæyö odemö tömänemö wi æmænete gotapa. Ayæ tömänäni İnänite näni tæï pönï yaëmengö näni ñäni ñænimē incæ ñimæncæ ñimæncæ wææntapa.

²⁷ Tee möneincö nē aacä guiquenē İñontobæ ñäni ömæmonte ayongä, Odemö dobæ wi æmænete gotimpa, ante wædinque tömengä, Æ tee mönete ongöninäni dobæ tao wodii winönänipa, ante pönente wædinque, Botö awenēidi piinte pänäni wænguï wæ, ante pönëningue nämä wænonte wæncæte ante yaëmē o togænte ængä. ²⁸ Ate wædinque Pabodo İñontobæ ogæ tededinque,

—Nämä wænæ wænæ cædämaï. Ee ae. Tömämöni ayæ ongömöni apa quëwëë.

²⁹ Angä eñëningue nē wææ wänongä İñömö edæ, Tica wodönoï ænte pödäni, angä ænte pönäni æningue tömengä pogodo pöningue ancai guïñente wædinque do do wäate wædinque Pabodo tönö Tidato önöwa İnö wæængantapa. ³⁰ Ayæ ængæ gantidinke edæ tömēna İnate oncodo ænte mäocä tayönote,

—Minatö nē ämīna inte apænemīna ēñēmoeda.
Botö æbänö cæte quēwenguimoo, ante wæcä.

³¹ Ēñēninque tōmēna wæætē,

—Awēnē Itota ingante edæ wede pōnēmi
ate tōmengä ængä beyænque quēwencæbiimpa.
Mīni owocabo tōmāmīni adobai wede pōnente
quēwencæmīnimpa, ānatapa.

³² Äninque tōmēna nē wææ wānongä ingante
godōmenque Wængonguī Awēnē nänö apænegainö
ante apænedinque tōmengä oncönē näni owocabo
tōmānāni inānite apæneda ēñēnānitapa. ³³ Ayæ
woyowotæ incæ tōmēna inate æninque nē wææ
wānongä iñömö tōmēna inate tæi tæi pānāni nāna
æbāate wædiñömö ñä mēnongacantapa. Ayæ
tōmengä näni wencabo do æpænē guidānitapa.
³⁴ Ayæ tōmengä oncönē ænte mængä ææ guiiyōna
tōmēna inate cænguī godongä cænatapa. Ayæ
tōmengä näni wencabo nē Wængonguī ingante
pōnēnāni badināni inte watapæ todānitapa.

³⁵ Baänæ ate odömāno awēnēna guiquēnē
poditiyaidi inānite nē wææ wānongä weca da
godōninque, Pabodo tönö Tidato inate ñimpo cæbi
gocædaimpa, ämīni ēñengäeda, angä ēñēninque
godānitapa. ³⁶ Ponte odömāno awēnēna emōwo ante
apænedāni ēñēninque nē wææ wānongä wæætē
Pabodo ingante apænedinque,

—Poditiyaidi ñōwo ponte apænedinque, Pa-
bodo tönö Tidato inate ñimpo cæbi gocædaimpa,
ante odömāno awēnēna ānapa, ante apænedānipa.
Īninque mīnatö ñōwo taote godinque piyænē cæte
ee goeda.

37 Angä eñëninque Pabodo wæætë poditiyaidi inänite apænedinque,

—Mönatö odömānomōna imōna incæte nē apænte äna weca apænedāmaï iñömōnate tömēna äna tömānāni ayōnāni edæ mönatö imōnate tæi tæi pāninque tee mönedānitapa töö. Tee mönedāni wæyōmōna ñōwo wæætë mönatö imōnate awēmō wido cæcæte ante cædānipa töö. Mönatö iñæmpa edæ Baa ämōnapa. Awēnēna incæ iñömō pōninque mönatö imōnate ænte mäoda gocæmōnaimpa.

38 Mänōmainö ante apænecä eñente wædinque poditiyaidi tömēnāni awēnēna weca adodö godinque Pabodo nänö apænedö ante adodö ante apænedānitapa. Ayæ, Pabodo tönö Tidato odömānoda inapa, ante apænedāni eñëninque odömāno awēnēna guiquēnē guiñente wædatapa.

39 Ayæ guiñente wædinque awēnēna incæ Pabodo tönö Tidato weca ponte waadete apænedinque, Mönatö oda cædinö ante minatö odömānomīna imīna inte piinte änāmaï ieda, ante äninque Pabodo tönö Tidato inate ænte mäoda taoda adinque tömēna inate, Ñōwo mönitö quēwēñömö emö cæte wadæ goeda, ämōnapa. 40 Äna eñente taodinque onquiyænä Didia oncönē go guiidinque Pabodo tönö Tidato iñömö, Nē pōnēnāni wampo pōnëninque tæi ongoncædānimpa, ante cædinque ædæmō apænedinque wadæ gogadaimpa.

17

Tetadōnica iñömö quēwēnāni Yæ yæ änānipa

1 Mänii godinque Pabodo tönö Tidato Ampipodi näni quēwēñömö wodo tebæ godaque

go Apodōnia nāni quēwēñōmō wodo tebæ godaque go Tetadōnica nāni quēwēñōmō pōnatapa. Māniñōmō oodeoidi Wængonguī apænecā nāni ēñente yewæmongainta ate odōmōincō nāni mænongaincō mæ ongō.

² Adinque Pabodo cōwē nānō cæi bai cædinque guēmanguïōnæ bayō guēmanguïōnæ bayō mēōnaa go adoōnæque iñonte tōmēnāni odōmōincōnē go guiddinque edæ Wængonguī angā ēñente nāni yewæmongaintaa ate adinque tōmēnāni inānite, iīmaī impa quēwēmīni, ante nō apænecantapa.

³ Tōmēnāni inānite edonque apænedinque Pabodo, Wængonguī beyæ nē apænegaināni iīmaī ante do yewæmongadānimpa, angantapa. Mōnō Codito iīncayæ ate pōninque cōwē caate wæquēnengā ingampa. Ayæ adocā wænte ate cōwē ñāni òmæmonte quēwenguēnengā ingampa, ante yewæmongadānimpa, ante Pabodo apænecantapa. Ayæ godōmenque apænedinque,

—Itota botō nē ānongā incæ adocā mōnō Codito iñongā ingampa, ante apænecantapa.

⁴ Mānōmaī apænecā ēñēninque oodeoidi pancadāniya, Nō impa, ante pōnēninque Pabodo tōnō Tidato miñæ godānitapa. Ayæ guidiegoidi nanguī ināni Wængonguī ingante nē guīñēnāni inte adobaī pōnēninque tōmēna miñæ godānitapa. Ayæ awēnēidi bai ināni onquiyænāni incæ nanguī ināni adobaī pōnēninque tōmēna miñæ godānitapa.

⁵ Mānōmaī pōnēnānipa, ante wædinque oodeoidi guiquēnē pīinte wædinque iīmaī cædānitapa. Tōmēnāni nāni godonte æiñōmō gote ayōnāni nē wiwa cædāni ongōnāni adinque tōmēnāni inānite

änäni Ao ante godongämæ pöninge oodeoidi
 tönö iñacabo cædinque Yæ yæ ante pīinānitapa.
 Mänömaī yedæ änäni eñente wædinque mänīñömö
 quëwënäni tömänäni godongämæ piinte badinque
 Yæ yæ änānitapa. Oodeoidi iñömö, Mönö Yatönö
 oncönë guiddinque Pabodo tönö Tidato inate da
 tadöninge nē piinte cædāni inānite da godömö
 æncædānimpā, ante cædinque diqui diqui mincæte
 ante tee gāwade guiddānitapa. ⁶ Wäänë guiddinque
 tömēna inate adāmaī ināni inte oodeoidi wæætē
 oncö nē éacā Yatönö ingante yao ongöninge
 wadāni nē pönēnāni inānite yao ongonte wēā tadö
 mao tömēnāni nāni quëwēñömö awēnēidi weca
 ænte godānitapa. Ayæ, ogæ tededinque,

—İina onguñæna iñömö tömämæ quëwënäni
 inānite wapiticæ nē apænedīna inte ñowo wæætē
 iñömö pōna tamēñedāni. ⁷ Ayæ Yatönö guiquēnē,
 Botö oncönë pōeda, ante manguicā guiddatapa.
 İināni tömänāni edæ odömāno tæiyæ awēnē Tetædo
 nānō äninö ante Baa äninque wacā Itota nāni
 änongā ingantedö ante, Tömengā nē Awēnē Odeye
 ingampa, ante änewēnānīpā cæminii.

⁸ Ante pīināni eñente wædinque godongämæ
 ongönāni tönö awēnēidi adobaī pīininque, Quinö
 cæquīī, ante wædinque Yæ yæ änānitapa. ⁹ İinque
 Yatönöidi inānite äninque awēnēidi, Minitö ñowo
 mänimpota pönömīni ænte mǎñömöni mīnitö wēnæ
 wēnæ cædāmaī imīni adinque mönitö iincayæ
 ate wæætē adodö pönömöni æmaimīnīpā, ante
 tömēnāni godonte æinta änäni pædæ godönāni
 æninque ñimpo cædāni abæ tawænte gogadānimpā.

Bedeā iñömö quëwënäni eñente pönēnānīpā

10 Ayæ tæcæ wēmō bayonte nē pōnēnāni wæætē Pabodo tōnō Tidato inate, Bedea iñōmō goeda, ante da godōnāni godatapa. Māniñōmō gote pōninque tōmēna oodeoidi odōmōincōnē go guiidatapa. ¹¹ Māniī Tetadōnica iñōmō quēwēnāni nē piinte cædāni iñōnānite bedeaiddi guiquēnē piināmaī ināni inte mōnō Awēnē nānō apænedō ante do ēñēnānitapa. Ayæ ēñēninque, Wængonguī angā ēñente nāni yewæmongainō bai Pabodo nō apænecantawo, ante pōnente wædinque bedeaiddi iñōmō, Wængonguī æbānō angā ēñente yewæmongadāni, ante ēñencæte ante iimō iñō iimō iñō māninta æninque cōwā adānitapa. ¹² Mānōmaī cædinque oodeoidi tæiyæñāni wede pōnēnāni badānitapa. Ayæ guidiegoidi awēnēiddi bai ināni onquiyæñāni incæ nanguī ināni pōnēñōnāni guidiegoidi onguīñæñāni adobaī tæiyæñāni nē wede pōnēnāni badānitapa.

¹³ Incæte wadāni Tetadōnica iñōmō godinque oodeoidi inānite apænedinque, Pabodo ñōwo Bedea godinque māniñōmō quēwēnāni inānite apænecā ēñēnānipa, ante tededāni. Eñēninque oodeoidi wæætē Bedea iñōmō pōninque, Pabodo wiwa apænecā apa ēñencæ quēwēmīnii, āninque wapiticæ tededāni ēñēninque godongāmæ ongōnāni guiquēnē ænguī badānitapa. ¹⁴ Mānōmaī ænguī badāni adinque nē nāni pōnencabo iñōmō Pabodo ingante æpæ yæwedeca do ænte māodāni godinque tōmengā wipodē ñænæmpodē go guiidinque godōmenque wogaa goyongante Tidato tōnō Tīmoteo wæætē Bedea iñōmō ayæ ongōnatapa. ¹⁵ Pabodo tōnō godongāmæ godāni iñōmō Atēna ganca māodāni gocā ate tōmengā

wæætë, Minitö adodö Bedea iñömö godinque Tidato tönö Timoteo inate apænedinque tömëna eyepæ inte ate botö weca quingæ ämini pönae, angä eñëninque tömënäni adodö Bedea iñömö godinque Pabodo nänö äninö bai iñäna inate apænedänitapa.

Atëna iñömö Pabodo apæ necä eñënänipa

¹⁶ Mänömainö ante äningä inte Pabodo tömëna nana ponguinö ante ee ongongantapa. Ee ongöninque ayongä mäninñömö quëwënäni, Wængonguüdi inänipa, ante badonte näni cö cægainca bacoo mä ongö ate wædinque Pabodo wæwëwocate quëwengantapa. ¹⁷ Mänömaï beyæ oodeoidi odömöincönë go guüidinque oodeoidi inänite apænedinque ayæ guidiegoidi incæ Wængonguü ingante në guüñänäni inänite apænedinque Pabodo, Mänömaï impa. Apænebo eñëmaïminipa, ante apæ necantapa. Ayæ tömënäni näni godonte æiñömö adobai iimö iñö iimö iñö godinque mäninñömö ponte ongönäni inänite adobai nö apæ necä eñënänitapa. ¹⁸ Mänömaï cæyongä wadäni Epicodeoidi, Mönö tote quëwengæimpa, ante në änewënäni näni cabo tönö wadäni Etoicoidi, Waa imö incæ caate wämö incæ mönö piyænë cæte quëwengæimpa, ante në quëwënäni näni cabo tönö tömänäni adoyömö ponte bee tëninque Pabodo ingante wæætedö wæætë änänitapa.

Pabodo iñömö Itota ëmowo ante apæ necä beyæ ayæ Itota nänö ñäni ömæmongainö ante apæ necä beyæ Epicodeoidi näni cabo tönö Etoicoidi näni cabo tönö pancadäniya guiquënë,

—Īngä ĩñömö önonque ante tedewënogä inte æbämë ante tedewengä.

Ante wæyönäni adodäni incæ pancadäniya guiquënë,

—Tömengä wabänö, Wabæca wængonguïdi ĩnänite pönencæminimpa, ante cæcä ĩmaingampa, ante wädänitapa.

¹⁹ Īninqe Pabodo ingante bæi ongonte töö æmænte ænte godinqe tömënäni Adeopagoidi näni änönäni näni godongämæ ëñente pönencöñömö mäodäni gocantapa. Go guiite ongöñongante,

—Mä bitö odömonte apænedö æbänö ĩi. Edæ apænebi ëñëmönie. ²⁰ Edæ bitö odömonte apænedö ante tæcæ ëñëmöni inte mönitö, Æbänö ante apænebii, ante ëñencæte ante wæmönipa, änänitapa.

²¹ Edæ atënaidi tönö wadäni Atëna ĩñömö ñowo ponte quëwënäni tönö tömänäni wadö cädämaï inte önonque, Wadäni æbänö mä apænete pönënanii, ante wædinque mäninonque ante tedete quëwënönänimpa.

²² Pabodo ĩñömö Adeopagoidi godongämæ näni ëñente pönenconcabo tæcæguedë ængæ gantidinqe tömënäni ĩnänite apænedinqe,

“Atënaidi, ëñëedäni. Wængonguïdi, mini änönäni ĩnänite waa ate bai minitö nanguï pönï cæmini abopa. ²³ Botö minitö quëwëñömö tömäo cægonte ayömo, Wængonguïdi ĩnäni, ante mini waa adoncaco nanguï ongö atabopa. Ayæ mini waa adonca adocaque ĩñömö mini pönö yewæmönimpaa ĩmaï ante yewæmonte ongö atabopa. ‘Wacä wængonguï æcämë ingää, ante mönö ëñënëmaï nē ĩnogä

beyæ mönö waa adonca impa,' ante mänimpaa yewæmöi ongö atabopa. Mänimpaa yewæmöi ongö adimo inte botö mini, Æcämë ingää, ante eñenāmaï inte mini waa adongä ingante ante ñöwo, Æcänö ingää, ante ñöwo apænebo eñeedäni.”

24 Ante apænedinque Pabodo godömenque, “Wængongui inguipoga nē badongaingä inongä inte tömää iñömö ongoncoo nē badongaingä inongä inte tömengä inguipoga tömämæ Awënë inongä ingampa. Tömengä adocä iñömö öönæde Awënë ingampa. İninqe Tæiyæ Awënë inongä inte tömengä waomö önompoca mænönincönë ædö cæte guite quëwengüingää. 25 Ayæ waomö iñömonte tömengä mönö quëwengüimämo pönongä æmompä. Ayæ mönö guëmangüimämo adocä pönongä guëmämompä. Ayæ tömengä adocä nänö pönönönque tömänö æninqe quëwëmompä. Mänömaï nē pönönongä inte tömengä mönö waocabo iñömonte, Pönömi æmoe, ante ædö cæte angüingää. İninqe tömengä beyæ ante mönö waomö önompoca ædö cæte cæquimöö.”

26 Ante apænedinque Pabodo godömenque apænecantapa. “Wængongui waocä adocanque ingante badöninque, Tömengä nänö pæināni nangui ināni yebæninque nāni cabo nāni cabo tömancabodäni bacædänimpa, angacäimpa. Ayæ edæ, Adocanque pæināni inönāni inte mänincabodäni iñömö nänëneto nänënë godinque adocaboque wabæca wacabo wabæca godinque inguipoga tömäo go go cædinque wayömö wayömö quëwencædänimpa, ante cægacäimpa. Mänömainö ante badöninque tömengä tömancabodäni inänite

ante pōnēnīnque, Æyōmōnō quēwenguīnānīi,
 ante cædinque, Īināni ĩimæca mānimpoga
 quēwencædānīmpa, ānīnque, Wadāni wabæca
 mānimpoga quēwencædānīmpa, ante doyedē
 angacāīmpa. ²⁷ Edæ tōmāmæ quēwēnāni botō
 ĩmote ante dīqui dīqui mīncædānīmpa. Ayæ botō
 ĩmote ante pædæ æmpo cædinque wabānō bee
 tengūīnāni, ante cædinque Wængonguī mānōmaī
 badōnīnque angacāīmpa. Incæte Wængonguī
 mōnō tōmāmō weca ongōnīnque wīi gobæque
 quēwengampa. ²⁸ Wængonguī tōmāo quēwengā
 ĩñongante mōnō waomō ĩnōmō ĩnte wayōmō
 wayōmō gomō incæte tōmengā nempo edæ cōwē
 quēwēmōmpa. Mīni cabo incæ āmotamīni ante
 baī nē tededāni pancadāniya, ‘Wængonguī pæīmō
 adomō ĩmōmpa,’ ante do nāni ānō baī edæ mānōmaī
 ĩmpa,” ante Pabodo apænecantapa.

²⁹ Ayæ, “Mānōmaī beyæ mōnō Wængonguī
 pæīmō ĩnōmō ĩnte edæ ĩmaīnō ante wīi
 pōnenguēnēmō ĩmōmpa. Mōnō, Waocā nanguī
 pōnēnīnque dīcaa yewæmōnīnque waa pōnī nānō
 badōīnca baī Wængonguī adobaī ĩngampa, ante
 ædō cæte ānewenguīi. Oodo tōnō padata waocā
 nānō badōī baī Wængonguī ĩngampa, ante mōnō
 wīi mānōmaīnō ante pōnenguēnēmō ĩmōmpa.
³⁰ Incæte wēēnēñedē mānīnō nāni ēñēnāmaī
 ĩngāīnō ante adīnque Wængonguī pōnō waadete
 ata cæpogacāīmpa. Ñōwo guīquēnē tōmāmæ
 quēwēnāni ĩnānite, Mīnitō ēñēnāmaī cædō ante,
 Ancaa wæwente awædō, ante ñīmpo cæedāni.
³¹ Ante Wængonguī nē apænte angūīngā ĩnongā
 ĩnte ĩmaī āngampa. Īiōnæ ĩīnque bayōnte botō

inguipoga tömämæ quëwënäni inänite apænte ancæboimpa, ante mänionæ æönædö i, ante do angacäimpa. Ayæ, Waocä adocanque tönö botö godongämæ cæyömo tömengä nöingä ante apænte ancæcäimpa, ante Wængonguï mäningä onguïñængä ingante do apænte ængacäimpa. Ayæ tömänäni, Wængonguï nänö angainö bai cöwë bacäimpa, ante pönencædänimpa, ante cædinque Wængonguï mäningä Onguïñængä dobæ wængä ate, Näni ömæmöe, angä ininque mäningä iñömö edæ do ñäni ömæmonte quëwengampa.”

³² Ante Pabodo mäninö Itota nänö ñäni ömæmongainö ante apæ necä ëñëninque pancadäniya, Babæ ancædö, ante badete todänitapa. Wadäni guiquënë,

—Iñcayæ ate mäninö ante adodö apænebi ëñëmönie, änänitapa.

³³ Mänömainö ante cædäni adinque Pabodo iñömö tömënäni inänite ëmö cæte godinque tao gogacäimpa. ³⁴ Incæte pancadäniya tömengä miñæ godinque në pönënäni badänitapa. Adeopagoidi näni ëñente pönëë concabo iñönänite adocanque Diönitio adobai në pönengä bacantapa. Ayæ onquiyængä tömengä ëmöwo Daämadi tönö wadäni adobai në pönënäni bagadänimpa.

18

Coodinto iñömö pöninge Pabodo apænecampa

¹ Atëna iñömö ongonte apænecä ëñëninque mänömai cædäni ate Pabodo wadæ godinque Coodinto näni quëwëñömö pongantapa. ² Doyedë iñömö odömänoidi tæiyæ awënë Codaodio

oodeoidi inänite piinte äninque, Mönitö quëwëñömö Odömä iñömö ñowo quëwënämaï inte tömämini wadæ goedäni, angä ëñente wædinque tömänäni näwæ wadæ godönänimpa. Adocanque tömengä ëmöwo Aquidæ Pontobæ ëñagaingä inte Itadiabæ gote mäniñedë quëwëngäimpa. Tömengä adocä oodeocä inongä inte awënë nänö änö ante ëñente wadæ godinque tömengä nänöogængä Pidotida tönö ñowo Coodinto iñömö wadæ ponte quëwënonäimpa. Ìninque Pabodo ñowo Aquidæ ingante tæcæ adinque tömäna weca ëñacæ pongantapa. ³ Tömäna weca ponte ayongä tömäna tömengä nänö tadömönö bai adobai æmontai cadopa tadömonte godonte ænte quëwëna adinque Pabodo tömäna weca ee owodinque tömäna tönö godongämæ tadömönänitapa. ⁴ Mänömaï cæte quëwëninque Pabodo guëmanguïönæ iñö guëmanguïönæ iñö oodeoidi odömöincönë go guidinque, Oodeoidi incæ oodeoidi inämaï inäni incæ ëñente pönencädänimpa, ante cædinque, Ìimaï impa ante apænebo ëñëmaïminipa, ante nanguï apænecantapa.

⁵ Ayæ Tidato tönö Tïmoteo Mäatedöniabæ quëwente wadæ pöninque Coodinto iñömö näna wææ pöñedë Pabodo mäniñedë æmontaicö nänö badöninö ñimpo cædinque wæætë, Wængonguï nänö apænedö ante ëñencädänimpa, ante nanguï cæinente wædinque nanguï apænedinque mäninque cæte quëwëngantapa. Mänömaï cædinque tömengä, Codito mönö në ängongä incæ Itota adocä inongä ingampa, ante botö në agaïmo inte apænebo ëñëmaïminipa, ante oodeoidi inänite

apænecantapa. ⁶ Mänömaï apæneyongante oodeoidi wæatedö wæætë godö wënæ wënæ ante pïinäni wædinque Pabodo wæætë, Wïi ëñëinë wædö, ante bai cædinque nämä weocoo wancæ wancæ cæcantapa. Ayæ tømënäni inänite,

—Wængongui weca mïni goquënëno ante apænebo ëñëninque mïnitö pönö wææ äninque tømëmïni wænguinque wentamö mongæminipa. Botö wæætë mïnitö imïnite edonque pönï apænedïmo inte mïni cædö wentamö mongænämaï imopa töö. Ìninque botö Wængongui taadö mïnitö imïnite idæwaa odömöninque edæ oodeoidi inämaï inäni weca ñowo wadæ gobo tamëñedäni.

⁷ Äninque Pabodo wadæ tao godinque oodeoidi odömöincö gäänë wacä oncönë go guï go guï cædinque cöwë apænecantapa. Mänincö në éacä Titio Yoto näni änongä inñömö Wængongui ingante në waa ate pönengä inongäimpa. ⁸ Oodeoidi odömöincönë në aacä Codipo guiquënë mönö Awënë ingante në pönengä bayongä tømengä oncönë në owodäni tømänäni pönënanitapa. Ayæ coodintoidi nanguï inäni pö ëñëë pö ëñëë cædinque adobai wede pönëninque æpænë guïgadänimpa. ⁹ Mäniñedë woyowotæ inñö Pabodo wïimonte bai ayongante mönö Awënë tømengä ingante apænecantapa. “Bitö guïñenedämaï inte apænebi ëñencædänimpa. Pæ wëenedämaï incæbiimpa. ¹⁰ Coodinto inñömö botö quïnäni nanguï inäni inänipa, ante cædinque botö inñömö edæ bitö tönö godongämæ cöwë cæcæboimpa. Ìninque wadäni bitö imite mämö pïininque wënæ

wënæ cædämaï incædänimpa.” 11 Ante mönō Awënë tömengä ingante apæ necä eñëninque Pabodo adoque wadepo go tæcæ iñonte Coodinto iñömō ongōninque Wængonguï nänō apæ nedō ante tömënäni inänite odōmonte apæ necä eñënonänimpa.

12 Mänïñedē odömänoidi änäni ate Acayabæ awënë Gadiōno inongäimpa. Tömengä awënë nänō inōñedē oodeoidi godongämæ pönëninque Ao äninque Pabodo ingante quingæ mämō bæi ongonte æninque awënë Gadiōno nänō cōwē apænte änōñömō ænte mäodäni gocantapa.

13 Awënë weca pöninque Pabodo ingantedō ante pïinte äninque,

— Ìingä iñömō, Mönō wadō bai cædinque Wængonguï ingante waa ate apæ necäimpa, ante odömōninque mōnitō awënëidi nāni wææ änönō ante wido cæcampa. Mänōmaï wapiticæ cædinque ancaa änewengä eñëninque tömänäni adobai wapiticæ cædänipa cæbii.

14 Änäni ate Pabodo tæcæ apæ necæ cæyongante Gadiōno oodeoidi inänite iïmaï ante wææ apæ necantapa.

— Oodeoidi eñëedäni. Minitō botō weca ponte apæ nedinque, Odömāno awënë nänō wææ änō bai ìingä eñënamäi cæcampa, ämïni bai, Waocä ingante ædæmō wiwa cæcampa, ante ämïni bai botō mïni änō do eñëninque apænte ancædōmoimpa.

15 Minitō iñæmpa, Tömengä tededonque ante oda cæcampa, ämïnipa. Minitō emōwo ante oda cæcampa, ämïni. Minitō wææ angainō ante oda cæcampa, ante pïimïnipa. Mäninonque ante oda cæcampa, ante ancaa tedewëmïni wædinque botō wæætē tömengä

ingante apænte änāmaï incæboimpa. Tömëmînique tōmengä ingante apænte äedäni.

¹⁶ Ante pîinte äinique awënë tōmënäni inänite, Botō apænte äñömō ongönāmaï gobæwedäni.

¹⁷ Ante wido cæcä tao godinique tōmänäni oodeoidi odömöincönë nē aacä Totënë ingante wæætë bæi ongonte tæi tæi pänäni incæte nē apænte anguënengä incæ Gadiōno iñömō önonque adāmaï inte bai ee acä pangadänimpa.

Pabodo Antioquiya ponte gocampa

¹⁸ İninque tæönæ quëwente ate Pabodo Coodinto iñömō nāni pönencabo inänite, Gobopa, äinique wadæ godinique Tidiabæ gocæte ante Tencodea ganca pongantapa. Tōmengä do apænedinique, Botō mänimpoga ocaguï tocadāmaï inte Wængonguï beyænque cædinque botō tōmëmo äninō ante cōwë cæcæboimpa, ante doyedë änongäimpa. Nōwo iñömō tōmengä nänō äninō bai iinique cædingä inte Tencodea iñömō pöinique ocaguï ëö toacantapa. Ayæ ëö tocacä ate tōmengä Piditida tönö Aquidæ nāna gæncaya tönö godongämæ ñænæ wipodë go guidinique tōmënäni Tidiabæ gocæte ante wogaa godänitapa. ¹⁹ Mänömaï godinique Epeto iñömō go ti wæænänitapa. Tömëna nāna gæncaya mänïñömō ti wææninique tæ contayöna Pabodo iñömō oodeoidi nāni odömöincönë go guidinique oodeoidi inänite, İmaï impa apænebo ëñencæmînimpa, ante apænecä. ²⁰ Eñëinique tōmënäni, Bitō mönitō weca wantæpiyæ quëwenguïmi, äñönäni tōmengä Baa äinique, ²¹ wæætë, Gobopa, angantapa. Ayæ, “Nōwo Eedotadëe iñömō ææmæ bequinque goquënëmo imo incæte Wængonguï Ao angä ate

botö mīnitö weca ayæ ate wæætē ocæ ěmænte poncæboimpa. Nōwo gobo tamēñedāni.”

Äninqe Epeto iñömö ñænæ wipodē go guii tæ contadinque Pabodo wogaa gocantapa. ²² Godinque Tetadea pö ti wææninque Eedotadēē iñömö Itota Codito ingante godongämæ nāni pönencabo weca ēñacæte ante æicantapa. Ayæ ate Antioquiya wæicantapa. ²³ Ayæ ate māniñömö tæönæ quēwēninque wadæ godinque Gadatiabæ adodö godinque Pidiquiabæ tōmäo wayömö wayömö cægonte godinque Itota miñæ nē tee empote quēwēnāni tōmānāni inānite mäo apænedinque, Mönö ñimpo cädämäi inte tæi piñænte cæcæimpa, ante apæ necä ēñēninque tōmēnāni tæi piñænte entawēninque quēwengadānimpa.

Epeto iñömö Apodo apæ necä ēñēnānipa

²⁴ Māniñedē wacä oodeo tōmengä ěmōwo Apodo iñömö Equitobæ Adecantodia nāni quēwēñömö ēñate pægaingä inte ñōwo Epeto nāni quēwēñömö pongantapa. Tōmengä iñömö nangui adinque nē ēñēnongä inte Wængongui angä ēñente nāni yewæmongainö ante do ēñēninque waa pōni apæ necä inongäimpa. ²⁵ Mönö Awēnē taadö ante apæneyönāni do ēñēningä inte māninö ante ædæmō ěwocadinque tōmengä, Ēñencädānimpa, ante nangui apæ necantapa. Ayæ Itota nānō cægainö ante nō ante odömōnte apæ necä incæte Apodo iñömö Wäö æpænē nānō guidongaïnonque ante māningancaque ēñēningä inte māningancaque ante tōingä odōmongä ēñēnōnānimpa. ²⁶ Tōmengä ñōwo oodeoidi odömōincönē go guii go guii

cædinque guiñenedämaï inte apænecantapa. Pidotida tönö Aquidæ nana gæncaya guiquënë tömengä mänömaï apænecä tæcæ ëñëninque edæ Apodo ingante, Mönatö weca pöe, äna pöñongante, Wængonguï taadö iïmaï inompa, ante töngä apæneda tæcæ mä ëñengantapa.

²⁷ Mänömaï cæda ate Apodo wæætë Acayabæ gocæte ante cæyongante tömënäni näni pönencabo tömengä ingante, Waa goe, änänitapa. Ayæ, Acayabæ iñömö Itota ingante nê tee empote quëwënäni acæðänimpa, ante iïmaï ante cadota ante yewæmönänitapa. Minitö, Apodo pongä adinque tömengä ingante waa cæedäni, ante yewæmöninque tömengä ingante pædæ pönönäni ænte godinque mäo Acayabæ quëwënäni inänite pædæ godongä adänitapa. Tömënäni Wængonguï waadete pönö cæcä ate nê pönënäni iñönänite Apodo nê waa pönï apænedongä inte mäniñömö ponte apænedinque tömënäni tönö godongämæ cægacäimpa. ²⁸ Edæ tömänäni ayönäni Apodo oodeoidi inänite nanguï wæætedö wæætë apænedinque gomonga apænecä wæðänitapa. Tömengä, Mönö Codito æbänö cæquingää, ante Wængonguï angä ëñente näni yewæmongainta adinque mönö ëñengäimpa, angantapa. Ayæ, Itota mäninö näni yewæmongainö bai nê cædongä inte näwangä mönö Codito inongä ingampa, ante nö apænecä ëñëninque tömënäni ædö cæte wadö ante apænequïnänii.

19

Epeto iñömö Pabodo ponte apænecampa

1 Apodo ayæ Coodinto iñömö ee ongoñongä Pabodo nänö cægönimæ tæcæguedë änanquidi owëñaque pö Epeto iñömö wæængantapa. Ponte ayongä Itota ingante nê tee empote quëwënäni pancadäniya a ongönäni. 2 Adinque tömengä tömënäni inänite,

—Minitö pönente bayömini Wængongui tömengä Tæiyæ Waëmö Önöwoca ingante da pönongä æmïnitawo.

Äñongä tömënäni wæætë,

—Iñæmpa mäningä Tæiyæ Waëmö Önöwoca ingantedö ante apænedänipa ëñenguimöni.

3 Ante apænedäni ëñëninque Pabodo wæætë,

—Iñinque æcänö ëmöwo ante æpænë guimïnitawo.

Äñongante,

—Wäö wodi nänö æpænë guidongainö ante guiitamönipa.

4 Mänömainö ante apænedäni ëñëninque Pabodo wæætë,

—Wäö wodi nänö guidongainö ante guiigaimini inte minitö, Idæwaa wënæ wënæ cæte awædö, ante Wængongui Awënë gämænö ocæ ëmænte pongaimini iminipa. Incæte Wäö wodi, Iñcayæ ate nê Ponguingä ingante pönencæminimpa, äninque tömënäni inänite æpænë guidongacäimpa. Mäningä iñömö Wäö nänö, Nê Ponguingä, änogä iñömö Itota inongä ingampa.

5 Ante apæneçä ëñente wæyönäni Pabodo wæætë mönö Awënë Itota ëmöwo apænedinque æpænë guidongä guidänitapa. 6 Ayæ tömengä gampocä ongoñönäni Wængongui Tæiyæ Waëmö

Önōwoca wææ tōmēnāni baonga guicantapa. Guicā ate tōmēnāni wadāni nāni tede bai mā tededinque Wængongui beyæ apænedānitapa. ⁷ Mānīnāni onguiñænāni æpænē nē guidēnāni iñōmō önompo tipæmpoga go mengāa inōnānimpa.

⁸ Pabodo apāicā mengāa go adocanque pāmonque adoyōmō quēwēninque oodeoidi odōmōincōnē go guī go guī cædinque guiñēnedāmai apænedinque, Wængongui Awēnē Odeye do pongāimpa, ante apænebo ēñēedani, ante nōingā ante apænecā ēñēnānitapa. ⁹ Apænecā ēñēñōnāni pancadāniya guiquēnē, Wīi pōnēinente awædō, ante Baa āninque Wængongui Awēnē taadō ante wīwa tedewēnānitapa. Mānōmai tedewēnāni ēñente wædinque Pabodo iñōmō emō cæte godinque Itota ingante nē tee empote quēwēnāni inānite ænte wadæ gocantapa. Ayæ iimō iñō iimō iñō Tidānō nānō apæneincōnē go guī go guī cæte apænedinque Pabodo māniñōmō pō guidāni tōnō guēadō guēa apænedānitapa. ¹⁰ Ayæ mēnepoga wadepo ganca Pabodo mānōmai cæyongā oodeoidi incæ guidiegoidi incæ Atiabæ quēwēnāni tōmānāni mōnō Awēnē nānō apænedō ante ēñēnānitapa.

¹¹ Ayæ Pabodo tōnō godongāmæ cædinque Wængongui tæi piñænogā inte nanguī cæcantapa.

¹² Īninque tōmēnāni Pabodo weocoo wadæ cæcadoquincoo incæ padēincoo incæ æninque wēnæ wēnæ ināni inānite ænte māmō wo caayōnāni waa badānitapa. Ayæ mānōmai cæyōnāni wēnæidi nē wīwa ewocadāni tōmēnāni nāni nē ewēnēnīnāni tao godānitapa.

¹³ Māniñedē oodeoidi Itota ingante pōnēnāmai

ināni incæ pancadāniya wayōmō wayōmō godinque wēnæidi nē wīwa ēwocadāni inānite nē wido cædāni inōnānimpa. Tōmēnāni nāmā mā pōnēwēninque, Nōwo Awēnē Itota ēmōwo apænedinque mōnō wēnæ ingante wido cæcæimpa, ante cædinque wēnæidi inānite iīmaī ānōnānimpa. Pabodo nānō nē apænedongā Itota ēmōwo apænedinque botō, Wēnæbi tao gobāwe āmopa, ānewēnōnānimpa.

14 Māniñedē oodeoidi beyæ, Wængonguī quī, ante nē godongā ñænængā adocanque Etequeba iñongā tōmengā wēnāni tiæte ganca inānitapa. Iīnāni iñōmō Itota ingante pōnēnāmaī ināni incæte adobaī cæcæ cædānitapa. 15 Tæcæ cæcæ cæyōnānite wēnæ nē wīwa ēwocadongā incæ tōmēnāni inānite nāēmæ tededinque, “Itota ingante do abopa. Ayæ Pabodo æcānō ingāā, ante do ēñēmopa. Wæætē mīnitō guiquēnē æmīnidō imīni.”

16 Añongā wēnæ wīwa inongā ingante nē ēwēnengā inte wiyaēmæ tōmēnāni inānite to māo yao ongōninque bæ tacantapa. Mānōmaī cædinque tōmēnāni weocoo gā tadongadinque tæi tæi pangā ate tōmēnāni weocoo ōmaadāni inte wepæ taate wædinque oncodo tao wodii wīnōnānitapa. 17 Mānōmaī batimpa, ante tedeyōnāni Epeto iñōmō quēwēnāni oodeoidi incæ guidiegoidi incæ tōmānāni ēñēninque ancaī guīñente wædānitapa. Iīninque mōnō Awēnē Itota ēmōwo wīi ōnonque ante tededāni inte tōmengā ēmōwo æwocæte baī cædinque, Tæi piñængā inte ēmongampa, ante wædānitapa.

18 Ayæ nanguī ināni ñōwo wede pōnente

badinque adoyömō pōninque tōmänāni ēñēñōnāni tōmēnāni nāni wēnæ wēnæ cædinō ante tōmänō ante edonque apænedinque, Idæwaa wēnæ wēnæ cæte awædō, ante wido cædānitapa. ¹⁹ Ayæ idō inte nē yewænināni incæ pancadāniya adobaī pōnente badinque tōmēnāni nāni, Æbānō cæte yewænguī, ante yewæmōninta incæ adoyömō ænte pōninque tōmänāni āñōnāni nē tānānitapa. Mānintacoo æpodō itædē cædinque padata nāni æinta beyæ godonte ænānii, ante cōwā ayōnāni tincoenta mīido ganca mānimpota nāni godonte æninta incæ nē tānāni agadānimpa. ²⁰ Mānōmaī nē pōnēnāni badinque waa cædāni īninque mōnō Awēnē nānō ānō ante godōmenque wayōmō wayōmō māo gode ānāni ēñēninque tōmengā ingante nāni pōnencabo incæ yebæninque tæī pīñænāni bagadānimpa.

²¹ Mānōmaī cædāni ate Pabodo ōnōwēnenque pōnēninque, Māatedōniabæ ēñacæ godinque botō Acayabæ ēñacæ godinque Eedotadēē gocæboimpa, ante pōnēninque, ayæ, Māniñōmō gote ate Odōmā nāni quēwēñōmō cōwē goquēnēmo īmopa, angantapa. ²² Āninque tōmengā beyæ nē cædāni iñōnānite mēnaa īnate Timoteo tōnō Edaato īnate apænedinque, Māatedōniabæ gote ongōñōmīna botō Atiabæ wantæ quēwente pōmoeda, ante da godongā godatapa.

Epetoidi nanguī Yæ yæ ānānipa

²³ Māniñedē Epeto iñōmō quēwēnāni iñōmō, Itota Taadō mōnō wido cæcæimpa, ante nanguī Yæ yæ ānānitapa. ²⁴ Tōmēnāni, Mōnitō wængonguīnā Diānā īnampa, ante onquiyænā ēmōnō baī badōninque māninca weca ædæ wæænte nē apænedāni

inōnānīpa. Tōmēnāni quēwēñōmō adocanque Deēmetedio nāni ānongā iñōmō padata aca podonte nē badongā inongāīpa. Tōmengā iñōmō padatagæ ænīnque aca podonte badōnīnque, Mīni wængonguīnā Diānā inante mīni tæiyæ waēmō apæneincō bai īpa, ante guīyanconque badonte quēwēnongāīpa. Mānōmaī badōñongā tōmengā tōnō godongāmæ cædāni wæætē wadāni inānite godonte ænīnque mānīncoo beyæ tōmēnāni godonte æinta nanguī ænīnque quēwēnōnānīpa. ²⁵ Inīnque tōmengā tōnō nē cædāni inānite ayæ wadāni adobai cædāni inānite añete pōnāni ate Deēmetedio iñōmō tōmēnāni inānite apænecantapa.

“Iñānāni, do ēñēmīnīpa. Mōnō badonte godōnīnque wadāni nāni pōnōnīnta nanguī æmōmpa. ²⁶ Ayæ nanguī ināni Epeto inōmō quēwēnāni incæ Atiabæ wodo tōmāmæ quēwēnāni incæ iingā Pabodo guīquēnē wapiticæ apænecā ēñēnīnque edæ oda cædinque tōmengā mīñæ godānīpa, ante do ēñēmīnīpa. Tōmengā iñōmō, Ōnompoca badōnīnca wīi wængonguīdī inānīpa, ante tedecā apa quēwēmīnī. ²⁷ Mānōmaī tedecā beyæ mōnō badōnō ante wadāni nanguī ināni pīinte anguīnāni awædō. Ayæ Diānā ñænænā wængonguīnā iñōnante tōmengā ingante mōnō apæneincō incæ, Ōnonconque īpa, anguīnāni awædō. Ayæ godōmenque, Mōnō wængonguīnā Diānā waa pōnī wængonguīnā ināmpa, ante Atiabæ tōmāo quēwēnāni tōnō inguīpoga tōmāo quēwēnāni nāni waa adōnā iñōnante wabānō wapiticæ tededinque godō pīinguīnāni badānīpa, ante awædō.”

28 Ante Deëmetedio mänömainö ante apænecä eñëninque tömënäni ænguï badinque ogæ tededinque, “Epetoidi wængonguinä Diänä ñænänä inampa,” ante wæætë wæætë ancaa änänitapa.

29 Mänömaï padata në badönäni Yæ yæ änäni eñente wædinque mäniñömö quëwënäni tömänäni, Quiëmë bai cädänipa, ante acæte ante wadö pö wadö pö pogodo pönänitapa. Ponte ayönäni Mäatedöniabæ quëwente Pabodo tönö godongämæ në pönina Gayo tönö Aditadoco a ongöna adinque tömënäni tömëna inate bæi ongonte quingæ mäo tömënäni näni aincönë ñænæncönë go guidänitapa. 30 Pabodo guiquënë mänömaï cädäni ate wædinque, Godongämæ ongönäni weca go guidinqe apænecæboimpa, ante cæyongante Itota ingante në tee empote quëwënäni wæætë, Wænompa, ante, Go guidämaï incæbiimpa, ante wææ cädänitapa. 31 Ayæ mänimæ awënëidi pancadäniya Pabodo æmigoidi inäni inte adobai mämö tömengä ingante gode äninque, Bitö ædö cæte mäniñömö go guiquimii, ante wææ änänitapa.

32 Ìñonte godongämæ ongönäni guiquënë, Quinante pömoï, ante wodo tömänäni eñënamäi inänitapa. Pancadäniya, Ìimaï cæcæimpa, äñönänite wadäni guiquënë, Wadö bai cæcæimpa, ante wæætedö wæætë ante ogæ tededinque nanguï pöni Yæ yæ änänitapa. 33 Yæ yæ äñönäni oodeoidi guiquënë Adecantodo ingante yæcado gö cädäni ongongä adinque godongämæ ongönäni pancadäniya tömengä ingante, Ìimaï cæcæimpa, änänitapa. Tömengä guiquënë tömënäni inänite

wææ apænecaete ante, Apocænē iedāni, ante bai cædinque pipo pipo cæcantapa. ³⁴ Oodeo inongā inte mǎnōmaī cæcampa, ante wædinque tōmengā ingante eñēnāmaī inte tōmānāni adoyōmō ogæ tedinque, “Epetoidi wængonguīnā Diānā ñænænā inampa,” ante mēa ooda ganca adodō adodō adodō ante nanguī ānānitapa.

³⁵ Ayæ ate tōmēnāni awēnē Tequedetadio incæ anca tōmēnāni inānite angā eñēnte apocænē cæyōnāni tōmengā, “Epetoidi eñēmīni. Tōmāo quēwēnāni mǎnōmaīnō ante do eñēnānipa. Mōnō Epeto iñōmō quēwencabo mōnō wængonguīnā Diānā apæneincō nē aamō imompa. Ayæ tōmengā awinca bai yewæmōinca öönædē mōnō wæængainca adobai nē wææ cæmō imompa, ante adinque tōmāmæ quēwēnāni do eñēnānipa cæmīnii. ³⁶ Mānīnō ante nāwangā pōnī impa, ante adinque, Babæ impa, ante ædō cæte anguīnānii. Īnīnque mīnitō eñēnāmaī mīni Yæ yæ ānewēnō ñimpo cædinque piyænē cæquēnēmīni imīnipa. ³⁷ Īina mīni bæi ongonte ænte pōnōnīna iñōmō mōnō wængonguīnā Diānā apæneincōnē guīdāmaī ina inte wēnæ wēnæ cædāmaī inapa. Ayæ mōnō wængonguīnā Diānā inantedō ante wīi wēnæ wēnæ ante pīina apa quēwēnānii.”

³⁸ “Deēmetedio padatagæ nāni badoncabo incæ wacā ingante, Wīwa cæbitapa, piinte wædānitawo. Edæ nē apænte nāni āincō cōwē wi ænete ongompa. Mānīncōnē nē apænte ānāni cōwē ongōnānipa. Īnīnque Deēmetedioidi nē nāni piinongā ingante māniñōmō ænte gote ānāni eñēnīnque nē apænte ānāni wæætē tōmengā ingante do

apænte anguënänäni inänipa. ³⁹ Ayæ apænte änäni, Iïönæ tōmāmīni godongāmæ pōedāni, nāni änïönæ bayonte mīnitō godōmenque pīinte äinēmīni inte mānïönæ ponte ämīni eñente apænte änäni ate mīnitō piyænē cæquënēmīni imīnipa. ⁴⁰ Edæ ñōwoönæ mīni Yæ yæ änewëninō ante awënēidi pōninque, Quinante mänōmaï cæmīnii, ante äñönāni wæætē, Quiēmē beyæ cætimpā, ante mōnō angæimpā. Tōmēnāni wæætē mōnō imonte äninque, Mīnitō awënē ingante wido cæcæte ante cæmīnipa, ante pīināni wæcæ wæ.” ⁴¹ Äninque godongāmæ ponte ongönāni inänite tōmengä angä gogadänimpa.

20

Mäatedöniabæ godinque Pabodo Guidetiabæ gocampa

¹ Mänii Yæ yæ ante näni änewënō iinque cædāni ate Itota ingante nē tee empote quëwënāni inänite wæætē äñete pōñönānite Pabodo, Mīnitō gancæ pōnente godōmenque cæcæmīnimpā, ante godō ædæmō apænecantapa. Ayæ, Ñōwo gobopa, ante Mäatedöniabæ gocantapa. ² Godinque tōmengä mänïñömō quëwënāni inänite, Mīnitō gancæ pōnente godōmenque cæcæmīnimpā, ante godō ædæmō apænecä eñënānitapa. Mänōmaï nanguï apænedinque tōmengä mänimæ tōmāo cægōninque wayömō māo wayömō māo apænecä eñënāni ate Guidetiabæ gote pongantapa. ³ Mänïñömō pōninque mēa go adoque apäicä quëwengantapa.

Ayæ, Tidiabæ goquïmo, ante tæcæ ñænæ wipodē guicæ cæyongante wadāni, Oodeoidi

bitō ïmite wænoncæte ante cædānīpa ataque. Ante wææ änāni wædinque tōmengä, Botō wæætē adodō godinque Mäatedōniabæ wodo tebæ gocæboimpa, äninque taadonque gocantapa. ⁴ Goyongä tōmengä tönō godongämæ godāni ïñömō, adocanque Bedea quëwëningä inte Pidido wengä Topatede, ayæ wææ Tetadōnica quëwëñina Aditadoco tönō Tegonto mënaa, ayæ wææ Dedebe quëwëningä Gayo tönō Timoteo mënaa, ayæ wææ Atiabæ quëwëñina Tiquico tönō Todopīmo mënaa, mänimpodāni ïnānitapa. ⁵ Tömënāni tāno godinque Todoa nāni quëwëñömō pōninque mōnitō wipodē ponguimōni ante ee ongönānitapa. ⁶ Mōnitō guiquënë oodeoidi päö yedæ æmpoqui ömæmō ï nāni cænguïönæ ïinque baganca Pidipo ïñömō quëwëninque wipodē ñænæmpodē go guiidinque wogaa godinque önompo æmæmpoque ëönæ gote ate tömënāni weca Todoa pōninque önompo æmæmpoque go mëönaa quëwentamōnīpa.

Todoa ïñömō Pabodo ponte apænecampa

⁷ Tömënāni nāni guëmanguïönæ go ate mōnitō, Ñöwo gäwadecæ bayö Wængonguï itæde impa, ante päö godongämæ cæncæte ante æmongapaa æi wænömënæcapaa æi guiidinque tæ contatamōnīpa. Pabodo ïñömō baänæ ate gocæ cædingä inte æi guii tæ contadinque wantæpiyæ ayaönænëña pōñi ayæ apænecä ëñentamōnīpa. ⁸ Wænömënæcapaa mōni godongämæ ëñengoncönë gongapæncade bacoö ti wodōnote më ongönimpa. ⁹ Adocanque edëningä tōmengä ëmōwo Eotico ayamōnecāa tæ contate ongongantapa. ïinque Pabodo wantæpiyæ apæneyongä edëningä ïñömō

möwocodë nanguï möinente ayæ wangæ monte wænömënæcapaa ongöningue yæipodë tæ go wæængantapa. Go wæænte do wængä adinque tömengä ingante yao ongonte mänänitapa. ¹⁰ Näñe wænte öñöñongä Pabodo yæipodë wææningue, Quëwencæcäimpa, ante cædinque wïni ænte pæ mangantapa. Ayæ në pönëmöni möni caipæ imönite apænedinque,

—Mïi quëwengä ingampa. Guiñente wædämaï iedäni, angantapa.

¹¹ Äningue Pabodo wæætë adodö æmongapaa æidinque päö ænte pä ænte mönitö tönö godongämæ cæningue wantæpiyæ godömenque apæncöñongä edæ ñäö batimpa. Näö ba ate Pabodo ñimpo cæte wadæ gocantapa. ¹² Ayæ, Edëningä mïingä quëwengampa, ante ænte wadæ godinque tömëñäni wampo pönëningue nanguï togadänimpa.

Ömaaque godinque Pabodo Müideto ganca pongampa

¹³ Pabodo guiquënë taadonque gocæ cædinque mönitö imönite apæncantapa. Mïnitö wipodë ñænæmpodë go guiidinque mäodämæ wipodenque godämæ goyömïni, botö ömaaque näñe tebæ pömoedäni. Atönö iñömö pö wäi wocænte owoyömïni botö iñömö ömaaque pö adopodë guiibo ate gocæimpa, angä Ao ante mönitö täno go gui tæ contadinque öme tagamönimpa. ¹⁴ Mänömaï godinque Atönö iñömö pö wäi wocænte owoyömöni tömengä ömaaque pö bee tëningue ñænæ wipodë adopodë pö guiite tæ contacä ate mönitö godongämæ

wogaa godinque Miitidēne nāni quēwēñōmō pontamōnipa. ¹⁵ Māniñōmō wāi wocænte monte ate ñāō ba wogaa godinque mōnitō Quiyo ganca pōninque waōnæ ate wodo pænta godinque wæætē Tāmo iñōmō pōmōnique go Todoguidio iñōmō pōmōnique go iñabæ guingā ate Miideto pontamōnipa. ¹⁶ Edæ, Ææmæ Pentecotee nāni ānōmæ botō bequinque Eedotadēē eyepæ poncæte ante quingæ goquēnēmo imopa, ante do āningā inte Pabodo ñōwo, Atiabæ wantæpiyæ ongōninque ædō cæte Eedotadēē eyepæ pōmaimoo. Ante pōnente wædinque, Epeto iñōmō ti wæænāmaī yaatænque gocæboimpa. Āñongā mōnitō tōmengā tōnō Epeto wodo tebæ godinque Miideto iñōmō pontamōnipa.

Epeto iñōmō nē Picænāni inānite Pabodo apæñecampa

¹⁷ Māni wipo ñænæmpo Miideto iñōmō wogaa pō wāi wocæ ate ti wææninque Pabodo wadāni inānite da godōninque, Minitō Epeto iñōmō tōmæwæ æidinque Itota Codito ingante nē godongāmæ pōnēnāni weca godinque tōmēnāni inānite nē aadāni Picænāni inānite āñete pōedāni. ¹⁸ Angā āñete pōñōnānite tōmengā, “Botō Atiabæ mā ponte quēwēninque botō goganca æbānō mīnitō weca waa cæte quēwēnōmoī, ante do ēñēmīnipa. ¹⁹ Edæ oodeoidi, Wænoncæ, ānāni ēñēninque nanguī guiñente wæbo incæte botō, Ōnōmoque baī imopa, ante pōnēninque Wængonguī beyænque nanguī cædinque Ca ca wædinque ee cætabopa. ²⁰ Īninque botō, Minitō beyænque quīnō waa inguī, ante pōnēninque pæ wēenedāmaī inte do apænebo

ēñēmīnitapa. Ayæ edæ tōmānāni ayōnāni odōmonte apænedinque botō wacōnē māo wacōnē māo go guiidinke apænebo ēñēmīnitapa. ²¹ Ayæ pancamīniya oodeoidi iñōmīnite pancamīniya guidiegoidi iñōmīnite botō tōmāmīni imīnite apænedinque iīmaī ante apænetabopa. Mīnitō, Idæwaa wēnæ wēnæ cæte awædō, ante pōnente wædinque Wængonguī gāmænō pōninque mōnō Awēnē Itota Codito ingante pōnencæmīnīmpa, ante āmo ēñēmīnitapa. Mānōmaī tōmāā cætabopa, ante do ēñēmīnīpa.”

²² “Nōwo guiquēnē Wængonguī Ōnōwoca angā ēñēninque Eedotadēē gocæboīmpa. Māniñōmō pōñōmote quiēmē bai bacæīmpa, ante pōnente wædīmo incæte ee gocæboīmpa. ²³ Ōnonque botō ñōwo wayōmō wayōmō nāni quēwēñōmō pōñōmote wadāni Wængonguī Tæiyæ Waēmō Ōnōwoca tōnō apænecā ēñēnāni inte do botō imote iīmaī ante wææ ānānīpa. Bitō tee mōnete nanguī caate wæquinque Eedotadēē gobīpa, ānāni ēñēninque māninque ante ēñēmōpa. ²⁴ Incæte, Wængonguī waadete pōnō cædinque nānō cægāinō ante watapæ apænedinque bitō, Nō pōnī impa, ante apænebi ēñencædānīmpa, ante mōnō Awēnē Itota doyedē botō imote angacāīmpa. Iīnque tōmengā nānō anganca iīnque cæcæte ante cæyōmote wænōnāni wæmo incæte botō, Godōmenque inguīpoga quēwenguēnēmo intabopa, ante wædāmaī incæboīmpa. Ayæ pogodo gote bai botō goquīnō tōmānō gocæte ante nanguī cæcæboīmpa, āmōpa,” ante Pabodo apænecantapa.

²⁵ Ante apænedinque tōmengā ayæ godōmenque

apænecantapa. “Botō, Mönō Awënē Odeye do pongäimpa, ante apænedinque wayömō māo wayömō māo apænebo eñēmīnitapa. Idæwaa apænebo eñēnīmīni inte mīnitō ñōwo æmæwo botō awinca amīnīpa. ²⁶ Mänōmaī beyæ botō ñōwoönæ apænedinque mīnitō imīnite iīmaī ämopa. Botō, Quëwencæmīnīmpa, ante cædinque ancaa apænebo incæte pancadāniya tōmēnāni nāni wīi eñēnō beyænque wentamō mongænte nāni wænguinque goyōnāni botō wæætē mänīnō beyæ wentamō mongænāmaī imopa. ²⁷ Wængonguī, iīmaī cæbo bacæimpa, ante nānō änō ante botō iñōmō edæ pæ wëenedāmaī inte mīnitō imīnite tōmānō edonque pōnī apænebo eñēmīnitapa.”

²⁸ “Mīnitō iñōmō edæ nāmā wææ aadinque waa cæte quëwëedāni. Wængonguī Ōnōwoca mīnitō imīnite äninque, iīnāni cæningäidi bai inānīpa, ante nānō nē angaināni iñōnānite mīnitō wæætē nē aamīni inōmīni inte tōmēnāni inānite ædæmō wææ aadāni. Mönō Awënē Codito ingante nāni godongāmæ pōnencabo inānite æncæte ante tōmengä nāmā wepæ godonte ængä ate Wængonguī quīnāni bagadānīmpa cæmīnīi. Mīnitō tōmēnāni inānite nē aamīni inte waa aadāni. ²⁹ Edæ botō do eñēmopa. Babæidi gāwæī ecate ade cænāni amīnīpa. Edæ botō emō cæte gobo ate waodāni incæ babæidi cædāni mīni abai adobai wënæ wënæ cædinque mīni pōnencabo iñōmīnite ata cæpodāmaī incædānīmpa. Tōmēnāni babæ wapiticæ änāni eñēnīnque mīni cabo incæ pancadāniya eñēnāmaī badīnque wadæ godāni wæcæmīnīmpa. ³⁰ Ayæ tōmēmīni mīni pōnencabo incæ pancadāniya, Mōnitō

mīñæ poncæminimpa, ante cædinque babæ wapiticæ odömoncædänimpa cæminii. ³¹ Edæ wææ cæedāni. Botö, Mänömaï bacæimpa, ante wadepo mēnepoga go adodepoque iñonte itædē incæ woyowotæ incæ ñimpo cædāmaï inte Ca ca wædinque mīnitö tömämīni imīnite apænebo eññömīnimpa. Mänömainö ante pönēedāni,” ante Pabodo apænecä eññänitapa.

³² Äninqe tömengä, “Iñänāni, botö mīnitö imīnite Wængonguï nempo ñöwo emö cæte gobo tamēñedāni. Tömengä waadete nänö pönö cædinö ante möni apænedö ante eññente ewocamīni iñömīnite tömengä mīnitö imīnite godongämæ cæcä ate tæi piñænte bacæminimpa. Ayæ Wængonguï quimōni tömämōni tönö mīnitö adocabomīni bayömīnite tömengä eyepæ da pönongä ate mīnitö mönitö tönö godongämæ æncæminimpa. ³³ Botö iñömö æbänö quëwëmoï aedāni. Edæ wacä qui tigitamö incæ oodo incæ weocoo incæ, Botö qui bacæimpa, ante cöwë æinēnāmaï inömoimpa. ³⁴ Edæ tömëmo önompoca botö cædinö beyænque quiëmë ænguënëmo ante eyepæ æninqe quëwënömoimpa. Ayæ botö tönö godongämæ cædāni nāni ænguënënö ante adinqe adobaï botö tömëmo önompoca cædinö beyænque æninqe tömēnāni inānite da godö da godö cæbo æninqe quëwënönānimpa. Mänömaï botö cædinö ante do eññemīnīpa. ³⁵ Mönö Awënë Itota incæ iïmaï ante apænegacäimpa. ‘Mäincoo æninqe mönö wædænque tomompa. Wæætë wacä ingante pædæ godöninque mönö nanguï toquinque impa.’ Ante Itota nänö apænegainö ante pönëninque

botō, Mänōmaī mōnō ōnompoca nanguī cædinque æninque wadāni nē ænguēnēnāni inānite mōnō pædæ godongæimpa, ante mīnitō imīnite cōwē odōmonte apænebo ēñēmīnitapa.”

³⁶ Mänōmainō ante iinque apænedinque Pabodo tōmēnāni tōnō da guicapodinque Wængonguī ingante apænecantapa. ³⁷ Ayæ tōmēnāni Ca ca wædinque, Waa goe, ancæte ante godongāmæ goto pōninque tōmengā ingante yaagō yaagō cædānitapa. ³⁸ Tōmengā nānō, Botō imote æmæwo amīnīpa, nānō ānīnō beyæ godōmenque nanguī wædānitapa. Ayæ tōmengā ingante ñænæ wipo ganca ænte māodāni gogacāimpa.

21

Pabodo Eedotadēē gocampa

¹ Mōnitō tōniñadāni tōnō godongāmæ wægōninque Pabodo tōnō mōni goquincabo iñōmō, Wipo ñænæmpo do wogaa gocæ cæpa, ante adinque edæ, Nōwo gomōnīpa, ante tōmēnāni inānite emō cæte godinque mānimpodē go guītamōnīpa. Guīdinque mōnitō tōingā wogaa godinque Coto nāni quēwēñōmō ponte tōmæwæ æite monte ate iimō ate Ododata gomōnique go Patada nāni quēwēñōmō pontamōnīpa. ² Patada iñōmō pō ti wæænte ayōmōni, Wipo ñænæmpo Pēnitia goquimpo impopa, ante adinque mānimpodē go guīdinque wogaa gotamōnīpa. ³ Wogaa godinque dipæmæ inō gomō ayōmōni wāā tēiwænē Tipidebæ a ongō adinque tæcæpæ inō wodo tebæ wogaa gomōnique go Tidiabæ pontamōnīpa. Ayæ ñænæmpo mōni goimpo Tido

iñömö mäincoo öwäaquï impa, ante eñëninque mönitö mänñömö adobaï ti wææntamönipa.

⁴ Ti wææninque mönitö tömënäni quëwëñömö ponte ayömöni Itota ingante në tee empote quëwënäni a ongönäni adinque mönitö önompo æmæmpoque go meönaa iñonte tömënäni tönö godongämæ quëwentamönipa. Tömënäni guiquënë, Wængonguï Tæiyæ Waëmö Önöwoca apænecä eñëninäni inte Pabodo ingante, Bitö wæquinque Eedotadëe iñömö gocæ cæbipa, ante wææ änänitapa. ⁵ Mänömaï ante wææ änäni eñëmöni incæte mönitö, Mänimpoönæque quëwenguënëmöni intamönipa, ante adinque wadæ gotamönipa. Ìninque tömënäni näni quëwëñömö yabæ inö tömënäni näni wencabo tömänäni ænte mäodäni godinque mönitö ëmönaiya pöninque godongämæ da guicapodinque Wængonguï ingante apænetamönipa. ⁶ Apænete ate mönitö, Gomönipa, äninque go ñænæ wipodë adopodë guiidinque wogaa gocæ cæyömönite tömënäni wæætë, Waa goedäni, äninque ocæ ëmænte tömënäni oncö godänitapa.

⁷ Mönitö iñömö Tido iñömö wadæ tao wogaa godinque Todëmaida iñömö pö tömæwæ æidinque mänñömö näni pönencabo inänite adinque mönitö, Pömönipa, äninque tömënäni tönö adoönæque quëwentamönipa. ⁸ Ìimö ate wadæ godinque Tetadea näni quëwëñömö pöninque Pedipe oncönë pö guite quëwentamönipa. Wëenëñedë Itota nänö në ëmiñænäni, Mönö pönencabo beyæ ante në cädäni tiæte ganca inäni incädänimpa, ante näni Tiæte änönäni iñönäni adocä Pedipe

tömēnāni nāni pōnencabo beyæ ante nē cæcā inongā inte Codito waa pōni nānō pōnō cægainō ante nē apæ necā inongāimpa. ⁹ Tōmengā wēnāni baquedānique mengāa go mengāa iñōnānite Wængonguī Önōwoca pōnō cæcā ate tömēnāni Wængonguī beyæ nē apæ nedāni inōnānimpa. ¹⁰ Mōnitō Pedipe weca tæōnæ quēwēmōni ate wacā onguīñængā tōmengā emōwo Agabo Wængonguī beyæ nē apæ nedongā inte Oodeabæ quēwente wææ pongantapa. ¹¹ Mōnitō weca pōninque tōmengā Pabodo pacadeyænta æninqe nāmā önompo goti wimpote wæi önōwa goti wēwadinque iīmaī ante apæ necantapa.

—Wængonguī Tæiyæ Waēmō Önōwoca botō imote æbānō ante apæ necāā, ante apænebo eñnedāni. Oodeoidi Eedotadēē nē quēwēnāni iñōmō iī pacadeyænta nē eadingā ingante mǎnōmaī goti wīninqe oodeoidi ināmaī ināni nempo pædæ godōnāni æncædānimpa, ante do apæ necā eñnemopa, ante Agabo apæ necantapa.

¹² Mǎnōmaī apæ necā eñēninqe mōnitō Tetadea quēwēnāni tōnō Pabodo ingante wææ wææ apæ nedinqe, Eedotadēē godāmaī imāwe. ¹³ Ante wææ añōmōnite Pabodo wæætē,

—Mīnitō iñæmpa Ca ca wæmīni eñente wædinque wætawente awædō. Edæ Eedotadēē goyōmote bæi ongonte goti wīnāni incæte wænōnāni wæmo incæte botō iñōmō ñimpo cædāmaī inte mōnō Awēnē Itota emōwo beyænque cōwē gocæboimpa.

¹⁴ Ante mǎnōmaī apæ necā eñēninqe mōnitō ancaa wææ añōmōnite Pabodo, Cōwē gocæboimpa, ante ñimpo cædāmaī inte angā wædinque mōnitō

wæætē edæ, Wængongui nänö änö bai bacæimpa, ante adinque mönitö ee ate pæ wëenetamönipa.

¹⁵ İninque mänimpoönæ mänĩñömö quëwëninque, Ñöwo mönö Eedotadëë gocæimpa, ante cædinque Pabodo tönö godongämæ ee gotamönipa.

¹⁶ Goyömöni Tetadea iñömö quëwënäni inte Itota ingante nē tee empote quëwënäni pancadäniya mönitö tönö godongämæ godinque, Näatöo oncönē owocæminimpa, ante mäninganca ænte mämönäni pö guiitamönipa. Tömengä iñömö wää tēiwænē Tipidebæ nē quëwëningä inte dobæyedē Itota nänö nē emĩñængä badingä inte quëwëningäimpa.

Tantiago weca Pabodo ëñacæ gocampa

¹⁷ Tömengä oncönē pö gui mömönique go Eedotadëë pöñömöni mänĩñömö quëwente nē pönänäni iñömö, Waa pömöni amönipa, ante todänitapa. ¹⁸ Ayæ iimö ate Pabodo tönö godongämæ möni poncabo Santiago weca ëñacæ gotamönipa. Tömengä weca pöñömönite nē pönänäni inänite nē aadäni nē Picænäni tömänäni adoyömö pönänitapa. ¹⁹ Adinque Pabodo, Waa quëwëmini, äninque godömenque iimaï ante apænecantapa. Mëmöidi ëñëedäni, äninque, Botö oodeoidi inämaï inäni weca gote cæyömote Wængongui iimaï godongämæ waa cæcantapa, ante Wængongui nänö cædinö ante tömengä adodö adodö ante apænecä ëñënänitapa. ²⁰ Eñëninque nē aadäni Picænäni guiquënē, Wængongui, Bitö waa pönī cæbitapa, ante godongämæ watapæ apænedänitapa. Ayæ Pabodo ingante wæætē apænedinque,

—Biwi ēñēmi. Oodeoidi æpodö müdo ganca inäni ñowo do pönente badäni abitapa. Tömēnāni iñömö Wængongui nänö wææ angainö ante tömänāni ēñente cōwē cædāni abitawo. ²¹ Ayæ edæ bitö Pabodobi wēnæ wēnæ cædāmaï iñömite wadāni bitö imitedö ante babæ wapiticæ godö oodeoidi inānite iïmaï ante tedewēnāni ēñēnānipa. Tömēnāni, Pabodo wayömö wayömö godinque oodeoidi wabæca quēwēnāni inānite bee tente odömöninque iïmaï ante apænecampa, ante tedewēnānipa. Pabodo, Minitö wēnāni inānite eö togænāmaï iedāni, äninque, Dodāni nāni angainö mīni ēñēnö ante ñimpo cædāni, ante änewengampa, ante tedewēnānipa. Ayæ godömenque äninque, Mōitee wodi nänö wææ angainö ante wido cædāni, ante Pabodo änewengampa töö. Ante tömēnāni bitö imitedö ante babæ ante tedewēnānipa. Iñæmpa bitö mänömaïnö ante änāmaï iñömite tömēnāni oodeoidi inānite babæ ante apænedāni ēñēnānipa cæbii. ²² İninque, Pabodo do pongäimpa, ante oodeoidi do ēñenguināni inānipa, ante pönente wædinque mönitö ñowo, Æbänö cæte wææ cæquïi, ante wæmönipa. ²³ İninque, Pabodo nö cæcä iñongante wadāni babæ wapiticæ tededānipa, ante oodeoidi ēñencædānimpa, ante wææ cædinque bitö iïmaï cæcæbiimpa ämönipa.

“Pabodo ēñēmi, änānitapa. Mönitö weca onguiñænāni mengäa go mengäa ināni ñowo ongöninque, Wængongui beyænque ante cōwē cæcæmönimpa, ante nē änināni inte tömēnāni nāni äninö bai iinque cæquïnāni inānipa. ²⁴ Tömēnāni, Mönitö äninö ante do iinque cædimöni inte wentamö mongænāmaï imöni acædānimpa, ante

cædinque, Wængonguï quï, ante godoncæ cædänipa. Ìninqe bitö iñömö mäninäni inänite ænte godinque tömënäni tönö godongämæ, Wængonguï quï, ante godöe. Ayæ bitö eyepæ pædæ godömi æninqe tömënäni näni godonguëncoco godonte æninqe, Wængonguï quï, ante godöninque tömënäni ocaguï tömanguï ocäa pöni ëö tocate incædänimpa. Bitö mänömaï tömënäni tönö iñacabo cædinque Möitee wodi nänö angainö bai cæbi adinque oodeoidi wæætë, Æ, Pabodo nö cæcä iñongante wadäni iñömö babæ wapiticæ tededänipa, ante ëñencædänimpa,” ante nê Picænäni änänitapa.

²⁵ “Ayæ oodeoidi inämaï inäni guiquënë nê pönänäni badinque æbänö cæquënëänäni inänipa, ante pönente wædinque mönitö do godongämæ pönëninque tömënäni inänite iïmaï ante yewæmontamönipa. Wadäni, Wængonguïdi quï, ante cænguï näni cönöncoco ante mïnitö cænämaï gomö aedäni. Wepæ owemöingä adinque cæningä ñë wïmencate wæningä adinque cænämaï iedäni. Ayæ nänöogængä inämaï iñongante mïnitö godö guëa mönämaï iedäni, ante do yewæmontamönipa,” ante nê aadäni Picænäni Pabodo ingante apænegadänimpa.

Wængonguï oncönë Pabodo ingante bæi ongönänipa

²⁶ Ìimö ate ñäö bayonte nê aadäni Picænäni näni äninö bai ëñente cædinque Pabodo mengäa go mengäa inäni inänite ænte mäocä gote cæyönäni tömengä nänö tæiyæ waëmö baquinque ante tömënäni tönö Möitee wodi nänö wææ angainö ante ëñente cæcantapa. Mänömaï

cædingä inte tömengä Wængonguī oncö ñænæncö yabæcönë go guiddinque mänñömö cædäni inänite apænedinque, Mönitö adoque Wængonguī itæde go ate Möitee wodi nänö angainō iinque cæmōni ate iināni iñömö, Wængonguī qui, ante baö pædæ pönönāni æninque tancæminimpa, ante Pabodo tömēnāni beyæ ante apænecantapa.

²⁷ Ayæ önompo æmæmpoque go mēönaa nänö änimpoönæ wodo iinque ba ate oodeoidi Atiabæ quëwente nē pönināni guiquënë Wængonguī oncö ñænæncö yabæcönë ponte ayönāni Pabodo a ongongä. Adinque mänñömö önonque ongönāni inänite, Mönö piinte cæcæimpa, ante änāni eñëninque iināni wæætë ænguī badänitapa. Ayæ Pabodo ingante bæi ongonte, ²⁸ aa pedinque tömengä ingante nē piinte änāni iñömö, “Idægoidi cöwä aedäni” ante, “Iingä ingampa cæminii. Pö godongämæ cædäni. Tömengä inguipoga tömäo godinque tömämæ quëwēnāni inänite mäo apænedinque iimainō ante tedewengampa. Idægoidi wēnæ wēnæ cædäni inänipa, ante cöwë änewengampa. Wængonguī oncö ñænæncö incæ önonconque impa, angampa. Ayæ Wængonguī nänö wææ angainō ante mönö eñënamäi ingæimpa, ante tömengä änewengampa töö. Ayæ iñömö oncö tæiyæ waëmö oncö iñonte tömengä wæætë guidiegoidi inänite ænte mämö iincönë guiddinque otænë öñö bai cæcantapa cæminii,” ante piinänitapa.

²⁹ Do edæ wacä Todopimo iñömö Epeto iñömö quëwëningä inte Eedotadëe pöninque Pabodo tönö cægōna inönäimpa. Mänōmäi guëa cægōna adinque oodeoidi, Æ, iingä oodeocä inämäi

iñongante Pabodo do Wængonguī oncō ñænæncō yabæcōnē ænte māmongā wäänē guiibaingampa, ante wawique pönēninque mäninō ante wapiticæ apænedānitapa.

³⁰ Mänōmaī ante ānewēnāni ēñēninque Eedotadēē quēwēnāni tōmāo iñōmō Yæ yæ āninque pogodo pönānitapa. Ponte Wængonguī oncō ñænæncō yabæcōnē māo pō guidinque Pabodo ingante bæi ongonte æninque oncodo wēā mantao godinque odemō do tee mōnedānitapa. ³¹ Ayæ godōmenque, Wængongæimpa, ante tæcæ cæyōnāni adocanque mæi odōmāno tontadoidi awēnē cōmantante ingante apænecantapa. Eedotadēē tōmāo Yæ yæ āninque pogodo pönānipa cæbii. ³² Ante mæi angā ēñente wædinque awēnē cōmantante iñōmō tontado capitāoidi tontadoidi inānite, Pōedāni, āninque nē Yæ ānāni weca pogodo wææ do pönānitapa. Īninque awēnē cōmantante tōnō tontadoidi do wæænte pönānipa, ante adinque wadāni wæætē Pabodo ingante nē tæi tæi pānināni inte ñōwo ñimpo cædinque ee adānitapa. ³³ Pabodo weca pōninque awēnē cōmantante angā ēñēninque tontadoidi wæætē Pabodo ingante bæi ongōninque yaēmengō mēmēña goti winānitapa.

Awēnē cōmantante iñōmō, Æcānō ingāi, ante ayæ, Quinō wēnæ wēnæ cæcāi. ³⁴ Añongante pancadāniya, Īmaī cæcantapa, añōnāni wadāni wæætē, Wīi Īmaī wadō cæcantapa, āninque wææ wææ añōnānite tontadoidi awēnē cōmantante iñōmō, Nōingā ante æbānō cæte ēñenguimoo, ante wædinque tontadoidi inānite angā ēñēninque Pabodo ingante tōmēnāni wææ cæte iñōmō ænte mæicæte ante cædānitapa. ³⁵ Ænte godinque

tēwaimpa ganca tæcæ pōñongante godongāmæ ongönāni godömenque ænguï badinque wiwa cæcæ cædāni wædinque tontadoidi wæætē Pabodo ingante wææ cædinque önōnancapæ ængö cædinque adimongä næænte mæidāni tēwaimpaa æicantapa. ³⁶ Ayæ tömänāni edæ tee empote pönāni iñömö Yæ yæ äninque, “Cöwë wido cæcæimpa,” ante ancaa änänitapa.

Pabodo nāmā wææ apæneampa

³⁷ Wææ cætiñömö tæcæ mangui guicæte ante cæyönāni Pabodo iñömö tontadoidi awënë cömantante ingante apænedinque,

—Bitö Ao ämi eñente ate botö adodeque bitö ïmite apæneæboimpa.

Äñongante,

—Iñæmpa bitö guidiego tededö tedebe ïmitawo. ³⁸ Bitö iñæmpa equitobi inömi inte edæ doyedë, Wido cæcæimpa, ante cædinque nē, Wænongæimpa, ante nāni änincabo iñönänite coatodo müido ganca ināni inänite önömæca ænte mäobi godänitapa. Botö ayömo bitö adobi ïmitapa töö.

³⁹ Äñongante Pabodo wæætē,

—Iñæmpa botö waobo eñagaïmo inte oodeobo inömo ïmopa. Botö wïi önöñömonque eñagaïmo ïmopa. Tiditiabæ Tadoto nāni nangui quëwëñömö eñagaïmo ïmopa cæbii. Ao ämi ate botö iināni inänite apænebo eñëmainänipa.

⁴⁰ Äñongante Ao angä ate tēwaimpaa adiyæ gongæninque godongāmæ ongönāni inänite Pabodo, Apocænë iedāni, ante bai cædinque compo compo cæcä. Adinque tededämaï ongönāni ate

tömengä ebedeoidi näni tededö tededinque iimaï ante apæ necä eñenänitapa.

22

¹ “Botö tönĩnamĩni imĩni eñeedäni. Botö wæmpomĩni imĩni botö nämä wææ apænebo eñeedäni.”

² Ante Pabodo ebedeo tededö apæ necä eñeninque tömənäni, Æ mönö tededö apæ necampa, ante wædinque godömenque eamonca nõwæ ongõñönäni tömengä iimaï ante apæ necantapa.

³ “Botö iñömö oodeobo ingaïmo imopa. Tiditiabæ Tadoto iñömö eñagaïmö inte botö Eedotadëe ponte pægaboï aedäni. Iñömö pædinque Gämadedo nē odömongä weca adimo inte botö mönö mæmæidi näni wææ angaïnö ante ædæmö eñeninque adodö ante eñente cæte pægaboïmpa. Minitö, Wængonguï beyæ ante mönö cöwë cæcæïmpa, ante ñwoönæ cæminipa. Minitö cæminipa bai botö adobai Wængonguï beyæ ante cæcæte ante cöwë nanguï cædinque quëwengaboïmpa. ⁴ İninque, Itota öönädë godö Taadö bai ingampa, ante nē pönənäni inänite botö, Pämö wæncædänimipa, ante togænte pangaboïmpa. Onguïñænäni incæ onquiyænäni incæ tömänäni inänite bæi ongöninque botö wadäni nempo pædæ godömo æninque tömənäni wæætë nē pönənäni inänite mao tee mönedäni wægadänimipa.”

⁵ “Mänömaï cædinque botö, Godömenque Daãmaco iñömö godinque botö, Taadö, ante nē pönənäni inänite bæi ongonte goti winte adodö Eedotadëe iñömö ænte mämö pædæ godömo æninque awënëidi wæætë tömənäni inänite

pānāni wæcædānimpa, ante cætabopa. Mānōmaī cæcæte ante cæbo adinque, Wængonguī quī, ante nē godongā ñænængā pōni inongā tōnō nē aadāni nāni Picæncabo tōnō Ao āninqe, Mōnitō tōniñadāni Daāmāco iñōmō quēwēnāni acædānimpa, ante cadota ante yewæmōnāni ænte gotabopa. Īninqe, Botō æbānō cæboo, ante nē agāināni inte awēnēidi incæ edæ, Pabodo nāwangā angampa, ante ñōwo nē apænequēnēnāni inānipa,” ante Pabodo angantapa.

Botō wēēnē pōnēwengainō ante ñimpo cædinque wadō ante pōnēmopa, ante Pabodo apænecampa (Nāni Cægainō 9.1-19, 26.12-18)

⁶ Āninqe Pabodo, Īmaī cægaboimpa, ante godōmenque apænecantapa, “Botō taadō godinque tæcæbæcā iñonte Daāmāco obo ponte ayōmote oōnædē iñontobæ ñāō botō weca pō godongāmæ guinæ gongæ ate wædinque, ⁷ botō guidōmēmæ tæ go wææntabopa. Ayæ ēñēñōmote, ‘Taodo, Taodo. Botō imote quīnante togænte pāmii.’ ⁸ Āñongante, ‘Awēnē, æbidō inōmi imii.’ Ante wæyōmote tōmengā, ‘Itota Nāatadeta quēwēnimo inte mānimodō bitō nē togænte pānōmo imopa,’ ante apænecantapa. ⁹ Mānōmaī apæneyongā botō tōnō godongāmæ godāni guiquēnē ñāō gongænque adinque botō imote nē apænecā nānō tededō ante ēñēnāmaī inānitapa. ¹⁰ Botō iñōmō, ‘Awēnē, quīnō cæquēnēmo imoo, ante āmi ēñēmoe.’ Āñōmote mōnitō Awēnē wæætē, ‘Bitō ængæ gantidinque Daāmāco iñōmō goe. Botō, Taodo Īmaī cæcæcāimpa, ante wacā ingante Daāmāco iñōmō nē quēwengā ingante do apænebo ēñengampa

cæbii. Bitö Daämaco iñömö gote ongöñömi tömengä wæætë bitö imite apæ necä eñente cæcæbiimpa, angantapa. ¹¹ Ayæ ñäö gongæ adinque botö bee wodömonte bai bayö mote botö tönö godongämæ godinäni wæætë töö æmænte Daämaco iñömö mäodäni gotabopa,” ante Pabodo apæ necantapa.

¹² Mänömainö ante apænedinque Pabodo godömenque apæ necantapa. “Mäniñömö gote ongöñömo wacä tömengä emöwo Änäniya botö weca pongantapa. Tömengä iñömö Wængongui ingante guiñente wædongä inte dodäni näni wææ angainö ante cöwë eñente cæcä inongäimpa. Ininque oodeoidi mäniñömö quëwënäni tömänäni tömengä ingante waa adönänimpa. ¹³ Tömengä iñömö botö weca pö næ gongæninque, ‘Taodo, bitö botö biwi imi, ñöwo waa bamonte ae.’ Tæcæ äñongante botö æmö adinque tömengä ingante waa atabopa. ¹⁴ Tömengä ayæ apænedinque, ‘Mönö mæmæidi Wængongui incæ, Botö æbänö cæquimo imoo, ante botö pönente angainö ante bitö eñencæbiimpa, ante cædinque bitö imite apænte ængampa. Ayæ, Mönö nö cædongä ingante tömëmi acæbiimpa. Adocä apæ necä eñencæbiimpa, ante cædinque Wængongui bitö imite do apænte ængampa. ¹⁵ Ininque në adimi inte në eñëmi inte bitö iñömö edæ bitö adinö ante bitö eñëninö ante, Näwangä impa, ante tömämæ quëwënäni inänite mäo apænebi eñencædänimpa. ¹⁶ Nöwo iñömö quinante a ongömii. Ængæ gantidinque Itota emöwo apænedinque, Wënæ wënæ botö cædö pönö ñä mënongabi quëwëmoe, äninque æpænë guie.’ Ante Änäniya angä eñëninque botö æpænë guitabopa,” ante

Pabodo apænecantapa.

Oodeoidi weca gotabopa, ante Pabodo apænecampa

¹⁷ “Ayæ ate adodö Eedotadëe pontabopa. Ayæ Wængongui oncö ñænæncö yabæcönë go guidinque Wængongui ingante apænedinque botö ate bai cæwënente ayömö, ¹⁸ mönö Awënë botö imote iimaï ante apænecantapa. ‘Bitö botö imote ante nö apænebi incæte iinäni ëñënamaï inäni inte Baa anguinäni inänipa cæbii. Ñowo Eedotadëe quingæ wodii tao gobæwe.’ ¹⁹ Äñongante botö, ‘Awënë ëñëmi, antabopa. Oodeoidi odömöincönë wacönë wacönë go guidinque botö bitö imite në pönënäni inänite mäo tee mönedinque tæi tæi pänimo imopa. Mänömaï impa, ante iinäni do ëñënäni. ²⁰ Ayæ, Itota incæ näwä Awënë inongä ingampa, ante në apænecä iñongante Etebä wodi ingante wænönäni wæñongä botö edæ Ao äninque në wænönäni weocoo aate a ongontabopa, ante tömënäni do againäni inte botö imote waa aquinäni inänipa.’ ²¹ Ante wææ apænebo incæte Wængongui Awënë wæætë, ‘Ñowo goe, ämopa, angantapa. Gobæ oodeoidi inämaï inäni weca bitö imite da godömo gocæbiimpa,’ ante da godongä gotabopa,” ante Pabodo apænecantapa.

Pabodo tontadoidi awënë cömantante weca ongongampa

²² Pabodo, Oodeoidi inämaï inäni weca angä gotabopa, ante nänö apænedi ganca godongämæ ongönäni ëñëe gönänitapa. Wæætë mänine apænecä ëñente wædinque tömänäni yedæ äninque, “Oodeoidi inämaï inäni weca godingä iñömö edæ

quëwënamäi inguënegä awædö. Tömengä ingante mönö wo ëwengæimpa.” ²³ Äninqe tömënäni godömenque ænguï badinque Yæ yæ äninque nämä weocoo yabæcooque gäni tadongadinque wancæ wancæ cædinque onguipo guidimö ö æninque wo ææntodö wo ææntodö ancaa cædänitapa. ²⁴ Mänömaï ænguï bate wënæ wënæ cædäni adinque tontadoidi awënë cömantante angä ëñëninque Pabodo ingante wææ cæte iñömö manguidäni guicantapa. Ayæ, Quinö wënæ wënæ cæcäi ante piinte änänii, ante ëñencæte ante tontadoidi inänite apænedinque, Minitö cöwë cædinö bai cædinque tæi tæi pämini caate wædinque Pabodo tömää tömengä cædinö edonque pöni apænecä ëñencæboimpa, angantapa. ²⁵ Ëñëninque tömengä ingante pancæte ante æmontaimenca tæcæ goti wïninque ñö cæyönäni Pabodo iñömö tontado awënë capitäö mäniñömö ongongä ingante apænedinque,

—Iñæmpa apænte änämaï iñönäni botö odömäno onguïñæmo iñömote quimæ päwëminii. Mänömainö cædinque minitö awënëidi näni wææ angainö ante dicæ ëñente cæminiyaa.

²⁶ Äñongä capitäö wæætë awënë cömantante weca godinque,

—Iingä iñömö odömäno onguïñængä inongä ingä ataque. Ñöwo æbänö cæquimii. ²⁷ Angä ëñente wædinque cömantante iñömö Pabodo weca pöninque tömengä ingante,

—Bitö näwangä odömäno onguïñæmi imitawo.

Äñongante Pabodo,

—Ao, bitō ä bai botō mänimodō imopa, angantapa.

²⁸ Pabodo apæncä eñëninque cömantante wæætē,

—Botō guiquënë odömāno ināmaï eñagaïmo inte mäninō bacæte ante cædinque nanguï godōmo æninque odömānoidi wæætē botō imote, Odömānobi imipa, ante yewæmönāni bagaboïmpa.

Apæncä eñëninque Pabodo wæætē,

—Botō guiquënë odömānobo eñagaïmo inte edæ odömānobo inōmo imopa, ante apæncantapa.

²⁹ Mänōmaï apæneyongä nē pancæ cædināni guiquënë do tōmengä ingante emō cæte wadæ godānitapa. Ayæ cömantante iñömō, Pabodo odömāno onguïñængä iñongante botō āmo yaëmengonca goti winānipa tōō, ante guïñente wædinque, Botō awënëidi pīnāni wæcæ wæ, ante wægacäïmpa.

Oodeoidi nāni Apænte Äincabo weca Pabodo ongongä

³⁰ Iimō ate cömantante iñömō, Quinō Pabodo wænæ wænæ cæcäi ante oodeoidi pīinte änāni, ante eñencæte ante Pabodo ingante añecä ta pongantapa. Ayæ, Wængonguï qui, ante nē godönāni ñænænāni tönō oodeoidi tōmēnāni nāni nē Apænte Äincabo inānite añete godongämæ ponte ongōñönāni Pabodo ingante ænte mæwæ tōmēnāni weca gö cæcä gongængantapa.

23

¹ Pabodo iñömō oodeoidi nāni nē Apænte Äincabo inānite gomō adinque,

—Botö mēmōidi ēñēedāni. Botö mīmō entawente nāmā apænte cædinque Wængonguī beyæ botö cæquēnēnō ante wēēnēñedē iinque cædinque cōwē ñōwo ganca adobaī cædinque quēwēmopa.

² Ante mǎnōmaī apænecā ēñente wædinque, Wængonguī quī, ante nē godongā ñænængā pōnī iinongā Änāniya guiquēnē Pabodo gǎänē ongōnāni inānite apænedinque, Önōneca tæi tæi tadeedāni, angantapa. ³ Äñongā Pabodo wæætē,

—Bitö iñæmpa botö imote apænte ancæte ante Möitee wodi nānō wææ angainō ante cæbitawo. Incæte adode nānō wææ angainō ante ēñēnāmāi inte bitö edæ, Tæi tadeedāni, ante pōnō ämi awædō. Bitö weocoo waëmoncoo ēñabi incæte mīmō wentamō entawēninque cæyōmite Wængonguī bitö imite näēmæ tæi tadeccæcäimpa tōö.

⁴ Ante apænecā ēñēninque Pabodo gǎänē ongōnāni wæætē,

—Bitö iñæmpa, Wængonguī quī, ante nē godongā ñænængā pōnī iñongante quīmæ tedewēmii.

⁵ Äñönānite Pabodo wæætē,

—Botö tōniñadāni ēñēedāni. Botö, “Waodāni awēnē iñongante tōmengā ingante wēnæ wēnæ tededāmāi incæbiimpa,” ante do wææ yewæmongatimpa, ante do ēñēmopa. Iinque botö, Iñömō ongongā, Wængonguī quī, ante nē godongā ñænængā pōnī iinongā ingampa, ante ēñēnāmāi inte botö mǎnōmainō ante apænetabopa.

⁶ Ante apænedinque Pabodo, Iināni pancadāniya Tadoteoidi iñönānite pancadāniya Paditeoidi

inānīpa, ante adīnque tōmēnāni nāni nē Apænte
 Äincabo inānite aa pedīnque,

—Botō mēmōidi ēñēedāni. Botō Paditeo wēmo
 nē ēñagaimo inte botō mæmpo Paditeo nānō ingāi
 bai botō adobai Paditeobo inōmo imopa. Mānimodō
 inōmo inte botō, Mōnō ñāni ōmæmonte watapæ
 quēwengæimpa, ante pōnēmopa. Inīnque māñine
 botō pōnēnō beyænque botō imote apænte ānīnque
 mīnitō pancæ cæmīni awædō, angantapa.

⁷ Pabodo mānōmainō ante apænecā ēñente
 wædinque Paditeoidi tōnō Tadoteoidi dodāni nāni
 pōnengainō ante wæætedō wæætē ānewēnīnque
 Paditeoidi nānēnē Tadoteoidi nānēnē nāni cabo
 nāni cabo badānitapa. ⁸ Iīmai impa. Tadoteoidi
 guiquēnē, Mēwoga waomō ēwocamō inte mōnō ñāni
 ōmæmongæimpa, ante, Babæ ancædō, ante Baa
 ānīnque, Ōnōwocaidi tōnō anquedoidi Wængonguī
 weca owodānīpa, ante adobai edæ Baa ānāni
 inōnānīpa. Paditeoidi guiquēnē mēnea ante
 pōnēnīnque Ao ānāni inōnānīpa. ⁹ Inīnque wadō
 wadō tedete ogæ tedeyōnānite Paditeoidi tōmēnāni
 nē odōmōnāni pancadāniya ængæ gantīdīnque,

—Iīngā iñōmō mōnitō ayōmōni wēnæ wēnæ
 cædāmai ingampa tōō. Wæætē edæ anquedo
 incæ wacā ōnōwoca incæ Wængonguī weca owocā
 inongā inte tōmēngā ingante apænecā īmaingampa
 ānewēmīni.

¹⁰ Ante nanguī ogæ tedeyōnāni tōmānāni
 godōmenque Yæ yæ ānāni ate wædinque tontadoidi
 awēnē cōmantante iñōmō, Pabodo ingante
 æmæmæ inō tōō godō æmæmæ inō tōō godō
 cædinque æi guīñæñāni wæmaingampa. Ante

pönente guñente wædinque tontadoidi inänite angä wæænäni ate, Pabodo ingante bæi ongonte ö æninque wææ cæte iñömö ænte mæi tee möneedäni, angä eñente tee mönedänitapa.

11 Iimö ate woyowotæ mönö Awënë iñömö Pabodo weca ponte apænecantapa. “Pabodo, Guñente wædämaï incæbiimpa. Bitö doyedë Eedotadëe iñömö botö imotedö ante apænedinque, Nāwä Awënë inongä ingampa, ante apænebitawo. Ñowo iñömö do bitö apænedö bai Odömä iñömö godinque adobai apænecæbiimpa,” angantapa.

Pabodo ingante wængongæimpa, ante cædänipa

12 Ñäo bayonte Oodeoidi pancadäniya guiquënë godongämæ pönëninque iimainö ante Ao änänitapa. Cænämaï bedämaï inimo inte mönö Pabodo ingante wængongæimpa, ante cædinque, Pabodo müi quëwëñongante mönö cabo incæ æcänö cæna æcänö beda mäningä nänö wænguinque cæcampa.

13 Onguiñænäni nē änäni iñömö coadenta ganca inäni ayæ godömenque nanguï inäni godongämæ pönëninque mänömaï anewëninque cædäni inänitapa.

14 Iinäni iñömö, Wængongui qui, ante nē godönäni ñænænäni tönö nē aadäni nāni Picæncabo weca godinque iimaï ante apænedänitapa.

—Mönitö godongämæ Ao äninque, Pabodo ingante wængongæimpa. Edæ müi quëwëñongante æcänö cæna æcänö beda nänö wænguinque, ante ämönipa cæminii. 15 Minitö tönö wadäni

mini Apænte Äincabo inömini inte minitö iñömö, Pabodo æbänö cæcäi, ante ædæmö eñencæte ante wæte bai apænedinque tontado awënë cömantante ingante babæ ante ämini eñëninque

tōmengā wæætē Pabodo ingante mīnitō weca ænte poncæ cæcæcāimpa, ämōnipa. Mänōmaī babæ ämini ēñente cædinque cōmantante wæætē Pabodo ingante māwængā tæcæ wææñongante mōnitō guiquēnē taadō wææ wänōninque bæi ongonte edæ wænōmōni wæncæcāimpa ämōnipa.

16 Äñönāni Pabodo nänōwāa iñōmō edæ do ēñengantapa. Eñēninque tōmengā tontadoidi nāni wææ cæte iñōmō do go guidinque Pabodo ingante apæncä. 17 Eñēninque Pabodo wæætē tontadoidi awēnē capitāō ingante apænedinque,

—İngā edēningā ingante mīnitō awēnē cōmantante weca ænte manguibi guicæ. Tōmengā cōmantante ingante adodeque apæncæcāimpa.

18 Angā Ao äninque capitāō wæætē mäningā edēningā ingante ænte guidinque cōmantante ingante apæncantapa.

—Pabodo mōnō nē tee mōnedongā iñōmō botō ïmote aa pedinque iīmaī angantapa. İngā edēningā ingante awēnē cōmantante weca ænte mäobi guidinque tōmengā awēnē ingante adodeque apæncæcāimpa, angantapa.

19 Ante apæncä eñēninque cōmantante iñōmō edēningā ingante tōō æmænte nänēnē mäocā goyongante,

—Botō ïmote æbänō apæncæte ante pōmii.

20 Äñongante,

—Awēnē eñēmi. Oodeoidi godongāmæ pönēninque iīmaī babæ cæcæte ante cædānipa. Tōmēnāni, Pabodo æbänō cæcäi, ante ædæmō eñencæte ante bai apænedinque bitō ïmite babæ ante apæncæ cædānipa. Bitō iīmō ate Pabodo

ingante tömënäni näni në Apænte Äincabo weca ænte poncæbiimpa, ante cædinque babæ cæcæte ante cædänipa. ²¹ Tömënäni iñömö, Pabodo miingä quëwëñongante æcänö cæna æcänö beda nänö wænguinque, ante në änönäni inte edæ, Wængongæimpa, äninque cædänipa. Adodäni näni cabo incæ coadenta ganca onguïñænäni wænoncæte ante taadö do wææ wänöninge edæ, Wænömö wæncæcäimpa, ante edæ a ongönänipa cæbii. Tömënäni, Bitö æbänö Ao anguimi, ante ëñencæte ante ponte änewëñönäni bitö iñömö wæætë tömënäni näni änö bai cædämaï incæbiimpa ämopa.

²² Ante edëningä apænecä ëñëninge cömantante iñömö, Bitö, Awënë ingante ante mänömaï apænetabopa, ante wacä ingante apænedämaï pæ wëenecæbiimpa. Nöwo edæ goe, angantapa.

Pedique weca Pabodo ingante ænte mäodäni go-campa

²³ Edëningä ingante mänömaï angä gocä ate cömantante wæætë awënëna capitäöna mënaa inate aa pecä pöñönote tömëna inate iïmaï angantapa. Minatö ñöwo tontadoidi önöwa në godäni dotiento ganca inäni tönö cabayo mongænte në godäni tetenta ganca inäni ayæ tapa në næænäni dotiento ganca inäni tönö mänimpodäni inänite iïmaï ancæminaimpa. Minitö ñöwoönæ eyepæ cædinque wantæ wantæ guiñongä wadæ godinque Tetadea ganca goedäni, ante da godömina tao gocædänimpa. ²⁴ Ayæ Pabodo beyæ cabayoidi ämi ænte gocædänimpa. Tömengä ingante wææ aadinque pancabaa awënë gobedönadodo Pedique weca

ämīna ænte mädāni cabayo mongænte adīmongā gocæcāimpa. ²⁵ Äninqe awēnē cōmantante iñōmō cadota ante iīmaī ante yewæmongantapa.

²⁶ Pedique eñēmi.

Bitō acæbiimpa, ante botō Codaodio Ditia inōmo inte ñōwo yewæmōmopa. Bitō nē gobedōnadodo awēnē inōmi inte waēmō pōnī imipa, ämopa. Waa quēwencæbiimpa, ämopa.

²⁷ Īngā ingante oodeoidi bæi ongonte wænoncæ cæyōnānite botō wæætē, Īñæmpa ĩngā iñōmō odōmāno onguĩñægā ingampa, ante do eñente wædīmo inte tontadoidi tōnō godinqe tōmengā ingante gā pe æmpote ō ænte wææ aatabopa. ²⁸ Ayæ oodeoidi, Pabodo wēnæ wēnæ cæcāī, ante quīnante piinte änānii. Ante eñencæte ante cædinque botō tōmengā ingante tōmēnāni nāni nē Apænte Äincabo weca ænte gotabopa. ²⁹ Ænte gote eñēñōmo tōmēnāni dodānique nāni angainonque ante, Pabodo eñēnāmaī cæcampa, ante piinte änāni wætabopa. Īninqe botō ayōmote tōmēnāni, Pabodo nānō wænguinque nānō tee mōnequinque wēnæ wēnæ cæcampa, ante piīninqe ōnonquedō ante cædānipa, ante awædō. ³⁰ Ñōwo iñōmō, Īngā onguĩñægā ingante wænoncæte ante oodeoidi awēmō cædānipa, ante tededāni eñēnīmo inte botō tōmengā ingante bitō weca do da godōmo gocampa. Tōmengā ingante nē piinte änīnāni inānite bitō weca adobaī da godōmo godānipa. Māninqe ante yewæmōmopa.

Ante cadota ante yewæmōninqe, Awēnē gobedōnadodo Pedique acæcāimpa, ante tontado

awënë cömantante da godongä ænte godänitapa.

³¹ İninque cömantante nänö äninö eñente cædinque tontadoidi woyowotæ tao godinque Pabodo ingante Antipati ganca adimongä mäodäni gocantapa. ³² İimö ate, Cabayo mongænte nē godäni tönö Pabodo adimongä gocæcäimpa, äninque tömēnāni nempo emö cæte godinque önöwa nē godänique tömēnāni näni cæte quēwencönē ocæ emænte godänitapa. ³³ Cabayo mongænte nē godäni wæætē Pabodo ingante godömenque ænte godinque Tetadea iñömö pöninque awënë gobedönadodo ingante cadota pædæ godöninque Pabodo ingante awënë nempo pædæ godönāni ængantapa. ³⁴ Awënë gobedönadodo iñömö cadota ænte adinque, Bitö æbædö eñagabiimpa. Äñongä Pabodo, Tiditiabæ eñagaboimpa. ³⁵ Ante apæ necä eñēninque gobedönadodo wæætē,

—Bitö imite nē piinte änināni pönāni ate mäniñedē ate botö, Bitö æbänö apænequimi, ante eñencæboimpa.

Äninque wææ wänönāni inänite apænedinque, Minitö Awënë Edode wodi nänö apænte angaincönē Pabodo ingante ænte gote wææ wänöedäni, ante gobedönadodo angä ænte godänitapa.

24

Pedique weca ongöninque Pabodo nämä wææ apæ necä

¹ Önompo æmæmpoque iionæ go ate, Wængongui qui, ante nē godongä ñænængä pönī inongä Änäniya iñömö Eedotadēē quēwēninque wææ

Tetadea gocantapa. Ayæ wacä tömengä emöwo Tedetodo tömönäni näni wææ angäinö ante ædæmö adingä inte wadäni beyæ ante nē wææ apæ necä inongä inte nē abogado näni änongä inongäimpa. Tömengä tönö oodeoidi nē aadäni näni Picæncabo pancadäniya adobaï Änäniya tönö godongämæ godänitapa. Godinque pancabaa awënē gobedönadodo weca ponte apænedinque, Pabodo nē wënæ wënæ cædongä ingampa töö, änänitapa. ² Pabodo ingante äñete mämönäni pongä ate nē abogado Tedetodo iñömö gobedönadodo Pedique weca ongöninque apæ necantapa.

—Awënē gobedönadodo eñëmi. Bitö nempo quëwëninque mönitö wantæpiyæ wæætedö wææte cædämaï inte godongämæ piyænē cæte waa quëwëmönipa. Ayæ bitö nē aabi inömi inte, Æbänö cæcæimpa, ante do eñëninque mönitö ömæ iñömö waa cæbi ate mönitö godömenque waa pönï quëwëmönipa. ³ Awënē Pedique, bitö waëmö pönï inömi inte imæca tömäo waa cæbi æninque mönitö bitö imite cöwë waa ate pönëninque waa apænemönipa. ⁴ Incæte, Botö wantæpiyæ apænebo bai bitö wæcædömiimpa, ante pönente wædinque botö, Ao ämi ate wantæ iñö apænebo pönö eñëe, ante abogado Tedetodo angantapa.

⁵ Ayæ, “Mönitö ayömöni iñömö ongongä iñömö nē wënæ wënæ cædongä inte tömäo godinque wapiticæ apæ necä eñëninque oodeoidi ænguï badinque Yæ yæ änäni wæmönipa. Edæ Näatadënöidi wapiticæ näni cæcabo iñönänite iingä iñömö adocä inongä inte nē angä ingampa töö.

⁶ Ayæ Wængonguï oncö ñænæncö incæ önonconque

baī baquinque tōmengā wēnæ wēnæ cæcā adinque mōnitō tōmengā ingante bæi ongontamōnipa. Ayæ mōnitō mæmæidi nāni wææ angainō ante Pabodo æbānō ēñente cæcāi, ante mōnitō apænte ancæte ante cætamōnipa. ⁷ Mānōmaī ante tæcæ cæyōmōni tōmengā mōnitō nempo ongōñongante cōmantante Ditia iñōmō māmō gā pe æmpote ō ængantapa. ⁸ Ayæ mōnitō adocā Pabodo ingantedō ante nē pīinte āmōni iñōmōnite adocā cōmantante Ditia angā ēñēninque bitō weca ponte ongōmōni ae. Bitō Pabodo ingante āmi ēñēninque tōmengā, Æbānō cæboī, ante nāmā wææ apænecæcāimpa. Tōmengā mānōmaī wææ apænecā ēñēninque bitō, Mōnitō æbānō nāwangā āmōnipa, ante do ēñencæbiimpa.”

⁹ Ante Tedetodo mānōmainō ante apæneyongante oodeoidi godongāmæ apænedinque, Tedetodo nāwangā angampa. Pabodo wēnæ wēnæ cæcā ingampa tōō, ante adoyōmō ante apænedānitapa. ¹⁰ Gobedōnadodo Pedique guiquēnē Pabodo gāmænō opo cæpoyongante Pabodo wæætē iīmaī apænecantapa.

—Awēnē Pedique ēñēmi. Tæiyæ wadepo iñonte bitō iīmæca nē apænte angāimi inte mōni oodeocabo æbānō cæmōni iīmōni, ante do ēñēmipa, ante adinque botō, Bitō weca ponte nāmā beyæ wææ apænecæboimpa, ante tobopa. ¹¹ Bitō iñōmō ēñencæte ante cæbi iinque iīmāinō ante do ēñenguīmi iīmāimipa. Botō ōnempo tipæmpoga go mēōnaa mānimpoōnæque iñonte Wængonguī weca ædæ wææninqe tōmengā ingante waa apænecæte ante Eedotadēē æitabopa. ¹² Māniñōmō æi pōninque botō tōmēnāni ayōnāni quīnō wēnæ wēnæ cæboī ae. Botō Wængonguī oncōnē ñænæncō

yabæcönë go guiibo incæ, oodeoidi odömöincönë go guiibo incæ taadö gobo incæ wadäni tönö guëadö guëa piinte ämo dicæ adäniyaa. Botö ædömë godinque Yæ yæ ämo dicæ ëñënäniyaa. ¹³ Ìninqe tømënäni näni, Pabodo wënæ wënæ cæcampa, ante näni piinte änewënö ante edæ, Näwangä impa, ante quïnö impa odömonguïnänii. Edæ dæ ampa, ante Pabodo nämä wææ apæncantapa.

¹⁴ “Incæte mönitö, Quëwenguïnö Taadö impa, ante möni pönönö ante oodeoidi wæætë, Wapiticæ goquïnö impa, ante piinänipa. Ìninqe, Pabodo mäninönö ante pönengampa, ante iinäni nö ante apænedänipa. Näwangä impa, ante bitö ìmite ämopa. Botö mäninönö ante pönëninque mönitö mæmæidi Wængonguï ingante waa ate cædinque quëwëmopa. Ayæ Möitee wodi nänö wææ angainö ante botö Ao äninque Wængonguï beyæ në apænedäni näni yewæmongainö ante adobaï Ao äninque quëwëmopa. ¹⁵ Wængonguï angä ate mönö waocabo edæ nö cæmö incæ wiwa cæmö incæ tømämö wænte ate ñäni ömæmöninque mönö quëwengæimpa, ante iinäni pönënanipa. Botö tømënäni näni pönönö bai adobaï ante pönente tobopa. ¹⁶ Mänömaï beyæ botö, Wængonguï ayongä incæ waodäni ayönäni incæ botö nämä apænte botö pönönö tæiyæ waëmö entawencæboimpa, ante cöwë nanguï cæbopa.”

¹⁷ Äninque Pabodo godömenque apæncantapa. “Botö wayömö gote tæiyæ wadepo quëwente ate tømëmo ömæ adodö pöninque, Ömæpodäni wæwënäni quï, ante ænte pöninque botö guidënäni oodeoidi inänite wæætë pædæ

godömo ænänitapa. Ayæ, Wængonguï qui, ante baö pædæ godontabopa. ¹⁸ Mänömaï cæyömo ayönäni botö iñömö tæiyæ waëmö bacæte ante Möitee wodi nänö angainö bai do eyepæ cæðimo inte Wængonguï oncö ñænæncö yabæcönë pö guiidinque, botö, Wængonguï qui, ante godömo adänitapa. Wïi nanguï inäni tönö cædinque botö Yæ yæ änämaï inte cæbo adänitapa. ¹⁹ Incæte botö imotedö ante näni pïinte äninö näwangä i bai wadäni guiquënë oodeoidi incæ Atiabæ quëwente pönäni iñömö, tömënäni wæætë bitö weca do ponte anguënänäni inänipa. ²⁰ Botö oodeoidi näni në Apænte Äincabo weca ongöñömote, Pabodo æbänö nö cæðämaï ingää, ante apænte äñönänite bitö weca ñowo ongönäni guiquënë mäninö ante në ëñänäni inänipa. Ìinque wadäni dæ änäni adinque iinäni wæætë edæ tömënäni näni ëñäninö ante në anguënänäni inänipa. ²¹ Botö awënëidi weca ongöninque yedæ äninque, ‘Mönö wænte ate ñäni ömæmongæimpa, ante botö apænedö beyænque mïnitö ñowoönæ botö imote apænte äninque pïimïnipa,’ ante apænetabopa. Ìinque iñömö ongönäni wabänö adobai adode botö äninö beyænque pïinte änänipa,” ante Pabodo nämä wææ ante iinque apænecantapa.

²² Pabodo mäninganca apænecä ëñëninque Pedique, Taadö ante në quëwänäni æbänö ante pönänäni, ante do ëñëningä inte, Idæwaa, äninque tömënäni inänite,

—Cömantante Ditia pongä ate wæætedö wæætë mïni äninö ante apænte ancæboimpa.

²³ Äninque tontadoidi capitäö ingante

apænedinque, Pabodo ingante tee mönedämaï inte wææ wänöedäni. Ayæ tömengä quiëmë ante ænguënengä ingä adinque tömengä æmigoidi ponte pædæ pönönäni ængä ïinque minitö ee amïni æncæcäimpa, angantapa.

²⁴ Tæönæ go ate Awënë Pedique tömengä nänöogængä Dodotida tönö nänä gæncaya pönatapa. Tömengä nänöogængä oodea onquiyængä ïinongäimpa. Pedique ïñömö Pabodo ingante añete mämönäni pöninque Pabodo wæætë, Codito Itota ingante mönö wede pönente quëwengæimpa, ante apænecä ëñëë cönatapa. ²⁵ Ayæ Pabodo godömenque apænedinque, Mönö nö cæte quëwengæimpa, äinque, Mönö nämä wææ aate waa cæte quëwengæimpa, angantapa. Ayæ, Wængonguï Awënë nänö apænte angüionæ oo baquinö angüënë, ante apænecä ëñëinque Pedique wæætë guïñente wædinque, Idæwaa, äinque,

—Ñöwo gobäwe, angantapa. Waönæ ate botö eyepæ ïmo inte ämo bitö ïmite añete mämönäni ponte apænebi ëñëmaïmopa, angantapa.

²⁶ Mänömaï äinque tömengä, Pabodo wabänö, Ñimpo cæbi gocæboimpa, ante cædinque godonte æinta pönömaingampa, ante pönengantapa. ïinque tömengä wantæ wantæ ïñö Pabodo ingante angä pöñongä guëa tededatapa. ²⁷ Mänömaï ancaa cæyongä wadepo mënepoga ba ate Pedique gobedönadodo awënë ïinque bayongante wacä Pontio Peto näni änongä pöninque wæætë awënë gobedönadodo bacantapa. ïinque Pedique ïinque awënë bayedë, Botö ïïmaï cæbo ate oodeoidi botö

imote waa acædänimpa, ante pönente cædinqe Pabodo ingante tee möneincönë oncodo tadönämaï ee adinqe wadæ gogacäimpa.

25

Gobedönadodo Peto weca Pabodo ongonte apænecampa

¹ Peto iñömö pancabaa awënë gobedönadodo tæcæ badingä inte mänimæ pöninqe Tetadea näni quëwëñömö meönaa go adoönæque quëwëninque Eedotadëë go æicantapa. ² Eedotadëë iñömö ponte ongöñongante, Wængongui qui, ante në godönäni ñænænäni tönö oodeoidi awënëidi tömengä weca pöninqe, Pabodo iïmaï wënæ wënæ cæcantapa töö, ante apænedäni ëñengantapa. ³ Tömënäni doyedë adoyömö pönëninque, Gobedönadodo Peto ingante ämö ate tömengä wæætë Pabodo ingante Eedotadëë iñömö da pönongä pöñongante mönö taadö wææ wänonte ö æente wænongæimpa. Ante në pönëwënäni inte tömënäni ñowo Peto weca pöninqe iïmaï änänitapa. Gobedönadodo Peto ëñëmi, Bitö Ao ante möni ämaï pönö cæquïmi. Bitö Pabodo ingante ämi Eedotadëë iñömö æente mämönäni pongäe, ante ancaa änäni. ⁴ Eñëninque Peto wæætë tömënäni inänite edæ, Pabodo iñæmpa Tetadea iñömö tee mönete ongongantawo. Botö tömëmo edæ oo adoyömö wæi gocæboimpa. ⁵ Äninqe,

—Mänömaï beyæ mïnitö mïni cabo iñömïnite në änäni pancadäniya inänite da godömiini botö

tönō godongāmæ Tetadea wæi gocædānimpa. Pabodo wënæ wënæ cæcä ingä ïninqe tömënāni mänñömō pōninqe ancædānimpa.

⁶ Äninqe tömënāni tönō wodo önompo tipæmpoga ïionæ godömenque quëwëninque Peto wadæ godinque Tetadea wæi gocantapa. Pōninqe tömengä ïimō ate awënëidi apæncæte ante nāni contaimpaa tæ contadinque angä ate Pabodo ingante ænte mämönāni pongä. ⁷ Ate oodeoidi Eedotadëë quëwente ñöwo wææ pōnināni inte pō godongāmæ gongæninque, Pabodo mänömainō wiwa cæcampa, wadö wiwa cæcampa, ïimainō wiwa cæcampa, ante ancaa änewënānitapa. Incæte Petoidi ïänite, Nāwangä ante apænemönipa, ante odömoncæte ante tömënāni quïnō impa ante odömönāni aquināni. ⁸ Pabodo ïñömō nāmā wææ apænedinque,

—Oodeoidi nāni wææ angainō ante Baa änāmaï ïnomo inte botö ëñente cæte quëwënimo ïmopa. Wængonguï oncö ñænæncö waa adinque botö mänincönë yabæcönë guiite wënæ wënæ cædāmaï intabopa. Odömänoidi tæiyæ awënë Tetædo nänö änö ante ëñente cædinque wadö ante cöwë cædāmaï intabopa.

⁹ Äñongante Peto, Oodeoidi tömënāni nāni äninö bai cæbo ate botö ïmote waa acædānimpa, ante babæ cædinque Pabodo ingante,

—Botö Eedotadëë go æibo ate adinque bitö botö weca pōñömi ïināni pïinte nāni äninö ante apænte ancæboimpa. Bitö Ao ante, Gocæboimpa, ämitawo.

¹⁰ Äñongante Pabodo wæætë,

—Botö iñempa odömäno tæiyæ awënë Tetædo nänö Apænte ante Contaimpaa gäänë ñöwo incæ ongömo ae. Minitö iñömö Tetædo beyæ ante nē apænte ämīni inōmīni inte edæ botö imote nē apænte anguënēmīni imīnitapa tōö. Bitö tōmēmi iñömö edæ, Pabodo oodeoidi inänite wënæ wënæ cädāmaī iningä ingampa, ante edæ do eñēmīpa. ¹¹ İnīnque wënæ wënæ cædinque botö tente wænguënēmo imo bai botö edæ Baa änāmaī inte edæ dobæ wæncædōmoimpa. Wæætē edæ, Wënæ wënæ cæbīpa, ante iñāni oodeoidi nāni änewënö guiquënë õnonquedö ante i inīnque waocä æcāmenque incæ ædö cæte tōmēnāni nempo pædæ godonguëngä ingää. İnīnque botö, Odömäno tæiyæ awënë Tetædo ingante ämo botö imote pönö apænte ancæcäimpa, angantapa.

¹² Pabodo mänōmaī angä eñente wædinque Peto tōmengä tönö godongämæ nē apænte änāni tönö, Æbänö cæquīmöö, ante adoyömö pönēnāni ate tōmengä Pabodo ingante,

—Ao ämönīpa. Tæiyæ awënë Tetædo incæ apænte ancæcäimpa, ante do änīmi inte bitö Tetædo weca edæ gocæbiimpa, angacäimpa.

Awënë odeye Agodīpa ingante Peto apænecampa

¹³ Tæönæ go ate wacä awënë odeye Agodīpa tönö onquiyängä Bedēnite iñömö gobedōnadodo awënë Peto ingante, Bitö iīmæca waa pōmi amönāpa, ante apænecæte ante Tetadea iñömö pōnīnque Peto weca eñacæ pōnatapa. ¹⁴ Pōnīnque tæönæ quëwēna ate awënë Peto guiquënë awënë

odeye Agodipa ingante, Pabodo ingante iīmaī cætamōnīpa, ante apænedīnque,

—Gobedōnadodo awēnē Pedique wodi nānō nē tee mōnete ēmō cæte godingā iñōmō onguīñængā adocanque ayæ a ongongampa. ¹⁵ Īnīnque botō Eedotadēē æite quēwēñōmote, Wængonguī quī, ante nē godōnāni ñænænāni tōnō oodeoidi inānite nē aadāni nāni Picæncabo guiquēnē botō ĩmote ānīnque, Māningā iñōmō wīwa cæcā ingā adīnque bitō tōmengā ingante apænte ānīnque āmi wænōnāni wæncæcāīmpa, ānānitapa. ¹⁶ Ēñēnīnque tōmēnāni inānite botō wæætē iīmaī antabopa. Waocā nāmā beyæ apænedāmaī iñongante mōnitō mōni odōmānocabo iñōmō nē pānāni inānite pædæ godōnāmaī ĩmōnīpa. Wæætē wadāni, Īngā iīmaī cæte wēnæ wēnæ cæcampa, ante pīinte ānāni ēñente wædīnque mōnitō māningā tōnō nē pīināni inānite āmōni godongāmæ pōnānīpa. Ponte awīncadō awīnca adīnque wæætedō wæætē āñōnānite mōnitō iñōmō, Tōmēnāni nāni pīinte ānīnō ante tōmengā æbānō nāmā wææ apænecāā, ante ædæmō ēñente ate nōingā ante apænte āmōnīpa. Mānōmaīnō ante botō tōmēnāni inānite apænetabopa, ante awēnē Peto apænecantapa.

¹⁷ Ayæ, “Mānōmaī ante apænebo ēñēnīnque nē pīinte ānāni botō tōnō wææ Tetadea iñōmō godongāmæ pōnānitapa. Īnīnque botō a ongōnāmaī do mōni apænte āīmpaa iīmō ate go tæ contadīnque, Māningā ingante ænte pōedāni, āmo ænte pōnānitapa. ¹⁸ Botō iñōmō, Pabodo wadāni inānite wīwa cæcampa, ante pīinguīnāni ĩmaīnānīpa, ante pōnentabopa. Incæte nē pīinte ānāni ængæ

gantite apænedinque edæ botö ante pönëninö bai wii pïinänitapa. ¹⁹ Wæætë edæ wadö ante pïinäni ëñente wætabopa. Wængongui ingante æbänö cæte waa aquii, ante tömënäni Pabodo tönö wæatedö wæætë pïinänitapa. Ayæ tömënäni mæmæidi näni wææ angainö ante tömënäni, Pabodo ëñënamai ingampa töö, ante pïinänitapa. Ayæ adocanque Itota wodi do wængaingä incæte Pabodo, Miingä quëwengampa, ante tedecampa töö, ante pïinänitapa. ²⁰ Ìinque botö, Quiëmë bai anewënäni, Æbänö cæte nö ëñente apænte anguimoo, ante wædinque botö Pabodo ingante iïmai antabopa. Tömënäni näni pïinte äninö ante bitö Ao äinique Eedotadëe gote ongöñömite botö apænte ancæboimpa, antabopa.”

²¹ “Äñömö tömengä wæætë, Botö imote ee wææ wänöñömini, Botö æbänö cætawoo, ante tæiyæ awënë Empedadodo mönö änongå apænte ancæcäimpa, ämopa. Angä ëñëninque botö, Æyedëmë eyepæ i ate Pabodo ingante tæiyæ awënë Tetædo weca da godömo gocæcäimpa, ante pönëninque, Tömengä ingante mäimpoga wææ wänödäni, antabopa,” ante Peto apænecantapa.

²² Mänömai apænecä ëñëninque awënë Agodipa wæætë,

—Ïingä onguiñængä æbänö apænecä, ante tömëmo ëñëinente wætabopa.

Äñongante Peto,

—Ïimö ate tömengä apænecä ëñencæbiimpa, angantapa.

²³ Ïimö ate awënë odeye Agodipa tönö Bedänite iñömö waëmö pöni weocoo wëñate mongæninque

tömēnāni nāni ēñēincōnē ñænāncōnē pōninque, Mōnatō awēnēmōna iñōmōnate waa aedāni, ante bai cædinque wæñee da da pō guiidatapa. Ayæ ton-tadoidi tæiyæ awēnēidi tōnō māniñōmō quēwēnāni awēnēidi ñænānāni tōnō tōmēna miñæ dao dao pōnānitapa. Ayæ Peto angā ēñēninque nē wææ wānōnāni wæætē Pabodo ingante ænte māmōnāni pō guiite ongōñongante, ²⁴ Peto iñōmō,

—Awēnē odeye Agodipa ēñēmi, angantapa. Iñōmō ongōmīni tōmāmīni edæ ēñēedāni. Īngā ingante amīni. Tōmengā ingante āninque Eedotadēē quēwēnāni incæ iñōmō quēwēnāni incæ oodeoidi tōmānāni botō imote yedæ āninque, Īngā nē wēnæ wēnæ cæcā inte godōmenque wīi quēwenguēngā ingampa cæbii, āninque, Bitō apænte ancæbiimpa, ante wædānipa. ²⁵ Īninque, Adocā Pabodo nānō wænguinque wēnæ wēnæ cæcantawoo, ante botō cōwā ayōmo edæ dæ antapa. Ante wæyōmo tōmengā guiquēnē, Tæiyæ awēnē empedadodo incæ botō imote apænte ancæcāimpa, angā ēñente pōnēninque botō, Ao, tæiyæ awēnē Tetædo weca da godōmo gocæbiimpa, antabopa. ²⁶ Incæte, Īngā nānō cædinō ante tæiyæ awēnē aquinō ante botō ædō cæte yewæmonguimoo, ante wæbopa. Mānōmaī beyæ botō, Mīnitō tōmāmīni apænte āmīni ēñencæboimpa, antabopa. Ayæ, odeye Agodipa bitō tōmēmi apænte āmi nō ēñente ate yewæmoncæboimpa, ante cædinque botō ñōwo Pabodo ingante ænte māmōmo ponte a ongongā aedāni. ²⁷ Īñæmpa botō, Mōnō nē tee mōnete ongongā wēnæ wēnæ nānō cædinō ante yewæmōnāmaī inte mōnō ædō cæte da godonguīi,

ante awædö, ante Peto apænegacäimpa.

26

Agodipa weca ongonte Pabodo nämä wææ apænegacampa

¹ Awënë odeye Agodipa wæætë Pabodo ingante, —Bitö ñöwo nämä beyænque wææ apænegacäimpa, ämopa.

Angä ëñëningue Pabodo compo compo cædinque nämä beyænque ante wææ apænegacæ cæcantapa.

² “Awënë odeye Agodipa, ëñëmi. Oodeoidi nāni pīinte änīnō tōmānō ante nämä beyænque wææ apænedinque botö bitö awënë ïmi weca ongonte apænebopa, ante adinque botö waa edæ tobopa.

³ Mōni oodeocabo dodāni nāni cægai bai mōni cæinō ante bitö iñōmō edæ do ëñëmipa, ante tobopa. Ayæ adobaï, Oodeoidi ñowodāni æbānō ante wæætedö wæætë ante tededānii, ante do ëñëmi inōmi inte bitö botö wææ apænedö ante edonque ëñenguïmi imipa, ante pönëningue botö godömenque tobopa. Ìninqe bitö Ao ante ee ongöningue ëñencäbiimpa, ämopa.”

Ïmai quëwengaboimpa, ante Pabodo apænegacampa

⁴ Ante apænedinque, “Botö ñöwo ganca æbānō quëwëmoï, ante oodeoidi tōmānāni do ëñënānipa. Edæ do wëñæmoyedë botö ëñagaimæ quëwente pædinque botö edënimoyedë ñöwo ganca æbānō Eedotadëe iñōmō quëwengaboï, ante do ëñënānipa.

⁵ Mōni oodeocabo incæ pancadāniya Wængonguï ingante wædænque ëñente quëwëñōnāni mōni Paditeocaboque wæætë, Dodāni nāni wææ angainō ante mönō ëñente cæcäimpa, ante ëñente

quëwëmönipa. Botö iñömö Paditeobo inömo inte mäninö ante cöwë Ao ante godömenque nanguï cæte quëwentabopa. Ìninqe oodeoidi do againäni inönäni inte Ao ante bai, Näwangä Pabodo ëñente quëwengampa, ante apæ necædönänimpa. ⁶ Mönitö mæmæidi inänite apænedinque Wængonguï, Minitö beyæ cöwë pönö waa cæcæboimpa, ante nänö angainö bai cæcä beyænque mönö watapæ bacæimpa, ante botö pönëmopa.”

“Ñöwo iñömö mänine botö pönënö beyænque iinäni, Pabodo ingante apænte ancæminimpa, ante ænte mämönäni pöninqe botö minitö weca a ongömo aedäni. ⁷ Wængonguï, Minitö beyæ pönö waa cæcæboimpa, ante nänö angainö ante ìninqe bacæimpa, ante möni pönënö beyænque möni oodeo pægaincabo ònompö tipæmpoga go mencaboga mänimpomöni imöni iñömö woyowotæ itædë, Wængonguï ingampa, ante tömengä beyæ cæte quëwëmönipa. Incæte awënë odeyebi, ëñëmi. Wængonguï, Cöwë cæcæboimpa, ante nänö angainö ante möni pönënö beyænque oodeoidi incæ botö imote, Wiwa cæbipa töö, ante pïinänipa. ⁸ Minitö iminite ämo apænemini ëñëmoedäni. Do wæninäni iñönänite Wængonguï, Botö pönö cæbo ate ñäni ömæmoncædänimpa, angacäimpa. Minitö iñæmpa, Wængonguï ædö cæte mänömai cæquingää, ante pönente wædinque quïnante Baa änewëminii,” ante Pabodo angacäimpa.

Pabodo, Coditoidi inänite togænte pantabopa, angampa

⁹ Äninqe Pabodo godömenque apæ necantapa. “Botö wëenëñedë edæ oodeoidi näni pönëwënö

baï pönengaboimpa. Mäniñedē botō Itota wodi Nāatadeta quēwengaingā ěmōwo ante näni pönēnō ante piinte cædinque nanguï wido cæquēnēmo ĩmopa, ante pönēwentabopa. ¹⁰ ĩninqe botō Eedotadēē ĩñōmō quēwēninqe mänĩnonque ante cægaboimpa. Mäniñedē edæ, Wængonguï qui, ante nē godönäni ñænænäni ĩnänite antabopa. Ämo Ao ante tōmēnāni nē änāni inte yewæmonte pædæ pönönāni æninqe botō Wængonguï Awēnē quĩnāni nanguï ĩnāni ĩnänite bæi ongonte æninqe nē tee mönebo ingaboimpa. Ayæ tōmēnāni ĩnänite wænoncæ cæyönāni botō cōwē godō Ao angaboimpa. ¹¹ Botō wayōmō wayōmō godinqe oodeoidi odōmōincōnē wantæ wantæ ĩñō go guĩdinque, Wængonguï Awēnē quĩnāni tōmengā ingante godō wēnæ wēnæ ante piincædānĩmpa, ante cædinque pædāni, ante nanguï ämo pangadānĩmpa. Ayæ tōmēnāni ĩnänite nanguï piĩninqe godōmenque ænguï badĩnque botō tōmēnāni ĩnänite pancæte ante wabæca näni quēwēñōmō wabæca näni quēwēñōmō incæ togænte gogaboimpa,” ante Pabodo wææ apænecantapa.

Wadō ante pönente babopa, ante Pabodo adodō angampa

(Näni Cægainö 9.1-19, 22.6-16)

¹² Ante apænedĩnque Pabodo godōmenque, “Mänōmaï wabæca go wabæca go cædōmo inte Daāmaco ĩñōmō gocæte ante cætabopa. Cæyōmō, Pabodo ĩmaï cæcæcäĩmpa, ante Ao ämönĩpa, ante, Wængonguï qui, ante nē godönäni ñænænäni nē änāni ĩnönāni inte botō beyæ cadota ante

yewæmōninqe pædæ pōnōnāni ænte gotabopa. ¹³ Awēnē odeyebi, ēñēmi. Mānōmaī gote idōmæ goyōmo tæcæ bæcā pōni bayonte nænque nānō nāwā baī godōmenque nāwā öönædē inō botonga mōni godongāmæ gocaboga pō tōmāo guinæ gongæ. ¹⁴ Ate wædinque tōmāmōni guidōmēmæ go go wææñmōni adocanque mōni ebedeo tededō tedete öönædē apæneccā botō adoboque ēñentabopa. ‘Taodo. Taodo āmo. Botō imote quīnante togænte pāmii. Īñæmpa wagada päintoca baī bitō nāmā ĩñæ æwate cowate baī bitō caate wæquinque cæbipa,’ angacāimpa.”

¹⁵ “Angā ēñente wædinque botō, ‘Awēnē, æbidō ĩnōmi ĩmii.’ Ante ēñente wæyōmote, ‘Botō Itota ĩnōmo ĩnte bitō nē togænte pānīmo mānīmodō ĩmopa cæbii. ¹⁶ Nōwo edæ ængæ gantidinqe adiyæ næ gongæmi āmopa. Botō beyæ nē pōnō cæbi āmo edæ bacæbiimpa. Ayæ, Botō imote æbānō abii, ante bitō adīnō ante nē apænebi āmo bayōmite botō ĩncayæ ate godōmenque odōmōmo ate bitō aquinō ante bitō nē apænebi āmo bacæbiimpa. Mānōmainō ante āmo bacæbiimpa, ante apæneccæte ante botō bitō weca ponte a ongōmopa. ¹⁷ Ayæ bitō guidēnāni oodeoidi incæ wadāni wabæca quēwēnāni incæ bitō imite wēnæ wēnæ cæcæ cæyōnāni ate botō bitō imite gā pe æmpote wææ gompobo beyænque bitō wæætē quēwencæbiimpa. Tōmēnāni weca botō bitō imite da godōmo gocæbiimpa. ¹⁸ Tōmēnāni botō imote wede pōnēnāni ate botō wēnæ wēnæ nāni cædīnō ante godō nīmpo cæbo ate tōmēnāni do botō tæiyæ waēmō badongaināni tōnō adocabodāni baī badōmo badinqe quēwencædānīmpa, ante cæbopa. Mānōmainō cæcæte ante botō, Bitō Taodobi

iñömö tömënäni awinca wi æmonte bai cædinque apænebi eñëninque tömënäni wæætë edonque adinque ñäö inö gämænö poncædänimpa, ante cæbopa. Tatäna nempo quëwëñönänite bitö wæætë gä pe æmpote bai cædinque odömonte apænebi eñëninque tömënäni wæætë edæ ocæ emænte pöninque Wængongui nempo quëwencædänimpa, ante bitö imite da godömo gocæbiimpa.’ Ante Awënë Itota botö imote angä eñente gotabopa,” ante Pabodo apænecantapa.

Pabodo, Öönædë apænecä eñente cætabopa, angampa

¹⁹ Mänömaï apænedinque Pabodo godömenque, “Awënë odayebi Agodipa, eñëmi. Botö wiimonte bai ayömo öönædë inö në angä nänö angainö ante botö ædö cæte eñënämaï cæquimoo. Edæ do cætabopa. ²⁰ Täno Daämaco iñömö quëwënäni inänite apænedinque botö ayæ Eedotadëe iñömö godinque mäniñömö quëwënäni inänite apænedinque Oodeabæ quëwënäni inänite go apæneboque go wayömö oodeo inämaï inäni inänite mäo apænedinque iimainö ante apænebo eñënänitapa. Minitö wënæ wënæ mini cædö ante, Ancaa wæwente awædö, ante ñimpo cædinque Wængongui gämænö edæ pöedäni. Ayæ pöninque minitö, Mäninö wënæ wënæ botö cædinö edæ æmäwo ñimpo cæbopa, ante edonque acæimpa, ante cædinque waa cæte quëwëedäni, ante ämo eñënänitapa.”

²¹ “Iñinque botö mänömaï cæbo beyænque Wængongui oncö ñænæncö boyæ ongöñömote oodeoidi botö imote bæi ongöninque edæ

wænoncæ cædänitapa. ²² Mänömaï wænæ wænæ cædäni incæte Wængongui ñowoönæ ganca botö tönö cöwë godongämæ cæcampa. Ìninqe botö, Wængongui Awënë æbänö cæcää, ante guïñenämaï inte næ gongæninque awënëidi inänite önönänique inänite apænedinque apæneboï aedäni. Möitee wodi tönö wadäni Wængongui beyæ nê apænegainäni tönö, Æbänö baquï, ante apænegadänimpa, ante apænebopa. Mänïne tömënëni näni apænegainequè adodö ante apænedinque botö godömenque apænedämaï imo inte edæ iïmainö ante apænebopa. ²³ Möiteeidi iïnomö, Mönö Codito cöwë caate wæquiringä ingampa, ante apænegadänimpa. Ayæ, Wænte ate tömengä tänocä nê ñäni ömæmöningä inongä inte, Acædänimpa, ante cædinque ñäö tica ënente bai tömengä guïdënëni inänite wadäni inänite edæ odömoncæcäimpa, ante yewæmongadänimpa. Botö iïnomö, Möiteeidi näni angainö do edæ iinque batimpa, ante apænedinque wadö ante apænedämaï imopa,” ante Pabodo apænegacäimpa.

Agodipa, bitö Codito ingante pönenguënëmi imipa, angä

²⁴ Pabodo mänömaï nämä beyænque tæcæ wææ apæneyongante awënë Peto do ogæ tededinque,

—Ïñæmpa Pabodo ocai ömæcabi inte tedebe awædö. Nanguï wantæpiyæ dibodo adimi inte idiquibæ pönente babiimpa töö.

²⁵ Ante wææ tedecä ëñëninque Pabodo,

—Awënë Peto bitö waa pönï awënë gobedönadodo imi incæte botö wïi bitö änö bai imopa. Botö wïi idiquibæ pönëmo inte töingä

pönëninge näwangä ante apænebopa. ²⁶ Awënë odeye Agodipa guiquënë tömengä mäninö botö apænedö ante tömää eñengä iñongante tömengä ingante edonque apænebo eñengampa. Edæ mäninö botö äninö wii awëmö cætimpa, ante pönëninge botö, Awënë odeye incæ do adingä inte ædö cæte eñenämaï inguingä, ante awädö. ²⁷ Awënë odeyebi Agodipa, nōwo bitö imite apænebo eñëe. Wængongui beyæ näni apænegainö ante bitö pönëmitawo. Do pönëmi imitapa, ante eñëmopa.

²⁸ Äñongante Agodipa wæætë,

—Iñæmpa bitö botö imote wantæ iñö tedinque, Agodipa bitö Codito ingante do pönencæbimpä, ante cæcæte ante cæbitawo.

²⁹ Äñongä Pabodo wæætë,

—Wantæ iñö apænebo incæ wantæpiyæ apænebo incæ bitö botö bai pönëmi waa tobaimopa. Edæ bitö tönö godongämæ eñëe cönäni tönö minitö tömämïni botö bai entawencæminimpa, ante botö Wængongui ingante apænebopa. Incæte, Botö bai baedäni, äninge botö, Yaëmengoncoo empocæminimpa, ante apænedämaï intabopa.

³⁰ Ante Pabodo mänömaï apænecä eñëninge awënë odeye Agodipa ængæ ganticantapa. Ayæ pancabaa awënë Peto, Bedänite, godongämæ ongönäni adobai tömengä tönö ængæ gantidique, ³¹ mänincönë tao godinque iïmaï ante tededänitapa.

—Iingä Pabodo wënæ wënæ cädämaï iñongante quïnante wææ wänonguii. Quïnante apænte wænonguii. Edæ wënæ wënæ nänö cædinö dæ ampa.

32 Ante tedeyönäni Peto ingante Agodipa apæ necantapa.

—Tetædo incæ botö ïmote apænte ancæcäimpa, ante Pabodo wïi angä bai botö edæ tömengä ingante do ñimpo cæcædömoimpa, angacäimpa.

27

Pabodo ingante Odömä iñömö da godönäni go-campa

¹ Mänömainö ante wædinqe mänimæ awënëidi, Pabodoidi inänite ñöwo Itadiabæ ämö wogaa gocædänimpa, ante godongämæ Ao änänitapa. Mäniñömö tontadoidi iñömö tæiyæ awënë empedadodo beyænque näni wææ wänoncabo inönäni inte Empedadodoidi näni änoncabo inönänimpa. Tömänäni capitäo Codio nempo Pabodo tönö wadäni në tee mönete ongöninäni inänite pædæ godönäni ö æninqe ænte gocantapa. Ayæ botö Odocabo në yewæmömo tönö wadäni adobaï Pabodo tönö godongämæ gotamönipa.

² Gäwapæntibæ wedeca gote ayömöni wipo ñænæmpo Adadämitio wäi wocænte näni ænte pönimpo inte ñöwo Atiabæ godinqe wayömö go ti wææ wayömö go ti wææ näni goquimpo adinqe mönitö mänimpodé go guiite gäwapæntibæ wogaa gotamönipa. Ayæ wacä Aditadoco Mäatedöniabæ Tetadönica iñömö quëwëningä inte mönitö tönö pö äampodenque gocantapa. ³ ïimö ate Tidöo näni quëwëñömö pö wäi wocæñömöni Pabodo ingante capitäo Codio waa cædinqe pönö apæ necantapa. Bitö æmigoidi weca quiëmë bitö ænguënönö ante gote ænte pöe, äninqe ee acä tömwæwæ gote ëñadinque ænte pongantapa. ⁴ Ayæ mänii

Tidöo iñömö eñate wogaa goyömönite möni nē gocæ cædö woboyæ betamonca pæmæ ate wædinque mönitö wää tēiwænē Tipidebæ nāni äniwænē wææ cæteinö wogaa gotamönipa. ⁵ Wää tēiwænē go wodo tebæ gomönique go tæcæpæ pöni wogaa godinque Tiditiabæ wodo tebæ pömönique go Pampidiabæ wodo tebæ pömönique go Ditiabæ godinque Miida nāni quēwēñömö pö wäi wocæntamönipa.

⁶ Mäniñömö wacä wipo ñænæmpo Adecantodia nāni ænte pönimpo adinque capitäo Codio, Itadiabæ goquimpo impa, äninque mönitö imönite angä godongämæ guite wogaa gotamönipa. ⁷ Tæönæ iñonte wæñee godinque mönitö, Æiquedö goquimönii, ante ancaa cæmönique go Gönido nāni quēwēñömö go wodo tebæ gotamönipa. Ayæ woboyæ cöwē mönitö gocæ cædö inö nangui pöni pö ate wæmönique go wää tēiwænē Tadamöne wodo tebæ godinque wawænē Cædeta nāni änöwænē yaatænque gotamönipa. ⁸ Mäniwænē wææ cæteinö yæwedecaque ancaa cædinque wæñee godinque mönitö Datea wëmonca wodöiñömö nāni Waa Wodöiñömö nāni äniñömö pontamönipa. Mäniñömö pömöni ate wipodē nē cædäni iñömö, Wipo ñænæmpo wäi wocæñompo nämä godämaï ingæimpa, ante cædinque teëmenca gæguincamē inte nāni ñä cæcadodinca guitodönāni nāñe ñongæ ate wipo godämaï wäi wocæntapa.

⁹ Mäniñömö wäi wocænte owodinque mönitö, Quingæ pongamö incæ wæñee pömompa, ante wædinque mönitö, Woboyæ nangui pæmæ tedæ baquinque mönitö Wængongui beyæ ante mönö cænämaï eönæ do iinque batimpa, ante

pōnentamōnipa. Īninqe mōnitō, Nōwo mōnō wænguinque wipodē godōmenque gomompa, ante wæyōmōni wipo ñænæmpo nē ænte godāni Īnānite Pabodo nō pōnēninque wææ angantapa.

¹⁰ —Īñānāni, botō ayōmo mōnō ēwente wæquinque godōmenque gomompa. Māincoo mīni ænte goccoo wido cæquinque wipo nā tobæ go ate mōnō becadote wænguinque impa cæmīni.

¹¹ Añongā wipo ñænæmpo nē ēacā tōnō wipo capitāō wadō ante apæneda ēñēninque tontado capitāō Codio ĩñōmō Pabodo nānō ānīnō ante ēñēnāmaī cæcantapa. ¹² Wæætē edæ, ĩñōmō ponte mōnō wodōĩñōmō woboyæ pæmæ tedæ ĩñonte wīi owoīnente wæmompā. Ante wædinque wodo tōmānāni, Pēnite nāni wēmonca wodōĩñōmō nænque tamōnō ĩmætæ ĩnō ongōninque woboyæ ante wææ cæte impa cæmōō. Nōwo wadæ godinque Pēnique nāni wēmonca wodōĩñōmō go ti wæænte quēwēninque woboyæ pæmæ tedæ ĩnque pæmænte go ate mōnō gomonga gocæimpa, ante adoyōmō ānānitapa.

Wīni cai pompa

¹³ Mānōmāinō, Gocæimpa, añōnāni ñænæ wipo goquinque woboyæ dipæmæ ĩnō betamonca wædænque pæmæ ate wædinque, Mōnō ānīnō baī ñōwo mōnō waa goquinque impa, ante todānitapa. Ayæ wipo ñænæmpo wāi wocæñō teēmenca nāni guitodōninca ñōwo gæguincamenca quingæ ĩñæ æænō ñænæ wipodē cō cædāni ate mōnitō wogaa go Cædeta nāni ānōwænē yæwedecaque gotamōnipa.

¹⁴ Mānīnō tæcæ gocæ cæyōmōni do woboyæ wīni cai Yodocodōno nāni ānō wāā tēiwænē

ayaënemāa inō māmō pæmæ pōninque, ¹⁵ wipo ñænæmpo māmō ö ænimpa. Mōnitō, Mönō wodöiñömō adodō gocæimpa, ante cædinque woboyæ pönō gāmænō ædō cæte wiya wēnente goquī. Ante wædinque mōnitō ee amōni woboyæ betamonca inō quingæ māmō dadi wēnente da godō mǎo gotamōnipa. ¹⁶ Wǎa tēiwænē guiyāwænē Caoda nāni änōwænē dipæmæ inō yæwedeca woboyæ wææ cæteinō godinque mōnitō guiyampo mōni wēä wēä ænte pōnimpo ante, Tobænāmaī impacæimpa, ante pæ pagænte ancaa cædinque wēä pōnonte pæ mantamōnipa. ¹⁷ Ayæ nē cædāni guiyæmpo gæguincamenca wēä æænonte ñænæmpodē da wēnānitapa. Guiyæmpo da wēnente ate tōmēnāni, Ñænæmpo awæmpacoo wīi bede wænecæimpa, ante cædinque ñænæ wipo incæ gæguincamenca wīni wīni cæte goto winānitapa. Ayæ, Önætamō Tidite nāni änontamō impa, ante adinque tōmēnāni, Æ quingæ gomō bai mōnō wænguinque Tidite emōnaiboga go nāñe ñongæncædōnimpa. Ante pōnente guiñente wædinque wæñee gocæte ante cædinque weocoo ñænæmpodē pæmænte mǎo nāni gocoo incæ wēä wænonte ñō cædinque ee adāni woboyænque wæñee mǎo gotamōnipa.

¹⁸ Wīni cai iñömō godōmenque woboyæ pæmæninque æpæ mængonta mængonta ante cæ wædinque wipo ñænæmpo incæ æmætæ dadiimæ æmætæ dadiimæ go wætamōnipa. Ininque iimō ate tōmēnāni, Wipo ömædē bate wodæi bacæimpa, ante cædinque mǎincoo ñænæmpodē ongōnincoo incæ æpænē edæ wido wido cædāni

gotapa. ¹⁹ Waönæ bayonte tömēnāni, Ñænæ wipo quincoo, ante nāni cæincoo incæ nāmā önompoca pancacooga æpænē wido cædāni gotapa. ²⁰ Ayæ tæönæ iñonte nænque edæ tamönāmaï nēmō tamönāmaï i ate mönō, Ædömē gomompa, ante eñēnāmaï inte edæ wætamönipa. Ayæ woboyæ godömenque māmō pæmæñö æpæ nanguï mængonta mængonta cæ wædinque mönitō, Ñowo quēwenguināmaï imompa, ante edæ pönēninque wætamönipa.

²¹ Mänināni wantæpiyæ cænāmaï ināni adinque Pabodo tæcæguedē ængæ gantidinque tömāmōni ayömōni tömēnāni inānite iïmaï apæñecantapa.

—Iñānāni, botō ämo eñēninque Cædeta nāni änöwæñē emō cæte pönāmaï inte ee owoquēnēmīni iminitapa. Edæ mänōmaï ee ongömīni bai wipo tobænāmaï iñonte mīnitō māincoo ewēnāmaï inte wædāmaï incædōmīnimpa. ²² Ñowo guiquēnē guiñēnāmaï piyænē cæte quēwēedāni. Ñænæ wipo mönō goimpo incæ tobænte bacæimpa. Nāwangā impa. Incæte waomō iñömō wænāmaï tömāmō mīimō quēwenguimō imompa. ²³ Botō iñömō edæ Wængonguï quimo inōmo inte botō, Wængonguï ingampa, ante tömengā beyæ cæbopa. Ñowoönæ woyowotæ tömengā anquedo botō weca pöninque, ²⁴ botō imote apæñecā eñentabopa. “Pabodo, guiñēnāmaï ie. Tæiyæ awēnē Tetædo weca bitō cōwē gote gongæncæbiimpa. Ayæ bitō beyæ waadete pönō cædinque Wængonguï bitō tönō adopodē godongämæ godāni inānite do angā quēwencædānimpa.” ²⁵ Ante mänōmaï pönō apæñecā eñēnimo inte botō wæætē mīnitō iminite,

Guiññēnāmaī īmīni inte pōnencāmīnīmpa, āmopa. Tōmengā nānō apænedō baquīnō anguēnē, ante botō Wængonguī ingante nē wede pōnēmo inte āmopa. ²⁶ Incæte wipo ñænæmpoque wāā tēiwænē wawænē godinque tobænte ba wæcæīmpa, ante Pabodo angantapa.

²⁷ Īnīnque mēa Wængonguī itædē īñonte woboyæ ayæ pæmæ māo godinque mōnitō Adodiaticopæ nāni ānōmāa wadō wadō wogaa gotamōnīpa. Mānīmpoōnæ īīnque go ate woyowotæ ayaōnænēña īñonte wipo ñænæmpodē nē cædāni īñōmō, Onguīpoiya obo pōmōmpa, ante pōnēnānitapa. ²⁸ Tōmēnāni, Ægancadō īī, ante acæte ante cædinque pædæ guidonte adinque todēinta i tei mēetodo īmpa, ante adinque ayæ godōmenque godinque pædæ guidonte adinque tōmēnāni, Ñōwo edæ pōnōmenque bæintitiæte mēetodo īmpa, ante wædānitapa. ²⁹ Dicaboga pōnī edæ gomō tamēñedāni, ante guiññente wædinque, Ñænæ wipo wāī wocængæīmpa, ante teēmenca nāni guitodōnīnca menca go mencaa yæmīñæmpo īnō edæ guitodōnānitapa. Ayæ, Ñāō ba waa tobāīmpa, ante Wængonguī ingante apænedīnque edæ wāī wocænte a owotamōnīpa. ³⁰ Wipo ñænæmpo nē cædāni guīquēnē, Mōnō wodīi wīnongæīmpa, ante awēmō cædinque waca nāni guitodōnīnca yæcadopo īnō guitodōncæte ante cæte baī babæ cædinque, Mōnō awēmō goquīmpo, ante guiyā wipo incæ pædæ wæænōncæ cædānitapa. ³¹ Guīyæmpo tæcæ pædæ wæænōñōnāni Pabodo īñōmō tontado capitāō tōnō tontadoidi īnānite angantapa.

—Īīnāni wipo ñænæmpo nē cædāni inte ñænæ

wipodē ongönāmaī ināni bai mīnitō ædō cæte nāmā cæte quēwenguīmīni.

³² Angā ēñente wædinque tontadoidi guiquēnē ñænæ wipo nē cædāni nāni awēmō gocæ cædimpo gæguincamē aa wiyænāni ininque guiyæmpo tæi guite æmæwo gotimpa.

³³ Tæcæ oque pönente iñonte Pabodo iñömō, Tömāmīni cænguī cæedāni, ante nanguī āninque,

—Ñowo mēa Wængonguī itædē iñonte mīnitō ancai guñente wædinque ee ate cænāmaī quēwēmīni abopa. ³⁴ Ñowo iñömō mīnitō imīnite, Cæedāni, āmopa. Cænte quēwenguēnē cæmīni, āmopa. Mīnitō æcāmenque incæ tōmāmīni wænāmaī incæmīnimpa.

³⁵ Äninque tōmānāni waa ayönāni Pabodo päö æninque Wængonguī ingante, Waa pönōmi cæmōnīpa. Ante apænedinque ao mænte cængä.

³⁶ Adinque tōmēnāni, Mönō quēwengæimpa, ante gancæ pönente wædinque tōmānāni cænānitapa.

³⁷ Wipodē möni adopodē gocabo iñömō dotiento tetenta i tei mānīpomōni intamōnīpa. ³⁸ Mänōmaī cædinque tōmēnāni eyepæ cænāni ate edæ, Wipo teēmē emīñante önætāmō iñömō gobaimpa, ante guñente wædinque, Wodæi bacæimpa, ante cædinque mönitō cænguī tōmēmō incæ æpænē gäwapænē wido cægadānimpa.

Wipo ñæncæmpo incæ goycæ guiipa

³⁹ Mänīi ñäö bayö omæ adinque ñænæ wipo nē cædāni iñömō, Iimæ quīmæmē impa, ante ēñēnāmaī ināni inānitapa. Wæætē cōwā ayönāni, Æpæ wedeca togaa paodāmæ iñömō emōnai impa, ante adinque, Eyepæ imō ininque mönō emōnaiboga wipo nāñe ñongæimpa. ⁴⁰ Ante

cædinque teëmenca nāni guitodönincacoo ëmö cæte gocæte ante gæguincamë aa wiyæninque ñimpo cædāni tadömengadæ ee ongontapa. Ayæ wiyaimpa mempaa tõmënāni wāi wocæñedë yæmiñæmpoya inö nāni goti wīnimpa incæ ñowo wæætë edæ, Wipo tōō gocæimpa, ante ñi cædinque æpænë wæætë pædæ guidönānitapa. Ayæ, Woboyæ pæmænte mao gocæimpa, ante ñænæ wipo weocoo adocooque yæcadopo pædæ æænonte wo cædāni ate ëmōnaiboga togaa paodāmæ iñömō tōingā mao gotamōnipa. ⁴¹ Incæte tæcæ goyömōni önætamō iñömō nāñe ñongæntapa. Wipo yæcado nāñe ñongæ adinque mōnitō, Mönō ædō cæte goquii, ante wæyömōni æpæ nangui mængonta mængonta cæ beyænque yæmiñæmpo nā tobæninque panguimæ panguimæ æmæwo gopotapa.

⁴² Tæcæ tobæñö tontadoidi guiquënë, Në tee mōnete ongönāni wii tæi tæi pante wodii wīnonguīnāni, ante wææ cædinque tõmënāni inānite wænoncæ cædānitapa. ⁴³ Adinque tontado capitāō iñömō, Pabodo cōwë quëwencæcäimpa, ante cædinque tõmënāni nāni cæcæ cædinö ante wææ angä ëñente ñimpo cædānitapa. Ayæ mōnitō imōnite, Në ipo cæmīni iñömō tāno æpænë tæi guiidinque önompoca compo compo go tõmæwæ ömaa goedāni, angä ëñente gotamōnipa. ⁴⁴ Wadāni ipo cædāmaī ināni inānite tõmengä, Mīnitō guiquënë awæmpaa incæ wipopa tobænimpaa incæ nāñe ñongæninque wiyacæ wiyacæ goedāni, angä ëñente godānitapa. Mänōmaī ëñente cædinque mōnitō edæ tõmāmōni æpæmpo becadote wænāmaī inte ömaa edæ tõmæwæ pongamōnipa.

28

*Wää tēiwæne Mänatabæ Pabodo ponte
quëwengampa*

¹ Æpæmpo becadote wænāmaī inte tōmāmōni
ōmaa taote eññōmōnite, Wää tēiwæne iiwæne
Mänatabæ impa, ante apænedāni eñentamōnipa.

² Māniōmæ quëwēnāni iñōmō wīi wadāni baī
cædinque mōnitō imōnite waadete cædānitapa.
Cōönæ ayæ nangui cæ ate yoguite wæyōmōnite
tōmēnāni gonga tånōninque, Pō ootoedāni, ānāni
gonga tōmāmōni bæcoyōmō oototamōnipa.

³ Pabodo iñōmō ōnompoca gæte tēnewæ bacoo
ænte māmō ñō cæyongā gonga ocoi ä wædinque
tæntæ gongapamō manta Pabodo ōnompō æo
pocænte ñinga cædāmaī ee engate owo wæcā.

⁴ Adinque iñōmō quëwēnāni wæætē nāni cabo
nāmāneque tededinque, “Īingā iñōmō waocā
ingante nē wæningā ingā awædō. Tōmengā
æpæmpo becadote wænāmaī iñongante edæ
mōnō nō cæte pānongā incæ tōmengā ingante
ata cæpodāmaī inte angā ate ñōwo quëwenguināmaī
incæcāimpa.”

⁵ Ante wapiticæ ante pōnente tedeyōnānite Pa-
bodo iñōmō pongadāmaī ingā inte pipo cæcā
tæntæ ñingacæ gongapamō togodo guiite gonga
gonte wængantapa. ⁶ Adinque tōmēnāni, Tincadō
pæncæ pæncæ mempoquingā, ante ayæ, Tin-
cadō iñontobæ tæi go wæænte wænguingā, ante
acæte ante wantæpiyæ cōwā ayōnāni, Ayæ dæ pon-
gadāmaī i inque ingampa, ante adinque tōmēnāni
wæætē edæ, Æ ĩingā wacā wængongui inongā

inte ponte a ongongampa, ante wapiticæ ante pōnēnānitapa.

⁷ Ayæ māniwænē awēnē Pobidio iñōmō tōmengā quincodē mōni ōmaa pōñōmō eyequei intapa. Tōmengā, Oncōnē pō guiite quēwēedāni, angā pō guiite mōnitō mēōnaa go adoōnæque quēwēñōmōni tōmengā waadete pōnō cæcā ate waa quēwentamōnipa. ⁸ Pobidio mǎnōmaī waa cæcā quēwēñōmōni, Tōmengā mǎmpo wepæ tōnō gōmæ cæte daicawo gawænte mōimoga a oñongampa. Ante apænedāni wædinque Pabodo tōmengā weca guiidique Wængongui ingante apænedinque gampocā ate waa bacantapa. ⁹ Pabodo mǎnōmaī cæcā adinque māniwænē tōmāo gode ānāni ēñente wædinque nē wēnæ wēnæ ināni inānite Pabodo weca ænte māmō ænte māmō cæyōnāni tōmānāni Wængongui cæcā waa badānitapa. ¹⁰ Māniñōmō quēwēnāni mōnitō imōnite wæætē pōnō waa apænedinque cōwē waa cædānitapa. Ayæ wogaa tæcæ gocæ cæmōni adinque quiēmē mōni ænguēnēnō ante adinque tōmēnāni, Mīnitō ænte goqui, ante eyepæ pōni ænte māmō da wēnāni ænte gotamōnipa.

Odōmā iñōmō Pabodo pongampa

¹¹ Ayæ mōnitō Mānatabæ iñōmō mengāa go adocanque māmonque quēwēninque gocæte ante cædinque, Äancadēnaquepo, Adecantodia iñōmō quēwēnāni nāni pemonte ānimodē go guitamōnipa. Tōmēnāni wængonguina Catodo tōnō Podoco awinca bai ante badōninque tōmēnāni ñænæ wipocado gō cædinque wipo ñænæmpo emōwo, Äancadēnaquepo impopa,

ante pemönönänimpa. Mänimpo Mänatabæ wëmonca wodöiñömö do pöningue pæmæ tedæ wäi wocæ adinque mönitö iñömö mänimpodë go guiidingue wogaa gotamönipa. ¹² Godinque Tidacota iñömö näni wëmonca wodöiñömö pö wäi wocæninque mönitö mëönaa go adoönæque quëwentamönipa. ¹³ Ayæ wadæ godinque Odeguio näni quëwëñömö pontamönipa. Ìimö ate dipæmæ gämænö woboyæ betamonca wædænque pæmæ wædinque mönitö wadæ godinque waönæ ate Poteodi quëwënäni näni wëmonca wodöiñömö æmæwo pö ti wææninque tömæwæ gotamönipa.

¹⁴ Tömæwæ godinque Poteodi näni quëwëñömö ponte ayömöni në pönënäni näni cabo ongönäni atamönipa. Tömënäni, Adoque Wængonguï itædë mönitö tönö ee owoedäni, änäni Ao ante mönitö tömënäni näni änimpoga mäniñömö quëwentamönipa. Ayæ ate Odömä taadonque gotamönipa. ¹⁵ Odömä iñömö quëwente në pönënäni iñömö, Pabodoidi oo pönänipa, ante do ëñënäni inte doönæ tadinque mönitö imönite bee tencæte ante pönänitapa. Pancadäniya iñömö Apio näni godonte æiñömö ganca pöningue mönitö imönite mämö bee tënäni ate godongämæ gotamönipa. Godinque, Cæincö, ante Menconga go Adoconque, näni äñömö mäniñömö pöñömöni wadäni mämö bee tënanitapa. Mäninäni inänite adinque Pabodo iñömö, Nöwo iñömö wampo pönëmopa, äninque Wængonguï ingante waa ate pönëninque apænecantapa. ¹⁶ Ayæ odömänoidi näni nanguï quëwëñömö Odömä näni äñömö pöñömöni tontado capitäo iñömö

nē tee mōnedīnāni wadāni īnānite tōmengā awēnē nempo pædæ godōninque Pabodo ingante tee mōnedāmaī ingantapa. Wæætē wacōnē nānēnē ænte māodāni quēwēñongante tontado adocanque tōmengā ingante wææ wānōnongāimpa.

Odömā īñömō Pabodo quēwengampa

¹⁷ Māniñmō ponte ate Pabodo mēōnaa go adoōnæque ate oodeoidi nē ānāni īnānite āñecā godongāmæ pōnāni ate tōmēnāni īnānite,

—Botō tōniñamīni, ēñēedāni. Mōnō guidēnāni īnānite wēnæ wēnæ cædāmaī inte botō dodāni nāni angainō ante wido cædāmaī īñōmote oodeoidi incæ Eedotadēē īñömō botō īmote bæi ongōninque æninque odōmānoidi nempo pædæ godōnāni gotabopa. ¹⁸ Odōmānoidi guiquēnē botō īmote apænte āninque, Æbānō cæcantawo, ante ancaa ante adinque, Pabodo dicæ tōmengā nānō wænguinque wēnæ wēnæ cæcāa, ante adinque botō īmote ñimpo cæcæte ante cædānitapa. ¹⁹ Odōmānoidi botō īmote ñimpo cæcæte ante cæyōnāni oodeoidi wæætē ancaa Baa ānāni ēñente wædinque botō īñömō edæ, Odōmānoidi tæiyæ awēnē Tetædo incæ botō īmote apænte anguēnengā ingampa, antabopa. Mānōmaī āñimo incæte botō awēnē Tetædo weca ongōninque, Botō guidēnāni wēnæ wēnæ cædānitapa, ante wæætē piinte ānāmaī incæboimpa. ²⁰ Mānōmaī beyæ mīnitō īmīnite apænecæte ante botō, Pōedāni, antabopa. Ñōwo apænebo ēñēedāni. Mōnō idægocabo īñömō, Mōnō nē ponguingā Codito pōnō cæcā beyænque watapæ bacæimpa, ante mōnō pōnēmompā. Māniñō mōnō pōnengainō beyænque botō daagōmē ñānoncapoīmo a ongōmo aedāni.

²¹ Ante apæneyongante tömënäni wæætë Pabodo ingante apænedinque,

—Oodeabæ quëwënäni bitö ìmite ante yewæmöninque cadota pædæ pönönäni dicæ æmöniyaa. Mönitö tönĩñadäni Oodeabæ quëwente pöninque bitö ìmitedö ante dicæ wīwa änäniyaa. Bitö wīwa cædinö ante yewæmöninque odömönämaï inönänimpa. ²² Mänömaï i incæte wayömö wayömö tömämæ quëwënäni, Mäninäni Coditoidi inönmö wënæ wënæ cædäni inänipa, ante pünte tededäni do ëñëmöni ininque mönitö, Bitö ayömi Coditoidi æbänö cædäni inänii. Æbänö pönëmi, ante ëñencæte ante wæmönipa.

²³ Äninqe tömënäni, İionæ godongämæ bee tëninque ëñengæimpa, äninqe wadæ godänitapa. Ayæ wæætë mänionæ nāni äniönæ inque ba ate ocæ ëmænte pönönäni tæiyænäni bee tëninque Pabodo weca godongämæ pönänitapa. Pönäni adinque Pabodo inönmö baänæ contadingä gäwadecæ pöni apænedinque, Wængongui Awënë Odeye nempo mönö quëwengæimpa, ante apænecantapa. Ayæ, Möitee wodi tönö Wængongui beyæ nē apænegainäni, Mönö Codito ponte cæcæcäimpa, ante nāni angainö bai Itota inönmö ñowo ponte tömänö ante do inque cægacäimpa. Nāwangä impa, ante botö apænebo ëñëmaimäni, ante Pabodo oodeoidi inänite apænecantapa. ²⁴ Angä ëñëninque pancadäniya, Pabodo nāwangä angampa, änänitapa. Pancadäniya guiquënë, Wii pönëinente awædö, änänitapa. ²⁵ Nāni cabo incæ mänömaï wæætedö wæætë apænete wadæ gocæ cæyönänite Pabodo wæætë æmäwo apænecantapa.

—Wængongui Tæiyæ Waëmö Önöwoca apænecä
 ëñëninque Itaiya wodi doyedë mînitö mæmæidi
 inänite näwangä ante apænecäimpa.

²⁶ “Itaiya ëñëmi, bitö oodeoidi weca godinque iïmaï
 ante apænebi ëñencädänimpa.

Mînitö önömoncaque ëñëninque ëñënamäi
 incæmînimpa.

Awincaque adinque cöwë adämaï incæmînimpa,
 ante apænebi ëñencädänimpa.

²⁷ Iïnäni edæ mîmö ömædënäni inte wîi ëñëinente
 wæwædö,

äninque ædö cæte ëñenguinänii.

Awinca wîi ainente awædö, änäni inte ædö cæte
 aquinänii.

Edæ mîmö ënënäni inte bai tömënäni awinca wi
 æmonte adinque

önömonca wi æmoncate ëñencädönänimpa.

Edæ mîmö nö pönëninque dadi ëmænte botö
 gämænö pönäni bai

botö do godö cæbo waa bacädönänimpa.”

Ante Itaiya wodi mînitö mæmæidi beyæ ämotamîni
 ante bai yewæmongacäimpa. ²⁸ Iïninque mînitö

oodeoidi inömiini inte ëñënamäi imîni adinque
 Wængongui ñöwo wæætë, Botö pönö æmo

beyænque quëwencæmînimpa, ante oodeo inämaï
 inäni inänite do apænecæ cæcampa. Tömënäni

guiquënë ædæmö waa ëñenguinäni inänipa,
 ante apænebo ëñëmaimînimpa, ante Pabodo

apænecäntapa.

²⁹ Mänömaï apænecä ëñente wædinque oodeoidi
 näni cabo nanguï pönï wæætedö wæætë äninque

wadæ godänitapa. ³⁰ Pabodo iïnömö oncö ænte
 quëwencæte ante tömënäni näni godonte æinta

pædæ godöningue wacä oncö incæ tömengä oncö bai bayö mänincönë wadepo mënepoga quëwengantapa. Ayæ, Æcänö ëñacæ pöinëna cöwë botö weca waa ponguimini, ante quëwëningue tömengä në pönäni inänite apænecä ëñënönänimpa.
³¹Ayæ në wææ wänönäni cöwë Baa änämaï iñönäni tömengä guiñenämaï apænedingue, Wængongui Awënë Odeye nempo mönö quëwengäimpa, ante apænedingue, Mönö Awënë Itota Codito æbänö cægacäi, ante edonque odömonte apænecä ëñengadänimpa.

Wængonguï nänö Apænegainö
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
9bedab5a-39ff-5163-a35b-8056cbbe8690